

# APOSELO

## Aposelo Ali-kitame

## Yesunole Takama Yakete

## Tanemo

<sup>1</sup> Anu oyali Tiopilasi, Yesuyo titikome tane-pala wipitikome taneta ni titikome olaukane-pala wipitikome olaukaneta i i wane neke namolo bokuke kabe koukoane wianemekakakou.

<sup>2</sup> Nipa Akolaliyo a tibu pene ate moa aua poameneyake Epetane Yomini patu kautakoa kakomepa one takoa motane Aposelo ali-kiti tamene wa oa tanemoka wiane mekatapekou.

<sup>3</sup> Yesuyo tete-kala mootokoa tukale moa kamotokatekaneyake one tuake kamotadeko wa one Aposelo ali-kitame wene tomotoa tokome ele kule toa pono yametekala taneya. Nipa ta pataka padeka noi kakoa (40) ponoka toapa Akolaliyo ali atoa pawe toa talo toko ko-pala oa mekala taneya.

<sup>4-5</sup> Wa padepete one oya-lawe-pala opia mekome nee noa mekome okome Yerusaleme ta tewitikoa poameamene. Agetaiyo kiwi auapeou wa okanakale taatekoaa tomotoa eida nepia meamene. Yoneyopa ali atoa pa ue motokama yakoyake Agetaiyopa one Epetane Yomini kiwike awinomotoa moa wetekoo. Kiwike noo wane oane pikolu yatekoina ago awinoateko tigotokono, Yerusaleme tewitikoa poameneyea eida nepia meamene wa akeneuya.

*Yesu A Tibuke Moa Aua Pekenemo*

<sup>6</sup> Wa naniko odene ya kouko a mekete one yatekete ekete Ali Muno tone takepa mone yene yopinaneyano, i taapa pine yene tone yopiatono, mone yene neme litia wetekoa eni luku Yu yene totome yopimono wene piko-pe wa yatekoli okome

<sup>7</sup> padele padele witateko oipa Agetaiyo one wene litia oi pedoa pikala toko. One eni pedoa piko toa kime oyake wene toamiki.

<sup>8</sup> Eni wene toamikiyake Epetane Yomini kiwike awinome meoo. Nitikalepa one tele patu kau-takoa kakete eya toma yawei. Anume toma yak-oule kime enekoinapa ta piko peyake oa pupitikama yawei. Nipa Yerusalemme Yudea Sameria yeka yukuka takeka nitoi wa Yesuyo akeneya.

<sup>9</sup> Nimo okalepa o yename enekakoa Yesu a tibuke moa aua pekeneya. Nipa enekoa kakoli wedome agopa takaneya.

<sup>10</sup> Nitaneyake a tibuke nepikoa pikoli ali takuta ake tane mamina kakaneya kiwi kakoiya liti kotikataapea note kananeya.

<sup>11</sup> Nitikete ekete kiwi Galili yene a tibu dekolo pa nepikoa piki-pe. Ina Yesupa ate tibu moa aua pokanakago tibuke pokana toa dikoa wakapea nokale enoi wa edelo agotame akeneya.

### *Yudase Luku Mataiasi Tako Kakanemo*

<sup>12</sup> Nitaneyake Yesuno oya-lawe Olipe-pini tono keti toa Yerusalemme take wakapea pekeneya. Olipe-pini tono Yerusalemme tata pake odene (1) kilomita pianeya.

<sup>13</sup> Yesuno oya-mikiti Yerusalemme take eni peketepa ako yapu kini oboai tane yapu pote mepaney. Eidapa eya ali-kiti oboa meaneya.

Pita Yoneta mea ni Yame Aderuta mea ni Pilipi Tomasita mea ni Batolomiu Matiuta mea ni Alepiasine mana Yame mea ni Saimone one pade ibini Selote wa ibini akene ago mea ni Yamene mana Yudase mea taneya.

<sup>14</sup> Eni ali peya lugutukoa odeneya oboa mekete Akolali kowitikala taneya. Nipa Yesuno nine Maria ni pade atoa-kiti ni Yesuno wamene-mikiti eni yene-pala koukoa mekete kowitikala taneya.

<sup>15</sup> Einapetepa eni yene ege takupeta kadukoa wa lene kolo kakoa (120) ali atoa koukoa mekoita kini lene makono Pita kamokoa kakome okome

<sup>16</sup> anukameyo kipala ukumo yakamene. Papete Epetane Yominiyo wene takakale Depidiyopa Yudaseyo toatekamo Akolaline bokuke wiamekapianeya. Yesu wimotoa moa metekanakagoke uku. Einago Yudaseke papete wia mekapiane toa taatekamedekale taatekaoa toka.

<sup>17</sup> Yudase einagopa Yesuyo onekele takamotoa takoa motokale toto-pala opia yakona wa Pitayo akeneya.

<sup>18</sup> (Yudasepa one toka poaneleke kue mootokoapa itono pade topo toa motaney. Nitapa aka mati kawa pitakale tepe kolotini tokokolokaneya.)

<sup>19</sup> Eni tanemo Yerusalem take mekoi peyame yakatapeneyea tokome eni itonopa Akeledama wa ibini akeneya. Akeledama wapa lokeyo itono wa ekete akeneya.)

<sup>20</sup> Enilekepa Pitayo okome okome lo akene bokuke eya wa wia mekaneya piko.

*Einagono itonopa tumu tokaneyapimoton, odengoka eida meamomoton toe wa wia*

mekapianeya.

Eya waka wia mekapianeya.

*Einago pupu luku panagome tomotato wa wia  
mekapianeya.*

**21** Eni wia mekapiane toa taateko a taneyano, einago luku eya ago moa kakato. Ali Muno Yesu toto-pala opia yaka toa-kama kagekama yakanakago pade takoa moa kakato.

**22** Nipa Yoneyo ali atoa ue motokama yakale laigoa toto-pala opia yawa ni Akolaliyo Yesu tibuke ate aua pokaleka pa kagekama yawa tokanakago pade Yudase luku moa kakatoane uku. Yesu tukale Akolaliyo moa kamotokakale enekoonakamopa dikane ago pade toto-pala yakome oma pomotoane tekene ni uku wa Pitayo akeneya.

**23** Nitikale nitato toe wa ootokoa ali takutane ibini takoa akeneya. Panagopa Yosepe, Basabasi waka ibini akeneya. One pade ibinipa Yasasi. Padena agopa Mataiasi.

**24** Einagotane ibini takoa oa Akolali kowitikete ekete Ali Muno ali peyane tepene wene pikolepa neme lekoa enamele tokono, neme takoa motokagopa i wa totome wene tomotono ta.

**25** Yudase one poatekata poademepa Aposelo ago mea Yesunole takoake wakanano, one luku panagome Yesunole takakome memotoono, neme mainago takoa motoko-pe wa kowitoa kakeneya.

**26** Nitoapa einagono ibini moadete gutu lua kea mea Mataiasine ibini i tadeko wa enoa einago moa kakaneya. Nipa ali tuku melepu kakoa (11) ali-kitipa Aposelo ali-kiti wa akene toa einagoka Aposelo ali wa akeneya.

**2***Epetane Yomini Ali Atoake Awinameno*

<sup>1</sup> Pedikose wa ibini akene ta patakalepa Yesuno oya-mikitiki peya odeneka oboa meaneya.

<sup>2</sup> Nitikoika a tibuke pupulege mati uu oa kawa nekene tetepo tootapekome eni yene odeneya koukoa mekoi yapu lobutua tagatapeneya.

<sup>3</sup> Nitikale eni yene ete oto enete tokoli toe itipono keneya kini kini tobouke tete tete toa pitakolokakale enaneya.

<sup>4</sup> Epetane Yomini kiwike awia tagatapekome wene taka taka tokale ta padeka padeka yakoa akene agale-kitike pademo pademo oa kakala taneya.

<sup>5</sup> Einata einapete ta pikò peyake mea Akola-linele wedoa takama yakene Yu yene Yerusalem take toge kikoa mekoika note oboa meaneya.

<sup>6</sup> Eni uu okamo yatekete eni Yu yene eida eni uu okata obomoa pote kapaneya. Pote kakete yatekoli Yesuno oya-mikitame e yene kini kini take mekete yakoa akene agale-kitike Akola-linemo oa kakoli yatekete wene kainya pianeya kakeneya.

<sup>7</sup> Nitoa kà oa kakete ekete i yene peyapa pa Galili yenameke ikino,

<sup>8</sup> tone tone ta-kitike mekete yakoa oko agale-kitikepa okala tikili totome yateko. Edoa wene toa iki patu.

<sup>9</sup> Totopa eya ta-kitike kawa nokoya wa kini kini ta ibini takoa okala taneya. Pasia ni Midia ni Ilame ni Mesopotemia ni Yudea ni Kapadosia ni Podase ni Esia

**10-11** ni Perisia ni Pabilia ni Idipi ni Sairini ta liti piko Libia ni Lome enika eni ta kawa nokoo. Toto padeka-kiti etene Yu yene mea ni padeka-kiti namolo pa yateneke Yu yene-pala lipua mea tokoo. Ni toto padeka-kiti Keriti Arebia tata kawa noko. Totopa ta piko peyake tutu tutu wa kawa noko. Opi tone yakoa oko agale-kitike i yename Akolaliyo tubele toma pokomo i i wa mo wia kakili totome yateko.

**12** Nitoa wene kainya pianeya kakete kini kini yakaate tekete ekete opi-la, edele toatekolo iki-pe wa ka oa kakeneya.

**13** Nitikolipa padeka-kitame tea agale kikoa ekete beita ipa gerepi po ku ue noa pia tekete leau oa kakete iki wa akeneya.

### *Pitayo Mo Wia Kakome Akenemo*

**14** E yename enimo okoli Pita one tuku melepu kakoa (11) oya-mikiti-pala kamokoa kakome telo okome okome no yatene Yu ali-kiti ni i Yerusalem take pitiki peya kime yatekimopa pine toaweane ukuno, wedoa yakoe.

**15** Totome gerepi po ku ue nokoa pia tekete leau oa kaki wa kime ikino, opi lou pini 9 kilokokepa totome gerepi po ku ue sisoake edoa moa nokoa pimotoa-pe.

**16** Totome pade nitamokoo. Ipa eya ago Yoeleyo papete oa piane toa taatekoia toko. Eya wa oa pianeya.

**17** *No Akolaliyopa wipitia ta patateka tigotokale toatekoumo ukuno yakoe. Ali atoa peyake anu Epetane Yomini moane wetekakolu kini tepene lobutua tagatapeoo. Nitikalepa kini*

*mana kono-mikitamepa anu agale tqawea akoi. Kini tuali-kitamepa pulete keneya padele padele yametekoule enoi. Kini ada yatename pule pitikoita pule enekala toi.*

**18** *Enipete-menepa anu Epetane Yomini anu pupu yeneke moane wetekakolu ali-kitikeka atoa-kitikeka awia tagatapekale anu agale oa pupitikakama poi.*

**19** *A tibukepa ele kule tubele witakoane itonokepa padele padele telekole witakoane tekene anu tele pine yametekala tou. Nitikolupa kamate yokoa kawa toe nokoa kawa lodome eya kuya peya agopa takoa too.*

**20** *Ni lou moa yomiyomu takataapeoo. Tokeneka kamate pagene tetepo taneya kawoo. Nipa Ali Muno pa teleta tootapeneyea noateka tigotokale enika enile too.*

**21** *Nitikalepa Ali Muno wa-ye wa kowitikoi peya Akolaliyo toa moo wa Yoeleyo wia mekaneya.*

**22** *Pitayo nimo ootokoa okome Iserele yene kipala i ukumo yakoe. Kiwi pakeke ele kule telekole toma yakanakago Nasarese Yesuke uku. Einagome Akolaline peku noa tadeko wa kime wene tomotoa tokome Akolali patu kautakoa kakome enika enile toma yakana.*

**23** *Akolaliyo papete wene toopiane toa taatekoia tekete Iserele yene kime one-pala eya tokoina. Poane peku nakene yenam yomo lekaneyake wia dekakamotoa moa metekoina.*

**24** *Nitikoinake Akolaliyo moa kamotokaka. Nipa wakome labakaneya kawou toa Yesu tuane ali atoa tete mokoa kaki take pome mepaneyake Akolaliyo toa motoka. Eida labaney kamele*

toamokale tokome toka.

<sup>25</sup> Enilekepa Depidiyo Akolaline bokuke papete eya wa wia mekapianeya.

*Ali Muno Akolalipa anu lene timini takakoane pikou lono-kama kakale enekou. Anu nimini yono lono kakome no yopikolo tokome padelemeka no toa potokamele toamoko.*

<sup>26</sup> Nitikono, kolotini nakolo wediane meane ke wane uku. Nipa tukile toatekuyake Akolaliyo toatekole nepiane meane wediane mekene uku.

<sup>27</sup> Tuane ali atoa pote meki take anu yomini mea kamotoa neme wawamoo tokolo tekene ni uku. Nipa nekele-kama takamotoa takoa motokago noanu tigini lomumotoa wawamoo.

<sup>28</sup> Pa meane kama poateku kaapa iwa neme no wete yamepikana. Nopala odenekata opia yakilepa nipa wediane meane tagamotoa teke too wa Depidiyo papete wia mekapianeya.

<sup>29</sup> Pitayo nimo ootokoa okome anukameyo tone kaua Depidi-loeke eya wane ukuno, yakoe. Einago tua pokale oloyo taneya. One oloyo tane lukupa tone take pa pia kakeneya.

<sup>30</sup> Einagomepa Akolaliyo toatekamo papete toawea wia mekapikala taneya. Nitane ago-pala Akolaliyo eya wa akeneya. Neeke tawateka ago pade ne luku ako odene mekome ali atoa pawe toa talo toa kawoo wa oa togotaneya. Akolaliyo nitoo wa Depidiyo wene tokome eya taneya.

<sup>31</sup> Akolaliyo toatekale papete enepikomepa Keraisu moa kamotokatekamoke eya wa wia mekapianeya. *Einagopa tua pekene ali atoa pitikoika mea kamotoa Akolaliyo wawamoka. One tigini lomumotoa wawamokome moa kamotokaka*

wa Depidiyo wia mekapianeyea. Nipa enile wete tane tetepo takoa wia mekapianeyea.

<sup>32</sup> Eni wia mekapiane toa Akolaliyo taatekakomema ina Yesu wete moa kamotokaka. Enipa toto peyame leneme enekoomo uku.

<sup>33</sup> Einagopa Akolaline nimini yono lono ate moa kakaneya kakome opi eya toka. Oneketaiyo one Epetane Yomini ne meou wa papete oa togotopikana toa taateko a metekale moapa one Epetane Yomini toto mea tagatapeka. Nitikale tone tepene lobutua tagatapeko tokome totome imo oa ika ile tokolo kime yakoa enoa tiki.

<sup>34-35</sup> Depidi-loe a tibuke wete poameneyake eya wa akeneya.

*Ali Muno Akolaliyo anu Ali Muno-pala eya wa oka. Nepala poi teia meki yenepa moane kawikoane neke kawane komo pikouno, anu nimini yono lono nooke menamene wa oka*  
wa Depidiyo wia mekapianeyea.

<sup>36</sup> Iserele yene kiwi peya-pala eya wane ukuno, yakoa moe wane uku. Ina Yesu kime lekane yomoke wia dekakoinapa Akolaliyo moa Ali Muno wa oa Keraisus wa oa kakaka wa Pitayo akeneya.

<sup>37</sup> Pitayo nimo okale yatekete e Yu yene tepe tebemo tebemo toa kakeneya. Nitoapa Pita-pala ete Aposelo ali-kiti-palaka ekete ame-loe poanele eni tekete tadeko. Tone toatekole agopa tokono, edele tomotoa iki-pe wa okoli okome

<sup>38</sup> kini poanele toma yakoinake Akolaliyo po letu mekakanapa keetaapea poanele wia mitikakamotonu, kini poanele tewitikoa Yesu Keraisus patu kautakoa kakete ue moamene.

Nitikolipa Akolaliyo one Epetane Yomini metekale kiwike awinoo.

<sup>39</sup> Akolaliyo one Epetane Yomini meou wa papete oa togotokomepa kiwika kini mana konomikitika ta tetemada pitikoi yeneka metekene meou wa oa pianeya. Nipa tone Ali Muno Akolaliyo one takoa moa kayo oateko yene peya one Epetane Yomini meademe oko wa Pitayo e Yu yene-pala akeneya.

<sup>40</sup> Nitapa e yene mama motokome pademo pademo okome okome i take poane peku lawetane yenepa kini poanele toma yakoike Akolaliyo kibu moono, eni poanele tokoi yene-pala odene ka dekua kibu motokaya tokolo pilia wawati wa Pitayo pubu oa kakeneya.

<sup>41</sup> Enika enimo oa kakale ali atoa kainya matiyame yakoa moa ue motaneya. Nipa eina ta pataka-pete ege egeta kadukoa (3,000) ali atoa tadiya Yesuno yatene-pala lipuaneya.

### *Yesuno Peku Nakene-kiti Mekete Tanemo*

<sup>42</sup> Eni yenamepa Aposelo ali-kitame olaukane toa litima pekete odene wene piitikoa koukoamekala taneya. Nitapa palawe wane popimoa moke toa noa Akolali kowitoa tokala taneya.

<sup>43</sup> Aposelo ali-kitame telekole toma yakoile enekete peyame kə oa kakete ekete Yesuno tele patu kautakoa kakete tadiki wa okala taneya.

<sup>44</sup> Yesunomo yakoa motokoi peyapa odene ya koukoa mea kinikiya ete oto wa tatikamu taneya.

<sup>45</sup> Nipa kini oya-lawe padaya toamokale enekete kini itono eya topo toa kue moa moke toa mekala taneya.

<sup>46</sup> Nitima pekete ta pataka abuna tobou losu yapuke obopokala taneya. Nitimotekete kini yapukiti obopekete palawe wane popimoa moke toa nokala taneya. Nipa kolotini nakale odene wene-kama pianeya mekete taneya.

<sup>47</sup> Nitoa mea Akolali kei pia kakoli enekete ete peyame ke ke wa kiwi pewe wiai taneya. Nitikakoa Ali Munoyo ta pataka abuna ali atoa toa moma pokomepa one yatene-pala moa lipukoai taneya.

### 3

#### *Kawata Lepo Taneya Meane Ago Epetekanemo*

<sup>1</sup> Wa pade-pete lou wegoukaka (lou pini 3 kilokoke) Pita Yoneta tobou losu yapu pekeneya. Nipa Yu yene tobou losu yapu pote kowitoai tane-pete pekeneya.

<sup>2</sup> Nitota pekete enekoli kawata lepo taneya opiane agopa one oya ali-mename tobou losu yapu kago ludu mekadete leyo leyo toa aua ponokoli enaney. Ta pataka abuna koniyo kago wa ibini akene kagoke tuapea tobou losu yapu ponokoi yenaneke kue oia mokala tomotoa eida aua pote mekoai taneya.

<sup>3</sup> Eina mekoai taneta Pita Yoneta tobou losu yapu lobutadete tokoli enekome einagome kue mano wa okale

<sup>4</sup> Pita Yonetame einago nepikakete Pitayo okome tota nepikamene wa okale

<sup>5</sup> padeya mouno wene pikome nepikaneya.

<sup>6</sup> Nitikale Pitayo okome silepa kue golo kueka toamokoyake padeledo ne auapeane touno,

**7** Nasarese Yesu Keraisu patu kautakoane kakene ukuno, kamokoa pa wa ootokaone nimini yono moa katekamotokale eina eina one kawata one kawa lamenetaka tele tootapeka.

**8** Nitikale tigoa kamokoa kakome opi yamele toko wa yakeneya. Nitoa Pita Yoneta-pala tobou losu yapu opia pome Akolali kei pia tigawineya pekeneyea.

**9-10** Nitima pokale enekete peyame ekete ekee i agopa tobou losu yapu koniyo kagoke-kama mekome kue oia mekanakagono, ke ke wa one-pala tokanakaleke kā oa kakeneyea.

### *Pita Tobou Losu Yapu Kakome Akenemo*

**11** Pita Yonetame latekakoinakagomepa einagota yono mokoa kakaka ali atoa wapokamoa pote unukamoa kakeneyea. Nipa Solomono wa yomini kayo oa ibini akene Iono kā akeneyea teyapea pote kakeneyea.

**12** Nitikoli enekome Pitayo e yene-pala okome Iserele yene anu oya-lawe edekolo wene kainya pianeya kakete tota lene wikoa kaki-pe. Totame Akolalinele wedoa takama yakete tekete i agopa tone teleme kamotokakoono wene pikete tiki-pe. Tone teleme pade latekamele toamokoyake

**13** Akolaliyo latekaneya. Nipa one patu-kama kautakoa kako ago Yesupa ali atoame kei pimo-toa tokome taneya. Tone kaua-mene Eberame Yekobeta Aisake toa yopikoa kako Akolalike uku. Eni Yesupa Pailaseyo pitia yakakamotoa kime aua pote mepokoina. Nitikoli pitia yakatekoia i ago po kotokoane wetekou wa okake Yu yene kini Yesu tumotono wene pikete wakoina.

<sup>14</sup> Nipa Akolaliyo one wa takoa moa kakapikago Yesu wene kiyo akeneya-kama mekago eni wakoina. Nitoapa ali-kiti wia tukakala tane ago Barabasi po kotokoa wetekaka-ye wa okoina.

<sup>15</sup> Nitoapa ali atoa poome mekoia wene takoa latikagopa kime wia tukakoli tua pokanake Akolaliyo moa kamotokakale kamoia poka. Enipa Yone totame enekoomo uku.

<sup>16</sup> Ina kawata lepo taneya mekanakago kime i enoa wene tiki agopa Yesuno ibinike wene tuganeya tokome weye akatapeneyea. Nipa Yesuno ibini wedekoa one patu kautakoa kakete latekatapeneyea kime eni enekina.

<sup>17</sup> Ame-loe Yesu einakago wia tukakoinapa kimeka kini tobou ali-kitameka wene toamekete tokoinano wene tekene uku.

<sup>18</sup> Einapa Akolaliyo wene takane toa one agale toawea akane ali-kitamepa Keraisuyo tete moa tuatekamo papete wia mekapikala taneyano, kime Yesu wia tukakilepa Akolaliyo papete wene toopiane toa taatekakete tadiki.

<sup>19</sup> Nipa kini toma yakoi poanele Akolaliyo moa kogamotonu, kini namolo poane wene wia wawe.

<sup>20</sup> Nitikolipa Ali Munoyo kiwi weye ahoa pewe wia too. Nitoapa kiwi auapeou wa one takoa moa kakapikanakago eina Yesu wa lokoa oto wetekoo.

<sup>21</sup> Nitatekoyake papete Keraisuke a tibuke nepia meoo. Nipa Akolaliyo one agale papete toawea akane ali-kiti wene takakana toa taatekakome one namolo latikanakeya peya weneya latimotoa Keraisuke a tibuke nepia meoo.

<sup>22</sup> Moseseyo einago Keraisuke papete eya wa oa pianeya. *Kini Ali Muno Akolaliyo one agale*

*toaweane akamotoa no moa kakakana toa naniko kini wamene ago pade one agale toawea akamotoa moa kakoo. Nitoono, einago taateko a nokome toe wa okale-kama tamene.*

<sup>23</sup> *One nokome oka toa yakoa moamokagopa Akolaliyo one yatene pakeke kateko a atukoo wa Moseseyo oa pianeya wa Pitayo e Yu yene pubu okome akeneya.*

<sup>24</sup> Nimo ootoko a kakome okome totome ipete taateko a toatekoomopa eya ago Samueleyoka toawea oa pianeya. One eina toawea oa pianey toa Akolaline agale toawea akane ali peya lokama nekete akeneya.

<sup>25</sup> Kini papete toawea akapiane ni Akolaliyo kiwi yatene auapeou wa kini kaua-mikiti-pala papete oa togotaneleka kime pikoa kakete opi taatekakolo enoa yakoa tiki. Enipa Eberame *neeke tqamo a pokoi ali atoake tekene e ku yatene ta piko peyake tama pote mekoika talo toane pewe wiou* wa Akolaliyo Eberame-pala oa togotopiane toa taateko a tokoleke uku.

<sup>26</sup> Akolaliyo papete oa togotopikana toa taatekakomepa onekele-kama takama pokago kiwike namolo takoa moa wetekakana. Nipa kini toma yaki poanele tewitikoa wawe wa kiwi pewe wia kamotoa moa wetekakana wa Pitayo akeneya.

## 4

### *Pita Yoneta Kanosolo Ali-kitane Leneke*

#### *Kakete Akenemo*

<sup>1</sup> Pita Yonetame e Yu yene-pala pa ko oa kakoika Akolalike lodo yotokoai tane ali-kitika tobou losu

yapu talo tane yene yopikagoka Sadusi yeneka einagota kakoita nekenneya.

<sup>2</sup> Nipa Yesu tua pokome wa kamoa pokale tokome ali atoaka tua potepa wa kamoa poi wa einagotame olaukanemoke kotimi yoa tekete nekenneya.

<sup>3</sup> Nitoa einagota dekoaa motekete ekete opi ta wete likono, kini koiso podolio akato wa po yapu pitikapaneya.

<sup>4</sup> Nitaneyake einagotame okoimo yakane yene peya matiyame kini okoimo yakoa motaney. Nitaneyake Yesunomo wete yakoa motane yene-pala eni yene kibutukoa oi moapa ali-kama takoa oi motokoli ege egeta wakala kadukoa (5,000) kakedekoi.

<sup>5</sup> Podolikama Akolalike lodo yotokoai tane ako tobou ali-kiti Kanosolo ali-kiti Yu yenane totono pine toa olaukane ali-kiti enika eni ali peya Yerusalem take odeneka koukoa meaneya.

<sup>6</sup> Ako odene mekome Akolalike lodo yotokoai tane tobou ago Anasika one wamene-mikitika Kaiapasika Yone Alesadataka eida koukoa meaneya.

<sup>7</sup> Eni yename Pita Yoneta kini lene yoto moa kakoa pitia yatekete ekete kitame abela tokoinakalepa tene tele patu kautakoa kakete tokoiya-mo. Tene ibini wedekoa epetekakoiyamo wa okoli

<sup>8</sup> Pita one tepene Epetane Yomini lobutua tagat-apeneya kakome okome tobou ali-kiti Kanosolo ali-kiti kipala i ukumo yakoe.

<sup>9</sup> Kawata lepo taneya mekanakagopa Yone totame auapea epetekakooopa edoa epetekakoiyamo wa kime tota pitia yatekino,

<sup>10</sup> kipalaka Iserele yene peya-palaka eya wane ukuno, yakamene. Kime yomo lekaneyake wia dekakoli tuaneyake Akolaliyo moa kamotokane ago Yesu Keraisuno ibini wedekaneya tokome i ago kini leneke latekatapeneya kako.

<sup>11</sup> Yesu einagokepa Akolaline bokuke eya wa wia mekaneya pikono, yakoe.

*I yomopa poadeko wa yapu wiane yene kime  
paya tetepo takoa wakeneyake panagome i  
yomopa yapu pigi wa moa wianeya wa wia  
mekaneya piko.*

<sup>12</sup> Ta piko peya pitiki ali atoa toa motokagopa einago odene. Pade lokoaka mena. Kiwi toa momotoa one ibini wedekoa oatiki agopa einago odene wa Akolaliyo one ibinipa Yesu wa akeneya wa Pitayo akeneya.

<sup>13</sup> Nimo okale yatekete e yene oote tekete ekete i agotapa pa agotano, mane mane pine pitia yakoa luamene agotameke piti toamokolo kakete imopa i ikino, einakago Yesu-pala opia yakoi agota tadeko wa akeneya.

<sup>14</sup> Nitapa einagotame latekane ago kita-pala opia kakale enekete tekete pademoka ete topo takoa wameneya.

<sup>15</sup> Nitapa einagota Kanosolo yapu meaneya moa akolono wetekateko pedoa pikete ekete

<sup>16</sup> i agota-pala edele tato patu. Padele telekole ina tokoi. Ae, kini ina tokoinmopa Yerusalem take pitiki peyame yakatapekete tikino, kauatiyake oyake kauamele toamokono,

<sup>17</sup> eya tato. Kini ina tokoinakamo ta peyake oa pupitikaya tokolo einakago Yesuno ibini

patu kautakoa kakete odene agoka wa pade olaukameamene wa ato wa oa tukaneya.

<sup>18</sup> Nitoapa oto noe wa Pita Yoneta kayo oa motekete ekete einakagono ibini patu kautakoa kakete pademoka wa pade olauko wameamene-koli

<sup>19</sup> Pita Yonetame ekete Akolaline leneke kawapa totame edele tomotoa iki-pe. Kini wene litia tomotoa iki-pe. Akolaline wene litia tomotoa iki-pe. Kini takoa oe-na.

<sup>20</sup> Totame pade tone leneme enoa kaleme yakoa tokoomo kauameneyea toawea oo wa akeneya.

<sup>21</sup> Nitikoli Kanosolo ali-kitame einagota wa kikoa ootokoapa poe wa wetekaneya. Nipa edele toa kibu moo wa wene kibutua mekoiyake ete ali atoa peyame einagotame tokoinakaleke Akolali kei pia kakoli tokome kibu moamele toameneyea pa poe wa wetekaneya.

<sup>22</sup> Mali padeka noi kakoa (40) ponoka toa pa lepo taneya meane agoke latekakoiya tokome ete peyame ke wa Akolali kei pia kakeneya.

### *Yesunomo Yakoa Motane Ali Atoame*

#### *Akolali Kowitikete Akenemo*

<sup>23</sup> Kanosolo ali-kitame kita wete poe wa wetekakoli Pita Yoneta kini oya-miki mekoita pata wa pekete Akolalike lodo yotokoai tane tobou ali-kitameka Kanosolo ali-kitameka kita kikoa okoinakamo toawea opaneya.

<sup>24</sup> Nitikoli yatekete kabunu kokotukoa ekete tone Ali Muno Akolali tibuka itonoka kusa ueka enika eniyake meki peya neme latikoya.

**25** Nitikago neme toawea okana toa Epetane Yominiyo wene takakale tone kaua ago Depidi-loe nekele takama pokagome eya wa wia mekapianeya.

*E ku yatenepa tepene poto witoa kotimi yotaneya  
mea tikilepa edekolo tiki-pe. Ali atoamepa  
pata pale toatiki oi pedoa pikilepa edekolo  
tiki-pe.*

**26** *Ta piko peya ako tobou meki-kitame poi kamotoka ni kiwike lokoa tobou meki-kitameka Ali Muno-pala one Keraisu-palaka poi topato wa poi kibutuai toniki wa Depidiyo wia mekapianeya.*

**27** Eina wia mekapiane toa etene taatekadeko. Nipa nekele takama pomotoa takoa moa kakapikago Yesu itonoke nokale Erode Podiase Pailaseta pa yatene-kiti-pala Iserele yatene-palaka koukoa mekete one wia tukatekoi oi pedoa pikoina. Tone i Yerusalem take koukalogoa nitikoina.

**28** Enile tokoinapa Akolali ne tele tootapeneyea meke wene toopikanakale taatekoa tokoina.

**29** Eni yenamne toto tete meatekoi agale qmoa okoinano, neke pupu yene toto piti moameneyea kakete nekemo atiki toa akoono, auapeano ta.

**30** Nipa nekele takama pomotoa moa kakanakago Yesu one ibini patu kautakoa kakete yene tane ali atoa latekoa ele kule telekole toma poono, auapeano ta wa kowitoa meaneya.

**31** Nitoa kowititikoa mekoli kiwi oboa mekoi yapu muku muku tootapekale Epetane Yomini kiwike awia tagatapeneyea. Nitikale peyame Akolaline agale i i wa piti moameneyea kakete toawea akaneya.

*Yesuno Ali Atoame Kinikiya Moke Tanemo*

<sup>32</sup> Yesunomo yakoa motane yene peya odene wene-kama pianeya meapa kinikiya-kiti anukuya mati wa wamato, odeneya pikoa mekete moke tato wa tatikala taneya.

<sup>33</sup> Aposelo ali-kitamepa padele padele telekole toma yakete Ali Muno Yesu tua pokale Akolaliyo moa kamotokanemo wedoa oma yakoli Akolaliyo pewe-kama wia yopia kakeneya.

<sup>34</sup> Nitaneyake Yesuno ali atoa ponopeneya mekileka toameneya. Nipa itono pine yenameka yapu pine yenameka kini itono yapu eya topo toa kue moomotekete

<sup>35</sup> Aposelo ali-kitike aua pokala tokolipa padeya toameneya pa mekoi ali atoa moke toa tatikakala taneya.

<sup>36</sup> Saiperase take Lipai yatene ago Yosepeyo einakale taneya. Einagopa Aposelo ali-kitame Banabasi wa ibini akeneya. (Banabasi wapa ali atoa wene weye akakago wa ekete akeneya.)

<sup>37</sup> Einagome one itono pade topo toa kue moomotokome Aposelo ali-kiti mekoita aua pome meetapeneya.

## 5

*Ananaiasi Sapairatame Toa Potokanemo*

<sup>1</sup> Pade ago Ananaiasiyo one natono Sapaiara-pala oi pedoa pikana toa tokome itono pade topo toa kue moapa kue padeka *tēia* moa one wa pa pikoa pianeya.

<sup>2</sup> Nitaoapa keku kue Aposelo ali-kiti mekoita aua pome mepaneya. Nipa kue peya aua nome metane tetepo takoa taneya.

<sup>3</sup> Nitikale Pitayo okome Epetane Yomini-pala kapene wakake kue padeka *tēia* moa pikoa piake peya iya auane nuku wa wini okopa Setanuyo eni poane wene edekale moa lukamotoa toka-pe.

<sup>4</sup> Eni itono wete topo toameneka nekeya-kama pianeya. Nipa eni itonomé topo toa motoka kue peya pa pikoane meada wa wene pioo tokapa itonoka kueka nekeya-kama tokome oyake pikoa kawoo toka. Neke kapene wakateka oipa edeyake pedoa pikato-pe. Neme kapene wakoa ikilepa pa ali-kiti toto-pala wamoka. Akolali-palapa oka wa Pitayo okale

<sup>5</sup> yatekome eina eina one kakata aua witipitakome tuaneyea. Nitaneyake einago-pala tanemo yatekoi peyame ekee wa piti tuuloganeya meaneya.

<sup>6</sup> Nitaneyake tuali-kiti nekete tukanakago katekamoa maminame ewetemotekete aua pote oloyo topaneyea.

<sup>7</sup> Lou pini tebolo tadiya ponotokaneyake natonoka onekane-pala tanemo yakameneya atiki toa nekeneya.

<sup>8</sup> Nokale Pitayo yatekome okome kini itonomé topo toa motokoi kuepa nekaneyo kotu kakoa aua noka-pe-kale okome *ēeno*, eni kue peya aua nokome toka-kale okome

<sup>9</sup> Epetane Yomini-pala kapene wakoa enatekoi oipa edeyake pedoa pikoti-pe. Nekane oloyo topokoina tuali-kiti wakapea note a kago ludu kakete ikino, yaka. Neeka dikoa aua pote oloyo topoai wa okale

<sup>10</sup> eina eina natonoka one kakata aua witipitakome tuaneyea. Nitaneyake eina tuali-kiti nekete

ina atoaka tuadeko wa moa aua pote odene oloyoke lewitikatakutukoa pipaney.

<sup>11</sup> Nitaneyake Yesunomo yakoa motane yename ete ali atoa peyameka enimo yatekete ekee wa pitime tuuloganeya meaneya.

### *Aposelo Ali-kitame Toma Yakenemo*

<sup>12</sup> Aposelo ali-kitame padele padele telekole toma yakilepa Akolaline tele patu kautakoa kakete tadikiwa ali atoame ką oa kamotoa taneya. Yesunomo yakoa motane yene peyapa tobou losu yapu keneke Solomono wa yomini kayo oa ibini akene lono oboai taneya.

<sup>13</sup> Ete yename eni yene-pala lipua meadete piti moteketeke ke ke wa kiwi kei pikala taneya.

<sup>14</sup> Nitoapa pade ali atoa Ali Muno agoke wene tugaketepa one agale yakoa motane yene-pala lipuai lipuai taneya.

<sup>15</sup> Enika enile tanelekepa ali atoame kini yene pitane-kiti moa akolono aua pote ka ludu tomo tattiamekakala taneya. Nipa Pita one yomini takoa ponokale latoa poi wa moa mekakala taneya.

<sup>16</sup> Yerusalem ta liti piane take pitikoi ali atoameka yene pitane-kitika ipono awitaneya mekete tete mokoa kakene-kitika koukotukoa aua nokoli peya epetekatapeney.

### *Aposelo Ali-kitame Tete Motanemo*

<sup>17</sup> Aposelo ali-kitame nitima yakoileke ako odene mekome Akolalike lodo yotokoai tane tobou agomeka one Sadusi oyali-kitameka eya taneya. Ali atoame kiwi tewitikoa Aposelo ali-ki litiei wa wene poaney mekete tekete

<sup>18</sup> Aposelo ali-kiti dekoa moa po yapu pitika-paneya.

<sup>19</sup> Nitaneyake likonu Ali Munoyo moa wetekane edelo ago nokome po yapu kago pea Aposelo ali-kiti akolono aua pokome okome

<sup>20</sup> ali atoa mea kama poatiki totono wenele toatikimo-kama tobou losu yapu pote olauka-pamene wa oa pekeneya.

<sup>21</sup> Nitikale ta pene patakaka edelo agome oka toa tekete tobou losu yapu pote olaukoakakeneya.

Nitaneyake ako odene mekome Akolalike lodo yotokoai tane tobou agomeka one oya-mikitameka ete Kanosolo ali peya kouko noe wa moa obokaneya. Iserele Kanosolo ali peya eni kouko mekete ekete po yapu pitiki Aposelo ali-kiti enemotokapoe wa poyo ali-kiti moa wetekaneya.

<sup>22</sup> Nitikoli pekete enekoli po yapu meameade-ekoli enekete wakapea nekete ekete po yapu kago loko pitikoa keteaneya kakale enekoo.

<sup>23</sup> Ni kago yopia kakoina ali-kitame e kago akolono nepikoa kakoli enekoo. Nitoa kago pea enekolo padeka meameadeka wa akeneya.

<sup>24</sup> Nitikoli tobou losu yapu talo tane ali-kiti yopikagomeka Akolalike lodo yotokoai tane tobou ali-kitameka edoa pokoti patu wa wene kibutukoa mekoika

<sup>25</sup> pade ago nokome okome kime moa po yapu pitikakoina ali-kitipa tobou losu yapu kunu kakete ali atoa olaukoakakinwa onaneya.

<sup>26</sup> Nitikale tobou losu yapu talo tane ago one poyo ali-kiti-pala opia pokome Aposelo ali-kiti moa Kanosolo yapu aua nekeneya. Nipa ali

atoame kue katekamoaa witikaya wa piti motekete tekete poti moa aua nekeneya.

<sup>27</sup> Aua note Kanosolo ali-kitane lene yoto moa kakakoli eyago ako odene mekome Akolalike lodo yotokoai tane tobou agome okome

<sup>28</sup> Yesunomo wa pade olaukameamene wa totome oa tukakoonake onekemo Yerusalem take oa pupitikatapeadiki. Nipa Yesu wia tukanepa toto aukakala toa ni iki wa okale

<sup>29</sup> Pita-loeme ete Aposelo ali-kitameka ekete tone Akolaliyo ta wa okole-kama litia toono, pa ali-kitane wene litiamoo.

<sup>30</sup> Tone kaua-mikiti yopikago Akolaliyopa Yesu tuaneyaa pikata moa kamotokaka. Kime yomo lekaneyake wia dekoaa tukakolika moa kamotokaka.

<sup>31</sup> Nitaoapa ali atoa toa momotoa tokome oneke lokoa Ali Muno latikoa one nimini yono kounoke moa kakaneya. Enipa Iserele yenane poanele toma yakoike po letumekakouna keetaapeane waou wa taneya. Nipa tepe kolotini pekoaa pikolipa nitou wa taneya.

<sup>32</sup> Kipala i okopa Aposelo ali-kiti tone leneme enekoomo oko. Epetane Yominiyoka enimopa wene takakala toko. Akolaliyo one agale litia tiki yeneke awia memotoa wetekane Yominike oko wa Aposelo ali-kitame akeneya.

### *Kanosolo Ago Gamalieleyo Akenemo*

<sup>33</sup> Aposelo ali-kitame enimo okoli yatekete e Kanosolo ali-kiti kotimi wene mati luaneya tekete kiwi wia tukadete akeneyake

<sup>34</sup> Kanosolo ago pade Gamaliele wa ibini akene agome eya taneya. Einagopa Parisi ago Mosesene

totono pine toa olaukakago ete peyame kei piane ago kamokakome okome i ali-kiti akolono tekei meati wa moa wetekoe wa okale

<sup>35</sup> wetekakoli okome Iserele ali-kiti kipala i ukumo yakoe. Ina ali-kiti-pala toateko oipa poti pedoa piato. Kini toma yakilepa kinikile tiki patu, Akolalinele takaki patu.

<sup>36</sup> Namolo eya ago Tiudasiyo tube ago i kakuno, noe wa poi kamotokakale ege kadukaka ketepome kadukoa kakoa (400) ali-kiti one lono takoa pokoi. Nitikolipa poi keneke poyo yename einago wia tukakete one agale litia tane ali-kitika wia tadekatapekoi.

<sup>37</sup> Naniko Galili Yudaseyo eya toka. Ali atoame takesi kue pitikamotoa kini ibini bokuke wia mekane-pete Yudase kote tokale okome itapa tepe kikono, poadwa ete takoa pokome ali atoaka wia lokoa iyawea aua poka. Nitikale poyo yename einago wia tukakete one agale litia tane yeneka wia tadekatapekoi.

<sup>38</sup> I Aposelo ali-kitipa kini tikile pa kini weneme tadekolipa wete edikoa tadatapeoino, toa kamotonoe toe.

<sup>39</sup> Kini tikilepa Akolali patu kautakoa kakete tadekolipa kime oyake ketekamele toamoo. Nipa Akolali-palaka dekoa poi teigete toi wa Gamelieleyo akeneya.

<sup>40</sup> Nimo okale yatekete ete Kanosolo ali-kitame ekete nitoono ta wa eina Aposelo ali-kiti noe wa kayo oa motekete eya taneya. Layo tiginame wiati wa poyo ali-kiti metekoli witikoli wa motekete ekete Yesuno ibini patu kautakoa kakete onekemo wa pade wameamene wa wetekaneya.

**41** Nitikoli Kanosolo ali-kiti mekoita tewitikoa pekete wedikete ekete eina witikoinapa Yesuno ibini wedekoa onekele takakoonakaleke totome oyake ya momotoa Akolaliyo ni tadeko wa pekeneya.

**42** Nititikaneyake ta pataka abuna tobou losu yapuka kini kini yapu luduka obopokala tekete Keraisu Yesunomo one epetane ko i i wa oma yakeneya.

## 6

### *Ali Tatono Kakoa (7) Takoa Moa Kakanemo*

**1** Einapete-mene ali atoa kainya matiyame Yesunomo yakoa mootokoa one yatene-pala lipuai lipuai taneya. Yesuno yatene eni tubetema pekene-pete Geriki agale yakoa akene Yu yename lberu agale yakoa akene Yu yene-pala ko oa kakete ekete ta patako abuna nee eya tatia meteketepa tone nepo atoa wanakala tiki wa wene pokete akeneya.

**2** Nitaneyake Aposelo ali-kitame Yesuno agale yakoa motane yene peya noe wa moa obokoa mekete ekete toto Aposelo ali-kitame kini nee eya tatikadetepa Akolalinemo olaukhoa wamele toamokono,

**3** nee eya tatikamotoapa kini oyali-kiti tatono kakoa (7) takoa moamene. Nipa Epetane Yomini awia tagatapeneya mea epetane peku noa tikileke ete-kitame kei piki ali-kiti takoa moamene. Nitikolipa toto luku kakete nee eya tatikamene wa totome moa kakatekoapa

**4** eni pa pupu wa toameneya Akolali kowitoa mea Yesunomo oma yawa too wa Aposelo-kitame akeneuya.

**5** Nitikoli peyame ke wa wedia mekete nee eya tatikatekoi ali-kiti tatono kakoa (7) takoa motaneyaya. Einali-kiti dikoa. Panago Sitipene einagopa Yesuke wedoa wene tuga meane ago. Eingoke Epetane Yomini awia tagatapeneyaya. Ni Pilipi ni Perokorasi ni Naikena ni Taimone ni Pamena ni Nikolasi. Nikolasi einagopa Adioke take pa yatene ago meake Yu yene-pala lipuaneyaya.

**6** Ete yename o ali-kiti takoa mootokoa Aposelo ali-kiti mekoita aua pokoli Aposelo ali-kitame Akolali kowitoa yono pianeyaya.

**7** Nitaneyake Akolaline agale oa pupitikat-apeneyaya. Yerusalem ali atoa peya matiyame Yesunomo yakoa mootokoa one yatene-pala lipuai toa kakeneyaya. Akolalike lodo yotokoai tane ali kainya matiyameka Yesuke wene tuga mea onekele takama pekeneyaya.

### *Sitipene Dekoa Motanemo*

**8** Sitipene einagopa Akolaliyo pewe wia tagatapekale one tele patu kautakoa kakome telekole toma yakale enekete ali atoame ekete padameka toamatikilepa i tokono, enatoe wa k<sup>q</sup> oa kakeneyaya.

**9** Nitaneyake Libetine wa ibini akene losu oboai tane ali-kiti Sitipene-pala wene poaneyaya mekete one-pala agale toonali yoa kakeneyaya. Eni losu oboai tane Yu ali-kitipa eya ta-mene Sairini Alessaderia Silisia Esia enika eni ta kawa nekeneyaya.

**10** Eni yename Sitipene moa patukadete wili toa kawa teko tokale wakeneya. Nipa Epetane Yominiyo wene takakale agale muno pewe kakoa oa kakale tokome one moa patukamele toameneya.

**11** Nitaoapa kapene wakoa oatekoi ali-kiti tuku toa kawa motekete kue laukakete ekete i agomepa Mosese Akolalitake poane agale okale kime yatekoo wa akoa amene wa kue metaneya.

**12** Nitikolipa eina kapene wakoa agale okoli yatekete ali atoaka tobou ali-kitika Mosesene totono pine toa olaukane ali-kitika wene pokete kamotokoa Sitipene kakata pote dekoia moomotekete Kanosolo ali-kiti koukoa mekoita aua pekeneya.

**13** Nitaoapa eina kapene wakoa oatekoi ali-kiti Kanosolo ali-kitane lene yoto moa kakakoli kapene wakakete ekete i agomepa tone Akolla-line takoa wikakakoona tobou losu yapukeka Mosesene totonokeka poane agale oma yako.

**14** Eya waka okale yatekoo. Nasarese Yesuyopa tone tobou losu yapu k̄awea tadekatapea ni toto Yu yename litia toateko totono Moseseyo yametane totono katekoa weneya totono yamea too wa i agome okale yatekoo wa akeneya.

**15** Nitaneyake Kanosolo yapu mekoi peyame Sitipene nepikakoli one lene timinipa edelo agono lene timini tetepo tootapekale enaneya.

## 7

*Sitipeneyo Kanosolo Ali-kiti-pala*

*Akenemo*

<sup>1</sup> I agome dika dika wa kapene wakoa okoli yatekome eya ago ako odene mekome Akola-like lodo yotokoai tane tobou agome Sitipene yatekome okome i yename neke tanemo-kala ikino, nimini ikiti-pe-kale Sitipeneyo okome

<sup>2</sup> atai ame-lawe agale padə oane metekuno, yakoe. Tone kauago Eberame Arane take wete ṭoa pome mepameneyake one opiane ta Mesopotemia ta pa eida mekalepa pa teleta tootapeneya meko Akolali pono yamenokome okome

<sup>3</sup> ne yemeateku take mepoano, nekameyomikiti tewitikoa neke ta-pala ṭoano pa wa akeneya.

<sup>4</sup> Nitaneyake one Kaledia ta ṭoa pome Arane take mepaneya. Oneketai eida mea tukalepa Akolaliyo wini ta ṭoano pa wa okale tewitikoa kiwi i pitiki take nome menaneya.

<sup>5</sup> Einata einapete Akolaliyo one itono nateya dedeyaka yameameneyake okome naniko neeka neeke ṭaamoa pokoi yeneka eni take meo wane mekoane yameou wa Akolaliyo oa pianeya. Eberameyo one mati odeneka wete opiameneyake ni akeneya.

<sup>6</sup> Nitikome okome neeke ṭaamoa pokoi yenepa mone take pote mepokoli eni ta pine yename kinikile-kama takamotoa kiwi tika tika toa tete mea toi. Nitikoli mali ketepome kadukoa (400) ponoka toa pa edikoa meku pekete toi.

<sup>7</sup> Nitoa mekoli enekene kiwi yopikoa potokakoi yene kibu motokakolupa neeke tamā pokoi yenepa eni mone ta tewitikoa oto wakapea note mekete anukule takama yawei wa Akolaliyo

Eberame-pala oa pianeya.

<sup>8</sup> Nitoapa ne yatene auapeouno, dikamene wa oa togotokome one eina auapekome toateka adeka pikome ali yatene kepene teigakete toatekoile yametaneya. Nitaneyake Eberameyo Aisake opia pikome ketepo kakoa (8) ta patakapete matiyane kepene teiganeya. Aisakeyoka mana Yekobe opia pikome einakale taneya. Yekobeyoka one ali mati tuku kakoa (12) opikomekama einakale tokala taneya.

<sup>9</sup> Wa naniko tone kaua-mikiti Yosepe-pala wene poaneyea mekete eya taneya. Idipi take panagono pupu-kama takamotoa dekoa moa topo toa kue motaneya. Nitaneyake Akolaliyo einago Yosepe mama moa yopikoa kakome

<sup>10</sup> tete motane-pete-kama toa mokala taneya. Nitoapa Idipi ako odene meane tobou ago Perouyo i ago Yosepe wene muno kakene ago tadeko wa wene tomotoa tokome one peku lawetekala taneya. One eni peku noa toma yakale enekome Perouyo one Idipi ta one yapulu yene peya neme yopikoa kamene wa oneke lokoa tobou ago moa mekaneya.

<sup>11</sup> Wa naniko Idipi Kenane tatake kobu igi nokamatiyame ali atoa kobume tukete welea meaneya. Tone kaua-mikitameka kini noatekoi neepa pi-amokale tuku tokoa kawa teko tokale wakeneya.

<sup>12</sup> Nitoa mekete Idipi take nee pade piko wa okoimo kugu yatekome Yekobeyo one manamikiti Idipi take noatekoo nee topo toa mopoatino poe wa wetekakalepa tone kaua-mikiti enipete titimoa Idipi take pekeneya.

<sup>13</sup> Wa taku takoapeta Idipi take pokoli Yosepeyo

one Yosepe kaku wa one ibini t̄oawea akeneya. Nititikaneyake Idipi ako meane tobou agome inapa Yosepe yatene nekete tadiki wa wene taneya.

<sup>14</sup> Nitaneyake Yosepeyo etene Yekobe laine wamene-mikiti peya noatino noe wa agale oa wetekakale keti note menaneya. Eina yene kakoi toa oi motokolipa ege odepeta kadukoa wa timini mukitini patukoa padeka pagini (75) kakoa ali atoa kakedekoi.

<sup>15</sup> Yekobe Idipi take eida nome mea tuaney. One mana-mikitika eida mea tukala taneya.

<sup>16</sup> Tone kaua-mikiti eida mea tukala taneyake kini tigini leyo leyo toa ta pine lono Sekeme take aua pote tuane ali atoa piai tane kotake pipokala taneya. Eina kotapa Eberameyo Emono mana-mikitaneke kueme topo toa motaney.

<sup>17</sup> Akolaliyo Eberame-pala neeke t̄awateko yatene auapekene ile tou wa papete oa piane agale wete taatekameneyake tone kaua-mikiti Idipi take eida t̄amoata nekeneya. Wa naniko one einagale taatekateka tigotokalepa

<sup>18</sup> Yosepe wene toamene tobou agome Idipi ta yopia meaneya.

<sup>19</sup> Einagome toto yatene oa yotokoa talo toa potokaneya. Nipa kini mati-kitipa tumotono, opitikoa paka lono pote pipokala toe wa tone kaua-mikiti tete motokoa kakeneya.

<sup>20</sup> Einapetepa pade adoname koniyo mati Mosese opikete akolono pipameneyaka kini yapu tokene teboloke pa ukoa mekete adu lawetaney.

<sup>21</sup> Wa naniko akolono moa pikoli Idipi ako tobou agono koname enamutukome one mana mati latikoa tubetekaneya.

<sup>22</sup> Nitikalepa Idipi take mane luane-kitame kini peku-mene ya<sup>amoa</sup> lawetekoli noa tokome agale muno kakoa oa padele padeleta wene toa toma pekeneya.

<sup>23</sup> Mali timini mukitini patukoa padeka noi kakoa (40) ponokale Mosese one Iserele yeneke ugu pou wa wene pia meaneya.

<sup>24</sup> Nitoapa ugu pokome enekale Idipi agome Iserele ago witikale enekome Iserele ago auapekome Idipi ago kibu motokoa wia tukaneyya.

<sup>25</sup> Nipa one yenamepa no i agome kiwi toa momotoa Akolaliyo moa kakapiadeko wa wene tikino wene pikome taneya. Eni wene pikanake one yatename wene taneya mena.

<sup>26</sup> Wa podolikama Mosese eida wakapea pome enekale Iserele agota takuta poita tootakutukoa kakoli enekome okome anu oyata kita wameneta edeyake tete meetakutukoa kaki-pe wa kawikoa enaneyya.

<sup>27</sup> Nimo okale tete metane agome Mosese-pala wene pokome ete pedekakome okome tota yopia ka wa teyo okale teke toko-pe.

<sup>28</sup> Neme abela Idipi ago pade wia tukadeko toa noka opi wia tukade oko-pe wa okale

<sup>29</sup> Moseseyopa abelana tokounakamo peyame yakatapeadiki wa piti tokale Idipi ta toa pekeneya. Nitoapa Midiane take toa pome mekome one matita takuta eida opia kakaneyya.

<sup>30</sup> Mali lene timini togoikoa padeka noi kakoa (40) ponokale eya taneya. Mosese Kati Sainai tono liti ali piamene take pome meane-pete de yomo deyake toe itipono okoa kaka pakeke edelo ago pade pono yamenokale

**31** enekome wene kainya pianeya tokome pinele pome enepaney. Nitoa pome yatekale Akolaliyo agale okale yakaneya.

**32** Yakakoa kakale Akolaliyo okome okome neke kaua ali-mene Eberame-loe Aisake-loe Yekobe-loe einago-mene yopiane kaku Akolali no i kakuna wa okale yatekome tokome enamene piti tokale kolu kolu moa kakeneya.

**33** Nitoa kakale okome ne wini kakotapa tipi tanetano, neke kawa yene kotokoa pia.

**34** Eya wane ukuno, yaka. Anu yatene Idipi take tete moa kakili enoane komoka oa kakili yakoane tekene toane moadene i nukuno, opi nepa Idipi take wakapea poano pa wane ne moane wetekada wa Akolaliyo akeneya.

**35** Mosese einagopa one yatename wakete ekete toto yopia koiso akoa ta wa teyo okale teke toko-pe wa wakene ago. Ni agome toto yatene toa moa talo tomotoa tokome Akolaliyo takoa moa Idipi take eni wetekaneya. Einapa Akolaliyo one edelo ago Mosese kakota imo akapa wa oka toa pome yomo deyake toe itipono okoa kaka pakeke kakome akaneya.

**36** Nitane yake padele padele telekole ali atoa wene kainya pikanele toma pokome one yatenet Idipi ta tewitikoa aua pokome Kiane Ue ketoa ali piamene take aua pekeneya. Nitoa ali piamene ta ludu aua yakilepa mali lene timini togoikoa padeka noi kakoa (40) ponoka toa padele padele telekole toma yakome taneya.

**37** Mosese einagomepa Iserele yene-pala papete oa pikome okome Akolaliyo no takoa moa kakakana toa tokome kiwi pakeke meka ago pade

one agale akamotoa takoa moa kakoo wa oa pi-aneya.

<sup>38</sup> Mosese einagopa ali piamene take ali atoapala koua meaneya. Ni Kati Sainai tonoke agale akanane edelo ago-pala opia kakeneya. Ni tone kaua-mikitipala koua meaneya. Ni ne yatename yakamotono ta wa Akolaliyo toto mea kama pomotoa toko agale i i wa Mosese yametaneya.

<sup>39</sup> Mosese nitane agoke tone kaua-mikitame one agale litia toameneya. Nipa kini wenepa Idipi take pianeya mekete one wakeneya.

<sup>40</sup> Nitoapa Erone-pala ko oa kakete ekete toto Idipi ta tewitikoa aua yakanakago Mosesepa Sainai tonoke kawa kakono, one-pala tokale agopa tokono, tuko patu, tuamoko patu. Tone kowitateko gode-kiti latikoano ta. Nipa i ta ludu namolo kakoa toto aua yawatiki gode-kiti adeka pia yomini latikoano ta wa akeneya.

<sup>41</sup> Einapetepa eina yename pitimekawe kai tine yomini latia kakakete Akolali tetepo takoa padeya-kiti aua note mea lodo yoai taneya. Nipa kini yoname latikoinakeyake ke ke wa wedia kakeneya.

<sup>42</sup> Nitaneyake Akolali mukiti yamea mekomepa eina yename a tibuke kakene lou tokene eya ete-pea kowitima pomotoa wakeneya. Einapa Akolaline agale akane ago padame eya wa wia mekane toa taneya.

*Iserele yene kipala ukumo yakoe. Mali lene timini togoikoa padeka noi (40) kakoake ali pi-amene ta ludu pima yakete kini pitimekawe kai sipi sipi kai eya wia lodo yoma pokoi. Eni lodopa nooke yotokoiya mena.*

*43 Moloko einagono mamina yapu latia aua yakete eina yapu keneke lodo yoai tokoi. Ni kini kowitiko ago Lepane one tagoi tibuke a kakona wa one tagoi adeka pia yomini latia aua yakoi. Moloko Lepaneta kowitato wa kini yominike lodo yoma yakoinano, kini ta pine lono ete takoane lititapeane Babilone take ete moane wetekou wa Akolaline agale akane ago padame wia mekaneya.*

*44 Tone kaua-mikiti ali piamene ta ludu pima yakete meme kai kepeneme latiane yapu-pala aua yakeneya. Nipa Akolaliyo Mosese kotua ko oai tane yapu-pala aua yakeneya. Eina yapupa Akolaliyo Mosese-pala adeka pia akene toa latianeya.*

*45 Eina yapu-pala aua yawa tua pekete kini mana-mikiti laukoa pekeneya. Wa naniko Akolaliyo Kenane take pitane yatene-kiti ete takoa lititapekale tone kaua-mikiti tobou ago Yosuapala Kenane take pote awia meketepa eina yapu-pala aua pote kakapaneya. Nitoapa kini mana-mikiti eida opia kakoa tuma note wipitiketepa Depidi opiane-peteka eina yapupa eida pikoa kama pekeneya.*

*46 Einago Depidi Akolaliyo pewe wia yopikale okome ne mateko yapu oyake wikakou-pe wa yatekale*

*47 Akolaliyo neme mena wa akeneyake mana Solomono one luku tobou ago mekome wikakaneya.*

*48 Nitaneyake Ali Muno Akolalipa alime wikakane yapu mekilepa toamoko. Enikepa Akolaline agale akane ago padame Akolaliyo okamo wia mekakome okome*

*49 Tibupa anu tene pogakoane mekuya. Itonopa anu kawa pogakoane mekuya. Anu edeya yapu wikakadete iki-pe. Alime wikakane yapu kenekepa no edoane memotoa-pe.*

*50 Tibu itono enika eniya peya anume-kama latiane pikouya.*

Eina akenepa Akolaliyo papete akenemo uku wa Sitipeneyo oa kakeneya.

*51 Nimo ootokoa Sitipeneyo e Kanosolo ali-kitipala okome kepene teigamene pa yatene meki toa kini kabe ko akameneya meki. Nipa kini kauamikitame tane toa kimeka Epetane Yomini ete pedekakala tiki.*

*52 Kini kaua-mikitame Akolaline agale akane ali peya padeka katekameneya tete memakala nekeneya. Ni wene kiyo akeneya-kama meko ago noatekamo tqawea oa piane ali-kitika wia tukama-kala nekeneya. Einago taatekoa nokalepa one wia tukakoe wa mone yenane yonoke kime moa pikoina.*

*53 Akolaline totonopa one edelo ali-kitame papete tqawea akoa metaneyake kime pikoa kaketeke litia toamekete enile tokoina wa Sitipeneyo oa kakeneya.*

### *Sitipene Kueme Kaua Wia Tukanemo*

*54 Sitipeneyo nimo okale yatekete e Kanosolo ali-ki kitimi yotokoi matiyame one-pala eei wa kime kolukoa kakeneya.*

*55 Nitikolika Sitipenepa oneke Epetane Yomini awia tagatapeneyya kakome tibu ate nepikakale Akolali tele pata tootapeneyya kakale enoa ni*

Yesuka one nimini yono kounoke kakale enoa taneya.

<sup>56</sup> Nitikome okome tibu kene peaneyā pikolo enoane ni Ali Yatenane Oyago Akolaline nimini yono kounoke kakolo enoane tukuno, enoe-kale

<sup>57</sup> e yename agale tayo ootapea kini kale kene yoname ketekoa one unukamo deko motaneyā.

<sup>58</sup> Nitoapa Yerusalemē ta kago ketepono patukoa lia pitikakete kueme kaua wia tukaneya. Nipa i ago Sitipeneyō Akolali taumada toa okale yatekoo wa ahoa akene ali-kitame one wia tukadete kakete kini tokoo kakene mamina kotokoa pala pitikaneyā. Nipa tuali pade Solo wa ibini akene agono kawane pala pitikaneyā.

<sup>59</sup> Nitikakoa Sitipeneyō kowitikome okome Ali Muno Yesu neeke nukuno, anu yomini moa ta wa kowitzitikoa

<sup>60</sup> neuwe tukuketikakome agale telo okome okome Ali Muno i yene kini i poanelē tikileke nami wia kibu motokameamene wa ootoko atu piou toa tukome tuaneyā.

Eni yename Sitipene wia tukamotoa kakome eyago Solo kipala odene wene-mene pia kakeneya.

## 8

### *Soloyo Yesuno Ali Atoa Tete Metanemo*

<sup>1</sup> Sitipene wia tukane ta pataka-pete eina eina titimoa ete yenamepa Yerusalemē take Yesunomo yakoa motane-kiti dika dika toamene tete meai taneya. Nitaneyake Yerusalemē ta toa Yudea

Sameria tata piko peyake tadoa pekeneya. Nitaneyake Aposelo ali-kiti toa poamekete pa eida meaneya.

<sup>2</sup> Nitikakoa Yesunole wedoa takama yakene ali padeka-kitame Sitipenene tigini moa aua kotake pipekete oneke komo kāta pitikoa kakeneya.

<sup>3</sup> Solo einagome Yesunomo yakoa motane yene wiane atukou wa wene pikome kini kini yapu yapu mekoi toa tuku toma pome enamutukome akolono lia pitikoa alika atoaka po yapu pitikakala taneya.

### *Yesunomo Sameria Take Oa Pupitikanemo*

<sup>4</sup> Yesunomo yakoa motane yenepa Yerusalemeta toa ta piko peyake tadoa pekete Yesunomo mo wima pekeneya.

<sup>5</sup> Pilipi oneka Sameria take pokome Keraisunomo i i wa mo wia kakeneya.

<sup>6</sup> One eni okamo yakoa one telekole tokale enoa tekete ali atoame one oka agale wedoa yakakoa kakeneya.

<sup>7</sup> Einata einapete ali atoake awitane ipono-kiti kā akeneya takoa pokala taneya. Ni kawa yono tau taneya meane-kiti ni kawa okeaneya meane-kiti kainya mati epetekatapeneyea.

<sup>8</sup> Nitaneyake Sameria take pitikoi ali atoa wedia kakala taneya.

<sup>9</sup> Sameria takepa Saimone wa ibini akene ago meaneya. Einago koto mati otoi ago mekome taneleme ali atoa wene kainya pikakala taneya. Einagopa ibini akene ago kaku wa mate okala taneya.

**10** One nitane ago tokale kamo yene ponopene yene peyame ekete i agopa Akolali keneyano, Akolaline tele patu kautakoa kako wa one okagalekama wedoa yakakoa kakala taneya.

**11** Nipa koto mati otoi ago mekome taneleme kini wene kainya pikanya tokome one agale wedoa yakakala taneya.

**12** Wa naniko Pilipi eida nome mekome eya epetane ko Akolaliyo ali atoa talo tokome toko ko ni Yesu Keraisuno ibini oa mekala taneya. Nitikale yakoa motekete ali atoa peyame ue mokala taneya.

**13** Saimone einagomeka Pilipiyo okamo yakoa moa ue mootokoapa Pilipi pokaka litima pekeneya. Litima pome enekale padele padele telekole toa ali atoa wene kainya pikoa tokale enekome wene kainya pianeya meaneya.

**14** Aposelo ali-kitipa Yerusalem take eida pa meketepa Sameria yename Akolaline agale yakoa motokoi wa akedekoimo yakatekoia Pita Yoneta takoa moa Sameria take poatino poe wa wetekaneya.

**15** Wetekakoli note meketepa Epetane Yomini eni yeneke awinome memotoa kowitikaneya.

**16** Nipa papete eina yename Yesuno ibini wedekoa ue motaneyake Epetane Yomini kiwike wete awinameneya tokome ni kowitikaneya.

**17** Nitoa kini mataike yono pikoli Epetane Yomini awinaneyea.

**18** Aposelo agotame eni yenane mataike yono pikoli Epetane Yomini awitikale enetekoa Saimoneyo einagota kue metekome okome

<sup>19</sup> kitame wini telekole tiki toane toada. Nipa anume takoane mataike yono pikou-kitike Epetane Yomini awinomotouno, yameatino toe wa kue metaneya.

<sup>20</sup> Nitikale Pitayo okome neke kue-pala aua ipo-nane poane take pamene wane uku. Epetane Yomini Akolaliyo nami kakameneya pa mekala tokoyake neke kueme topo toane mou wa neme wene pika tokolo ni uku.

<sup>21</sup> Akolaline leneke wene *kiyo* wameneya kake tokanano, Akolaline pupu tota-pala odeneka takama yamele toamoko.

<sup>22</sup> Wini poanele tokake Akolaliyo po letumekakana oneme kea mitikademe toko patu. Kea mitikakamotoa toa enoano, neke wini poane wene wia wawa one kowitamene.

<sup>23</sup> Ae, neke tepene poane wene mati alat-apekome nime ne labakome tadeko wa Pitayo okale okome

<sup>24</sup> poanele tekene tadekuno, neke wini okole-kti nopala takayano, Ali Muno kowitikamene wa akeneya.

<sup>25</sup> Nitaneyake Pita Yonetamepa Keraisuyo toma yakale enekoinakamoka Ali Munono agaleka mo wima yawa peya takamotekete eni ta tewitikoa Yerusaleme take wakapea poadete pekeneya. Nitoa Sameria ta ludu pekete ali atoa pitikoika Yesunomo oa mekutu toma pekeneya.

### *Pilipiyo Isiopia Take Tobou Ago*

#### *Yesunomo Pine Toawea Oa Metanemo*

<sup>26</sup> Wa naniko Pilipi Sameria take eida pa mekakoa Ali Muno agono edelo ago Pilipi mekata

nokome okome wete kamokoa pa. Yerusalem take titimoa Gasa take keita witane bateteke pamene wa wetekaneya. Eni batetepa ali piamene ta ludu pianeya.

<sup>27</sup> Edelagome oka toa tokome Pilipi kamomotokome eni bateteke poademe pokome Isiopia take ago kotuaneya. Einagopa ibini akene tiobago. Isiopia take ako odene meane tobou atoa Kadesike lokoa tobou ago mekome einatoane kamoya peya yopikoa kakeneya. Einagome Akolali kowitademe Yerusalem take pome mepaneya.

<sup>28</sup> Pome mea kowitimotokome Isiopia take wakapea poademe pekeneyea. Nipa osi kaime lia aua pokaya waneke mea poademe pokomepa Akolaline agale akane ago Aisaiayo wia mekane boku lewea oi moma pekeneyea.

<sup>29</sup> Nitikaka Epetane Yominiyo Pilipi-pala okome eni osi kaime lia aua pokoya waneke mea ponokago kotua pamene wa okale

<sup>30</sup> teyapea kotua pokome yatekale einagome Akolaline agale akane ago Aisaiayo wia mekane agale oi moa mekale yakaneya. Yatekome okome neme wini oi motoko agalepa wene toko-pe-kale okome

<sup>31</sup> eni agale pine tqawea oateko ago pade enamukuyano, edoane wene tuku patu wa ootokoa mekome okome nopala odeneya mea patono, lewia meno wa okale nitaneyea.

<sup>32</sup> Nitoa mea enekale einagome oi moma pome tugane agalepa dikoa wia mekaneya enaneyea.

*Itoaweane uku agopa padame sipi sipi kai wiademe  
lia aua pou toa pade ali-kitame one wiadete*

*lia aua pekeneya. Sipi pipi kai tine pine pitukoa kakili agale wametekaneya pa kako toa einagoka agale wametekaneya pa kakeneya.*

**33** *Einago koiso akoa ya motokakoli padameka one kei piameneya. Itonoke mea togameneya pa tekei mekale po tewitikale pekeneyano, oneke tama pokoiyene i i wa teyo toawea omotoa-pe.*

Eni akenelepa wete tane tetepo takoa Aisaiayo papete wia mekapianeya.

**34** *Einagalepa tobou agome oi moa mekome tokome Pilipi-pala okome Akolaline agale akane agome teeke akeneya patu. Pinali oneke akeneya patu. Panagoke akeneya patu wane ne yatekene uku-kale*

**35** *Pilipiyopa einagome eina oi moma pome tugakata titimoapa Yesu ko oa meaneya.*

**36** *Nitoa batete ludu opia mea potepa ue meaneya liti witakete tobou agome Pilipi-pala okome ue i meadekono, ue mouno, anume ue momota padeleme ketekako patu-kale okome*

**37** *poome toameneya Yesuke wene tugoa mekepa oyake moamele toko-kale okome eno, Yesu Keraisu onepa Akolaline mana wane wene tuku wa ootokoa*

**38** *osi kai yopikago-pala okome no ponene meouno, osi kai witimoa kamotonu ta wa akeneya. Nitoapa eniya wanek mea katepitoa Pilipi-pala uele keti pome kakale Pilipiyo ue motokaneya.*

**39** *Ue motokakale Isiopia ago Pilipita ue matanuke ate pogatekoa pote kakoika eina eina Epetane Yominiyo Pilipi takoa moa aua*

pekeneya. Nitikalepa tobou agome Pilipi wa pade enamene ya one ta pine lono wedianeya pekeneya.

<sup>40</sup> Nitaneyake Pilipi Asedose take witakome eida titimoa pima yakomepa pitikali latia pitikoi ta piko peyake Yesunomo oa mekutu toma pome Sisaria take tugapaneya.

## 9

*Solo Yesuke Wene Tuganemo  
(Aposelo 22:6-16, 26:12-18)*

<sup>1</sup> Sitipene tuutukaneyake Ali Munono agale yakoa motane yene keteane wiou wa Solo kotimi yoa meaneya. Nitoapa ako odene mekome Akola-like lodo yotokoai tane tobou agomekata pokome eya wa akeneya.

<sup>2</sup> Damasikase takepa Keraisunole takama piki yene tuku toane enamutukene ali-kitika atoakitika po kakoane oto Yerusalem take liimoane auane nouno, enile toateku pipia pade eni take losu yapu yopikali-kiti yamepouno, pipia wia meano ta wa opaneya.

<sup>3</sup> Nitoa pipia moomotokome Damasikase take poademe tigotokakoa pokata odepeta a tibu laigoa toawineya noka pame one payapono pia unukakale

<sup>4</sup> itonoke aua pitalogakale agale ludu nokome okome Solo Solo nepa no edekolo tete mekala toko-pe wa okale yatekome okome

<sup>5</sup> Ali Muno nepa te kake oko-pe-kale okome neme tete mekala toko ago Yesu kakene ukuno,

**6** Damasikase take wete poke mepamene. Poke mekalepa neke toatekale panago nome t<sup>o</sup>awea onoono, wete kamoaa pa wa akeneya.

**7** Nimo okaka Solo-pala opia nekene ali-kiti witi-moa kakete agale wametekoa pa nepia kakeneya. Agalepa eina okake alika enaneya mena.

**8** Nitaneyake Solo kamokakome lene kikoa enoake one leneta liitapeneyea tadekale enamele toamokale tokome one oya-laweme yono moa aua Damasikase take pekeneya.

**9** Nitikoli nome mekale ta tebolo-peta lia patakale padeka enamene ya ue neeka wawa pa meaneya.

**10** Damasikase takepa Yesunomo yakoa motane ago pade Ananaiasi one eida mekata Ali Munoyo pule menokome okome i ago Ananaiasi wa okale okome nopa i kakuno, yakouno oano ta-kale okome

**11** eya yapu kiyo akeneya piko wa ibini akene batete kebonoke kako yapu Yudasene yapu poke eya wa yakapamene. Tasase take Solo neke i yapu nome meko-pe wa yakapa. Solo einago eni yapumekome no kowitoa mekome tokono, one mekata wete kamokoa poano pa.

**12** Solo einagome one pulete enekale panago one ibini Ananaiasi nepa one mekata nokome one lene wa kikoa enekamotoa yono piademe nokale enekano, one lene kikakapamene wa Ali Muno agoyo akeneya.

**13** Nimo okale okome ekee Solo einagome Yerusalem take neke agale yakoa motane yene dika dika toamene tete motokama yako wa akedekoimo yatekou.

<sup>14</sup> Ika Damasikase takeka ne kowitzoi tiki yene peya po kakoa po yapu pitikamotoapa Akolalike lodo yotokoai tiki tobou ali-kitame one pipia padé wia metekoli eni pipia-pala oto aua nekedeko wa okale

<sup>15</sup> Ali Munoyo okome wete poano pa. Einagopa noanume takoane motokou ago. Ni agome e ku pa yateneka kini ako tobou ali-kitika anu Iserele yeneka enika eni yene pitiki toa anu ibini i wa toawea oma pomotoane tekene takoane motokou.

<sup>16</sup> Nipa nooke toa dika dika toamene tete moma poatekoya one ooyamepiadene tukuno, one mekota wete pa wa Ali Muno agome okale

<sup>17</sup> yakamotokome pome one meka yapu keneke tuapea pome Solo enekome yono pikome okome ame Solo Damasikase take noade nokale ne pono yameteka ago Ali Muno Yesuyo wetekakolo nuku. Nipa neke leneta wa kikoa enoa Epetane Yomini awia tagatapeneya mea tomotoane nuku wa okale

<sup>18</sup> eina eina Solo one lene kidonome keneya ketekalogane toe takoa pitakale lene kikoa enaney. Nitoa kamokakome ue motaney.

<sup>19</sup> Nititikoa nee padé moa nakale popeyo nekeney.

### *Damasikase Take Soloyo Yesunomo*

#### *Mo Wia Kakome Akenemo*

Soloyo Damasikase take ta pataka-mene Yesuno agale yakoa motane yene-pala opia meaney.

<sup>20</sup> Nitoapa Damasikase losu yapu kako toa Yesu onepa Akolaline mana wa oma-kala yakeney.

<sup>21</sup> One eni okamo yatekoi peyame ekete ekee i agopa Yerusalem take Yesu kowitoai tokoi yene wia atukakanakago patu. Ikaka edikaki yene po kakamotokome Akolalike lodo yotokoai tiki tobou ali-kiti mekita liimoa aua poademe nokagomeke imopa i oko wa k<sub>a</sub> oa kakenuya.

<sup>22</sup> Nitaneyake Solo Akolaline tele patu wedoa kautakoa kama pokome okome Yesu einakago onepa eina papete Keraisu wa ibini oa piane ago tadeko wa onekemo pine tqawea oa kakale Damasikase take Yu yename one-pala agale topo takoa amele toamenuya.

<sup>23-24</sup> Soloyo Damasikase take nitoa mekale eina Yu yename one wia tukatekoi oi pedoa piitikoa Damasikase ta kago keteponeke ta ete patakakete oto likakete toa poi piai tanuya. Nitaneyake panagomepa Yu yename ne wiadete tiki wa Solo mekata pome pubu opokale

<sup>25</sup> likonu one oya-laweme Solo moa pawe tobou waneke pote kakete tube ka keneke uuketikoa makoke po kakoa widoa keneke akolono pomotoa keti tukaketikanuya.

### *Solo Yerusalem Take Pokome Tanemo*

<sup>26</sup> Nitaneyake Solo Yerusalem take pokome Yesuno agale yakoa motane yene-pala lipuademe wili toa mekale peyame i agopa Yesuno agale yakoa motokago mena wa piti motekete one wakenuya.

<sup>27</sup> Nitaneyake Banabasiyo one-pala oya kakatekao Aposelo ali-kitike aua pokome okome i agopa Damasikase take poademe pokome Ali Muno Yesu enekale Yesuyo one-pala ko oa kakenuya. Wa naniko Damasikase take pome

mekome Yesu patu kautakoa kakome onekemo atiki toa t<sup>o</sup>awea akeneya wa Banabasiyo Solo kei pia kakeneya.

<sup>28</sup> Nitaneyake Solo Yerusalem take eni yene-pala ete oto wa opia yakome Ali Muno patu kautakoa kakome onekemo atiki toa t<sup>o</sup>awea oma yakeneya.

<sup>29</sup> Nitao Geriki agale yakoa akene Yu yene-pala agale topo takoa okale eni yename one wiadete tuku toa kakeneya.

<sup>30</sup> One wia tukatekoi oi pedoa pikoimo yakatekoia one oya-laweme Solo moa Sisaria take nabisike wetekapekete ekete neke Tasase take wakapea poano pa wa ue dipike mekoia wetekaneya.

<sup>31</sup> Nitaneyake enipete-mene Yesuno ali atoa Yudea Galili Sameria ta-meneke mekete tete moameneya poti kilikoa meaneya. Nipa Epetane Yominiyo auapekale Akolalike nate wene pianeya mea onekele wedoa takama yakeneya. Nitaneyake ete ali atoa Yesuke wene tuga mea kipala lipuai lipuai taneya.

### *Pita Lida Dopa Tatake Pokome Tanemo*

<sup>32</sup> Pita ta piko peya pima yakome padepete Yesuno ali atoa Lida take mekoika ugu pome mepaneya.

<sup>33</sup> Pome mekome enekale eya ago Iniasi yono kawata tau toomotaneyaka pikale enaneyaka. Einagopa mali ketepo kakoa (8) ponoka toa-kama pa dikaneya walaike pia kakeneya.

<sup>34</sup> Pitayo einago enekome okome i ago Iniasi nepa Yesu Keraisuyo latekakono, neke yene pitike

tatikoa pitikoya wete moa ewetoano, kamoa wa okaka eina eina kamokoa kakeneya.

<sup>35</sup> Nitaneyake Lida Sarone tatake pitikoi peyame eina latoa pokago enoai tekete tepe kolotini pekoia pia Yesuke wene tunganeya.

<sup>36</sup> Einapete Dopa take Yesuno agale yakoa motane atoa Tabisa wa ibini akene atoa tuaneya. Tabisa Geriki agaleke eketepa Dokasi wa ibini ikiya. Einatoapa epetanele-kama toa ali atoa auapekala tane atoa.

<sup>37</sup> Einatoa yene pia mea tukale one oya-laweme ueme abe kogatekoia ako yamu moa pipaneya.

<sup>38</sup> Lida taapa Dopa ta namike pikale tokome Yesuno agale yakoa motane yename ekete Pita Lida take ponome mekome tokono, wida meameneya tone Dopa take wete noo wa Pita enemopoe wa ali takuta moa wetekaneya.

<sup>39</sup> Nitikoli pekete ne noo wa kowitikoli nipa patoe wa Pita einagota-pala opia pekeneya. Nitoa tumai yamu nokale einagotame ako yamu aua pokoli nepo meane atoa-kitame Pita unukamoa kakete kini tigini mamina eya pikoa kakete ekete ika iyapa i tuane atoame tone takoamekala toka wa Pita yamea kakete komo oa kakeneya.

<sup>40</sup> Nitikoli Pitayo peya akolono moa wetekatekoia neuwe tukua Akolali kowitaneya. Nitoa peketapekome tuane atoa enekakome okome Tabisa wete kamoa wa okaka leneta kikatapeneyea. Nitoa Pita enekome kamokoa meaneyea.

<sup>41</sup> Nitikale one yono moa katekamotokome nepo meane atoa-kitika ete Yesuno agale yakoa motane-kitika noe wa kayo oa motokome einatoa

i latoa kakona wa yametaneya.

<sup>42</sup> Nitaneyake Pitayo tanemo Dopa take oa pupitikaneyake eni take mekoi peya mati Ali Munoke wene tuganeya.

<sup>43</sup> Pita onepa Dopa take eida pa mea kakeneya. Nipa kai kepeneme paduya paduya latia tane ago Saimonane yapu meaneya.

## 10

### *Pita Koniliiasi Mekata Pokome Tanemo*

<sup>1</sup> Sisaria takepa Koniliiasi wa ibini akene ago meaneya. Einagomepa Itali wa ibini akene poyo yatene yopia meaneya.

<sup>2</sup> Einagomeka one yapu meane ali atoameka Akolalinele takama pote oneke nate wene pia lukoa meaneya. Nitane ago tokome onekeyakiti ponopene Yu yene tatikoamekala toa Akolali kowitzoi toa taneya.

<sup>3</sup> Wa padepete lou wegoukakaka (lou pini teboloke) tadiya pule pitikome enekale Akolaline edelo ago pade nokale enaneya. Edelo ago eni nokome okome i ago Koniliiasi wa okale

<sup>4</sup> piti tokale nepikoa pikome okome Ali Muno edade noke kake oko-pe-kale okome Akolaliyopa neke kowitike okamo yakoa nekeya-kiti tatia metekale enoa tokome ne wene taneya mekono,

<sup>5</sup> Saimone Pita enemotokapoe wa neke pupu ali pade-mene Dopa take moa wetekamene.

<sup>6</sup> Einagopa kai kepeneme paduya paduya latia toko ago Saimonane yapu tube kusa ue liti mekome tokono, nitamene wa edelo agome akeneya.

<sup>7</sup> Nimo oomotokome pokale Koniliasiyo eya taneya. One pupu ali takuta ni oneke lukoa meane poyo ago pade Akolalinele wedoa takama yakene ago einago-mene noe wa kayo oa motokome

<sup>8</sup> one pulete enekanakamo-kama tqawea okome okome Dopa take Pita enemotokapoatino poe wa wetekaneya.

<sup>9</sup> Podolikama einago-mene Dopa take tigotokakoa nokoika Pitayo Akolali kowitademe one meka yapu yalini waneke ate lewia pome mepaney. Nipa lou mataike ponome kakale taneya.

<sup>10</sup> Nitoa mekome kobu tokale nee noademe akeneya. Nitane-pete yapu pine yename nee noatekoi nodokakete kakoika

<sup>11</sup> Pita pule pitikome enekale tibu peaney pikata mamina petene nami-meneke po kakoa itonoke tukaketikakale enaney.

<sup>12</sup> Eni mamina kagonoke eya kuya kai kaya ini lobutaneya pikale enekakoa

<sup>13</sup> agale ludu nokome okome Pita ne wete kamoa eniya-kiti moa wia namene wa okale okome

<sup>14</sup> Ali Muno wini okolepa toamou. Neme yametekoya-kitipa toto Yu yename kekaneya latikoa noamokoya-kiti toko-la. Enika eniya pade wete noamokouya tekene noamou-kale

<sup>15</sup> agale ludu wa nokome okome ika iya nomotoane latikakou wa Akolaliyo yametekaya-kitipa neke kekaneya wa wamea. Eniyapa moa na wa akeneya.

<sup>16</sup> Enilepa tebolopeta tokala taneya. Nitikaneyake eina mamina petene a tibuke wete

katekamotaneya.

<sup>17</sup> Nitikale Pita atu kamokoa mekome eni pulete enekuyapa edoa tokoto patu wa wene kibutua mekaka Koniliasiyo moa wetekane ali-mename Saimone one yapu manika kako-pe wa pitia yakatekoia one meka yapu kago keteponeke note kananeya.

<sup>18</sup> Nitoa kayo ekete ekete Saimone one pade ibini Pita wa iki ago wida meko-pe wa yakaneya.

<sup>19</sup> Nimo kayo ekete kakoika Pitayo one pulete enekanakale wene kibutua mekale Epetane Yominiyo one-pala okome ali tebolome ne tuku toma note kei kagoke kakete tikino,

<sup>20</sup> wete kamoa kotua pa. Poome toameneya eni ali-mene-pala opia pamene. Anume oto wetekakolu tokome ni nikino, opia pamene wa okalepa

<sup>21</sup> Koniliasiyo moa wetekane ali-mene kakoita pokome okome kime tuku toniki agopa no i kakuno, edekolo tuku toniki-pe-kale ekete

<sup>22</sup> poyo yatene tobou ago Koniliasiyo poe wa wetekakale nokoo. Einagome epetanele-kama toa Akolalike poti wene pia lukoa mekagopa Yu yene peyame one kei piai tiki. One mekata Akolaliyo one edelo ago pade wetekakale nokome okome Pita oto nomotonon ta. One nokome okamo neme yakamotoane ukuno, one mekota neke pupu ali pade-mene wetekamene wa edelo agome Koniliasi-pala oka toa toto ni nokoo-koli okome

<sup>23</sup> nipa i yapu piatono noe wa makutukoa motaneya.

Pimotokome podolikama Pita einago-mene-pala opia pekeneyea. Dopa take Yesuno agale

yakoa motane ali pade-kitika kipala opia pekeneya.

<sup>24</sup> Pita eni yene-pala Sisaria take noademe nokale Koniliasiyo one wamene laine-mikiti one oya-lawe enika eni ali atoa obokoa yapu nepia meaneya.

<sup>25</sup> Nitaneyake Pita one yapu eida tuapea noademe nokaka Koniliasi kotua pokome Pitane kawane keti peko pitakome ke wa one kei pianeya.

<sup>26</sup> Nitikale Pitayo one yono moa katekamotokome okome noka pa agono, winile toameano, kamokoa ka wa moa katekamotaneya.

<sup>27</sup> Nititikoa one-pala ko oma pome yapu pokome enekale ali atoa peya mati eida oboa mekoli enaneya.

<sup>28</sup> Enekome okome no Yu yatene tone kauamikitame kitau laukane toa pa yatene ali-pala opia poamoa yapu-kitika ugu poamoa toko. Eni kitau noanumeka laukoane mekouyake Akolaliyo pule metekome okome odene agoka pa yatene ago wa wamo kitau laukameamene wa oka.

<sup>29</sup> Nitikale tekene Koniliasiyo moa wetekane ali-mene no mekouta nokoli koamoane wete oto nukuno, no enemonomotoa einago-mene edekale moa wetekakoiya-pe wa Pitayo yatekale

<sup>30</sup> Koniliasiyo okome eko ikouna ipetepa lou pini teboleke Akolali kowitoane mekolu panago yati yati tane mamina kakeneya anu lene timini lono kotikataapea nome kaka.

<sup>31</sup> Nitikome okome Akolaliyopa no neke kowitoai teke okamo yakoa nekeya-kiti tatia ponopene ali atoa mea tokale enoa tokome ne

wene taneya mekono, eya toano ta.

<sup>32</sup> Dopa take Saimone one pade ibini Pita wa iki ago eya agono yapu pitimekawe kai eya kepeneme padeya padeya latia toko ago Saimone one yapu tube kusa ue matanu liti ponome mekome tokono, einago enemopoe wa neke pupu ali pademene moa wetekamene wa edelagome okale

<sup>33</sup> eina eina ne oto nomotoane anu pupu ali pade-mene moane neeke wetekakou. Ne epeteko teke opinokono, ke wane uku. Akolaliyo neme a wa oka toa yakoono, Akolaline leneke toto peya i oboa mekono, wete a wa Koniliasiyo akeneya.

### *Pitayo Koniliiasi Yatene-pala Oa Metanemo*

<sup>34-35</sup> Koniliasiyo nimo okale Pitayo okome papetepa Akolaliyo no Yu yatene odene one wa takoa moa yopikoa mekono wene pianeya mekou. Opa e ku pa yatene oneke nate wene pianeya lukoa mekete **kiyo** akenele toma yaki peyaka Akolaliyo one wa pawe toa talo toko wane wene tuku.

<sup>36</sup> One agalepa Iserele yene mekoika oa memotoa Akolaliyo Yesu Keraisu moa wetekaneya. Nitikale nokome Akolali-pala poi teigoa wawa odene wene pianeya meatekoimo i i wa oawineya yakeneya. No Yu yatene e ku pa yatene peyaka yopia meko Ali Muno Keraisu Yesuyo nitaneya.

<sup>37</sup> Kipala i uku agalepa Yudea ta piko peyake oa pupitikanemo kimeka yatekete tokoi. Yoneyo ali atoame ue moatekoimo oma yawa ue motokatekaneyake Galili take titimoa oa pupitikanemoke uku.

**38** Enipa Akolaliyo Nasarese Yesuke Epetane Yomini moa awitikoa tele lukoa tokale ele kule epetanele toa ni Setanuyo moa kautane yene peya latekama yawa taneya. Akolaliyo one auapekala tokale nitaneya.

**39** Yu yatenane ta pikoye peyake Yerusalem takeka Yesuyo padele padele toma yakale-kama tone leneme enekooya tekete dika dika wa tqawea amele tokolo uku. Yesuyo nitaneyake tobou alikitame dekoia moa yomo lekaneyake wia tukakoi.

**40** Nitikolipa ta tebolo takoa pataka-pete Akolaliyo Yesu moa kamotokatekoapa ali atoa mekoika pono yamepomotoa taneya.

**41** Nitaneyake ali atoa peya pono yametaneya mena. One toma yakale enemotoa Akolaliyo takoa kakapikana yene odene pono yametekala toka. Nipa one kamoa pootokaneyake onepala opia mekete nee ueka nokala tokoo yene toto odene pono yametekala toka.

**42** Nitikome okome onekemo ali atoa-pala i i wa akama yamene. Ni wipitia ta pataka-petepa ali atoa peya tua pokoi-kitika yomini meaneya mekoi-kitika kini koiso akoane omotoa Akolaliyo one moa kakapika wa akama pamene wa pono yamenokome oka.

**43** Einagokepa Akolaline agale papete tqawea akane ali peyame eya wa ekete akeneya. Oneke wene tugoa mekoi peyapa Akolaliyo kini poanele toma yakoike po letu mekakana keetapea mitikoo. Nipa Yesuno ibinike tokome nitoo wa Pitayo akeneya.

*Epetane Yomini Awinanemo*

<sup>44</sup> Pitayo nimo oa kakaka one agale yakakoa mekoi peyake Epetane Yomini awinaneya.

<sup>45</sup> Nitikale enekete eya yene Yesuke wene tuganeya mea Pita-pala opia nekene Yu ali-kiti wene kainya pianeya. Nipa Akolaliyopa Epetane Yomini kiwike namolo awitikakana toa i pa yatenekeka awitikadeko wa wene kainya pianeya kakete akeneya.

<sup>46</sup> Eni yename agopa tane agaleke Akolali kei pia kakoli yatekete tekete ni akeneya.

<sup>47</sup> Nitikoli Pitayo okome Epetane Yominipa totoke namolo awinokana toa i pa yatenekeka awinadekono, ue motokameo wa teyo omotoa-pe.

<sup>48</sup> Yesu wedekoa ue moamene wa okome eni yene ue motokaneyea. Nitikale Koniliasiyo one yenameka ue mootokoapa kipala opia mea kamene wa Pita kowitikoli tokome ta pataka pade-meneke eida pa meaneya.

## 11

*Pita Yerusaleme Ta Wakapea Pokome One*

*Toma Yakanakamo Toawea Akenemo*

<sup>1</sup> Mone pa yenameka Akolaline agale yakoa motiki wa akedekoimopa Aposelo ali-kitame yakaneya. Yude ta piko peyake Yesuke wene tuga meane yene peyameka yakatapeneyea.

<sup>2</sup> Wa naniko Pita Yerusaleme take ate wakapea nome mekale eina ali padeka-kitame one kikoa akeneya. Nipa Akolaline mati-kiti latiadetepa ali mati yatene kepene teigamedecko wa akene yename Pita kikoa ekete ekete

<sup>3</sup> nepa kepene teigamene pa yatene agono yapu  
poke one yene-pala opia meke nee nakenuya.

<sup>4</sup> Nitikoli Pita one yakome tokanakamo titikome  
toka-pala wipitikome tokata eya wa tqawea ak-  
eneyya.

<sup>5</sup> Dopa take Akolali kowitoanemekene pulete  
keneya enekolu a tibuke padeya mamina petene  
nami-meneke po kakoa no pitikou pitia ketipea  
tukaketikakale enekou.

<sup>6</sup> Leneme nepikoane pikolu eya kuya yo tane  
kai eteya egetamene kai kaya ini enika eniya peya  
lobutua pianeya enekou.

<sup>7</sup> Nitoane yatekolu agale ludu nokome okome  
Pita ne wete kamoa eniya-kiti moa wia na wa  
okale

<sup>8</sup> yatekene ekene Ali Muno wini okolepa  
toamou-li. Neme no yametekoya-kitipa toto Yu  
yename kekanuya latikoa noamokoya-kiti. Enika  
eniya pade wete noamokuya tekene noamou-  
kolu

<sup>9</sup> agale ludu wa nokome okome Akolaliyo nomo-  
toa latikanuya-kitipa neke kekanuya tokolo noa-  
muku wa wamea wa oka.

<sup>10</sup> Enilepa tebolopeta tokala taneya.  
Nititikaneyake eni mamina petene a tibuke ate  
katekamotaneya.

<sup>11</sup> Nitikale eina eina ali tebolo no mekou yapu  
kotikatapea note kakoi. No enemonomotoa moa  
wetekaneyake Sisaria ta kawa nokoi.

<sup>12</sup> Nitikoli Epetane Yominiyo nopala okome  
poome toamenuya wini ali-mene-pala opia  
pamene wa okale opiane pokou. Nitikolupa  
Yesuke wene tugoa mekoi ali ko melepu (6) kakoa

nopala Siseria take opia pokoi. Einali-kiti i note kaki. Toto peya pote Koniliasine yapu tuapea pokolo

<sup>13</sup> Koniliasiyo one pulete enekana toa kekome okome edelo ago pade one yapu nome kakome okome Saimone one pade ibini Pita wa iki agopa Dopa take mekome tokono, enemotokapoe wa neke pupu ali pade-mene moa wetekamene.

<sup>14</sup> Einago nome mekomepa neeka neke yapu pitiki-kitika toa moateko agale oa meoo wa edelo agome oka toa Koniliasiyo nopala oka.

<sup>15</sup> Nitikale agale titikene okouka Epetane Yomini eni yeneke awia tagatapeka. Nipa totoke namolo awinokana toa toka.

<sup>16</sup> Nitikale enekene inapa Yesuyo namolo wa oa pikakanakale taateko tadeko wane wene tokou. Nipa Yoneyo ali atoa ue motokaneyake oneme ue motokou toane Epetane Yomini kiwike awitikou wa oa pikana wene tokou.

<sup>17</sup> Nipa Yesuke wene tugakoo-kiti totoke Akolaliyo one Epetane Yomini awitikakilepa nami kakameneya tokana toa eni pa yenekeka awitikakano, ipa Akolaliyo tadekono, one wene pika toane tagamedekale eni yene ue motokakou wa Pitayo e yene-pala akeneya.

<sup>18</sup> Nimo okale yatekete e yename Pita wa kikoa wameneya Akolali kei pikete ekete pa yatene ali atoaka mea kama poadetepa oneke tepe kolotini peko a pimota tadeko wa Akolali kei pia kakeneya.

*Adioke Yene Yesuke Wene Tuganemo*

**19** Yu yename Sitipene wia tukatekoa ete ali atoa tete motokakala tokolipa Yesuke wene tugoa meane-kiti Yerusalem ta toa Pinisia Saiperase Adioke ta-meneke tadoa pekete Yu yene takoa Yesunomo pa mekala taneya.

**20** Eni yene padeka-kiti Saiperase Sairini tatake opiane ali-kiti Adioke take pote mekete Ali Muno Yesunomo pa yatene ali atoa-palaka oa mekala taneya.

**21** Nipa Ali Munoyo auapea yopikale oa mekala tokoli eni pa yatene ali atoa peya matiyame yakoa motekete oneke tepe kolotini pekoia pia lukoa meaneya.

**22** Nitaneyake Yerusalem take Yesuke wene tugoa meane-kitamepa eni tanemo yatekete tekete Banabasi takoa moa Adioke take poano pa wa wetekaneya.

**23** Nitaneyake Banabasi Adioke take nome mekome enekale Akolaliyo eni yene pewe witikome tadekale enekome wedia mekome okome Ali Munagole wedoa takama pamene wa kini wene weye akakala taneya.

**24** Banabasi einagopa epene wene pianeya meane ago. Epetane Yomini oneke awia tagatapeneyea tokome Yesunole wedoa takama yakeneya. Nitane ago Adioke take eida mekakoa eni yene peya mati Ali Muno-pala lipukala taneya.

**25** Wa padepete Banabasiyo Solo enemopou wa Tasase take tuku topaneyea.

**26** Tuku toa kawa enamutukome Adioke take pata wa wakapea aua pekeneyea. Nitao Adioke take poteta mekete odene malike Yesuke wene tugoa meane yene-pala obokala taneya. Obokala

tekete ali atoa peya mati olaukoa kakeneya. Yesuke wene tuga mekoi-kitipa Keraisuno ali atoa wa ibini ikilepa eida Adioke take titia taneya.

<sup>27</sup> Einapete pake Akolaline agale akane ali pade-kiti Yerusalem kawa Adioke take keti note menaneyea.

<sup>28</sup> Note meketepa eya ago Agabasiyo okome ta piko peyake kobu igi mati noo wa oa pianeya. Nipa Epetane Yominiyo wene takaka toa akeneya. (Eni kobu igi mati taatekakilepa Lomane ako tobou ago Kelodiasiyo ta piko peya yopia meanepete taneya.)

<sup>29</sup> Agabasiyo nimo okale yatekete Yesuke wene tuga mekoi peyame kini Yudea take meki oya-miki auapeato wa padeya-kiti kini pikoi toa takoa oboa pikakala taneya.

<sup>30</sup> Nitateko Banabasi Solota metekete ekete Yudea take Yesuke wene tuga meki yene yopiki ali-kiti metekapoatino poe wa wetekaneya.

## 12

### *Pita Po Yapu Pitanya Toa Motanemo*

<sup>1</sup> Eina-pete laigoa tobou ago Erodeyo Yesuke wene tuga mekoi yene padeka-kiti tete motokakala taneya.

<sup>2</sup> Nitikomepa one poyo ali-kitame Yonene wamene ago Yame kabe teigamotoa taneya.

<sup>3</sup> Nitikale tokome Yesuke wene tugamene Yu yene wedia mekoli enekome ena toane Pitaka mou wa one poyo ali-kitame dekoa motokamotoa moa wetekaneya. Enilepa Yu yenamono mono akamene palawe yoa nakene wa ibini akene toge kia mekoi-pete taneya.

<sup>4</sup> Nitikale Pita deko a moa aua note po yapu pitikakoli one poyo ali-kiti tuyono tuyono wa yopikakala tomotaneya. Nipa Yu yenane eni toge kia nootokoa mekoika Pita moane eni Yu yenane lene yoto kakoane pitiane yakou wa Erodeyo wene pikome taneya.

<sup>5</sup> Nitikale Pita po yapu eida pia mekalepa Yesuke wene tuga mekoi-kitame Pitane kow-itikoai taneya.

<sup>6</sup> Erodeyo podolikama Pita moane pitiane yakou wa wene pia pitikakoa Pita po yapu pitikome atu pitikata poyo ago takuta one kouna takoa dekamo a pitaney a. Nipa kapa pota takuta kakoa kebeto a pitikaneya. Akolono kago keteponekeka poyo ali pade-kiti eida kakete yopikoa kakeneya.

<sup>7</sup> Nitikakoa Ali Mun o agono edelo ago Pita pitikata kotikatapea nome kakale one po yapu pitikata pa toa kakeneya. Nitaneyake edelo agome Pitane podene wia kamotokakome okome wete kamokoa kamene wa okaka one yonoke kakane kapa pota kotokoa pitaney a.

<sup>8</sup> Nitikale edelo agome okome neke matiu moa kawa neke kawa yeneka moa meko ta wa okale nitaneya. Nitikale okome neke tokoo mamina peteneka lobutukoano, no pukuka namene wa oa pekeneya.

<sup>9</sup> Nitikale Pitayo litima pokomeke edelo agome tokalepa niminile toko wa wene toameneya. Nipa ipa pulete tukutu patu wa wene pia pekeneya.

<sup>10</sup> Nitoa edelo ago Pitata poyo ali tuyonome yopia kakoi kago patukoa penaney a. Wa eina toa poyo ali tuyonomeka pade kago yopia

kakoita patukoa ponetekoa kapame latiane kago keteponeke tugoa kapaneya. Nitikoli ena kago one weneme pekale akolono witoata pekeneya. Nitoa batete ludu pote ka katepake edelo agome Pita tewitikoa pekeneya.

<sup>11</sup> Pokalepa Pita one-pala tokale niminile tadeko wa wene tokome okome Erodeyoka Yesuke wene tugamene Yu yenameka no i ago tete meou wa wene pokoinake Akolaliyopa one edelo ago moa wetekakale toa motokome tadeko wa akeneya.

<sup>12</sup> Nitoa eni wene kibututukoapa Yone one pade ibini Make einagono nine Mariane yapu pekeneya. Eni yapu keneke ali atoa peya mati oboa mekete Pitane kowitikoa meaneya.

<sup>13</sup> Pita eni yapu kagoke pome kakome wi wi tokale yatekome yapu pupu atoa pade Rodayo kago pekademe nome yatekale

<sup>14</sup> Pitayo okomokale yatekome wedikome tokome kago pekameneya yapu kouna lono teyapea pokome okome Pita kago kene akolono ku nome kakome toko-kale ekete

<sup>15</sup> leau eke oko-koli okome e'e mena. Pita kagoke ku kakome toko wa okala tokale ekete ni tadekopa Pita one edelo ago latia nome kakome toko wa wene toamekete akeneya.

<sup>16</sup> Nitikakoa Pitayo akolono kago wi wi toa kakale note kago peetapekete enekete ekete ekee inapa Pita tadeko wa ka oa kakeneya.

<sup>17</sup> Nitikoli Pita yoname kawikatekoa kakomepa Ali Munoyo edelo ago moa wetekakale po yapu nome akolono aua pokanakamo i i wa toawea akeneya. Nimo ootokoakakome okome kipala i ukumo Yameka anu ete oya-mikitika

meikoika toawea akapoe wa oomotokome padeya pekeneya.

**18** Podolikama pene ta patakaka poyo yename ekete ekee inakago Pita manika pokome pokato patu wa poome kau kau yakeneya.

**19** Erodeyopa einago wete tuku topoe wa okale tuku tokoa kawa teko tokale wakoli eya taneya. Ete piapa Pita yopia kakoina poyo ali-kiti pitia yakatekoapa einago yopia potokadeki wa ootokoa kakome i poyo ali-kiti wia tukoe wa ete poyo ali-kiti moa metaneya. Nitimotokome Erode Yudea ta tewitikoa Sisaria take keti pome mepaneya.

### *Erode Tukome Tuanemo*

**20** Erodeyopa Taia Saidone tatake pitikoi yene-pala kotimi yoa meaneya. Nitikalepa eni yene koukoa nekete one pitika yapu luku talo tokago Bilasasiyo kiwi auapemotoa oya kakatekooa Erode mekata nekete ekete tone noateko neepa neke take-kama topo toa monokala tokono, odene wene piato wa kowitaneya.

**21** Nitaneyake ipete wa namene wa oi metekana-pete eni yene wa nokoli Erodeyo tobou ago kawateka mamina-mene moa kawa tobou ago meateka walaike pome mekome eni yene-pala agale oa metaneya.

**22** Nitikale yatekete kayo ekete ekete inapa alime oko toa mena. Akolaliyo oko toa eni okono, yakatoe wa kayo oa kakoli

**23** eina eina Akolaline edelo ago padame one winaneya. Erodeyopa ipa Akolaliyo wene takako toane uku wa Akolali kei piamokale tokome

taneya. Nitikalepa pukiname tepe noa tēianeyake tukome tuaneya.

<sup>24</sup> Nitaneyake Akolaline agale ta piko peyake oa pupitikama pekeneya tokome ali atoame yakoa moma-kala pekeneya.

<sup>25</sup> Banabasi Solotame Yerusalem pekete tatikoa metekatekoiya-kiti tatikoa meemotekete Adioke take wakapea pekeneya. Nipa Yone one pade ibini Make einago-pala aua pekeneya.

## 13

### *Banabasi Solotame Yesunole Takama*

#### *Yamotoa Takoa Moa Wetekanemo*

<sup>1</sup> Adioke take losu yapu oboai toa Akolalinele takakoi-kitipa padekame one agale tōawea akoa padekame onekemo pine tōa olaukoa taneya. Eya yename nitoa meaneya. Banabasi ni Simione ni Lusiasi ni Maneyene ni Solo. Simione one pade ibini Naisa wa akeneya. Lusiasi onepa Sairini take ago. Maneyene einagopa Erode-pala tau takoa egetane ago. Eni Erodepa tubetoa wetini toa kakome Galili ta yopia kakeneya.

<sup>2</sup> Eni yename Akolalinele takoa mekete nee wawa mekoika eya taneya. Epetane Yominiyo kiwi wene takakome okome Banabasi Solotame anu pade pupu takamotoane kayo okouno, anu eni pupu takamotoa einagota moa kakamene wa akeneya.

<sup>3</sup> Nitikale eni yename nee wawa kowititikoapa nitato wa yono pia wetekaneya.

#### *Saiperase Take Tanemo*

<sup>4</sup> Epetane Yominiyo okana toa tekete wetekakakoli Banabasi Solota Selusia take keti pote pipaneyea. Piimoteketepa tube ue dipike peapetekoa mea Saiperase take pote mepaneyea.

<sup>5</sup> Saiperase ta keneke piko Salamise take pote mekete Yu yenane losu yapu kaka toa Akolalinemo oa mekutu toma pokoli tuali Yone opia pokome auapema pekeneya.

<sup>6</sup> Saiperase ta ludu pima yawa eka matanu lono Pepose take pekete otoi ago pade Ba-Yesu wa ibini akene ago kotuaneya. Einago Yu yatene agomepa Akolaline agale akama yakuna wa oa meake otoi ago mekome ali atoa oa yotokakala taneya.

<sup>7</sup> Einagopa Saiperase ta yopia kakago Sesiasi Polasi-pala opia-kama yakene ago. Eni ta yopikago Sesiasi Polasi wene muno meane ago tokome Akolaline agale yakademe okome Banabasi Solota oto nomotoa wa agale oa wetekakale nekeneya.

<sup>8</sup> Nitikoli tobou agome kini agale yakoa motokaya tokale Elimasi wa ibini akene agome kitapala neno oa kakeneya. (Einago Geriki agaleke Elimasi wa ibini ikilepa otoi ago wa ekete iki.)

<sup>9</sup> Nitikale Solo one pade ibini Polo wa akene agome eya taneya. Epetane Yomini oneke awia tagatapekale kakome eina otoi ago nepikakome okome

<sup>10</sup> nepa nipa Setanuno peku noa tokagono, padele padele kiyo akenele-kiti moa agopa takade wili tokoa kawa poanele-kama toa ali atoa oa yotokoa toko. Akolaliyo nimini akene agale pamo tetepo takoa koigaku peke toapa manipete wako patū.

<sup>11</sup> Akolaliyo ne kibu moono, nepia. Opii-mene

neke leneta liitapeneya yake lou paka enameneya pa yawa meoo wa Poloyo okale eina eina one lene libu takatapekomē yomiyomume agopa takaneya. Nitikale one yono moa aua yawatekago tuku toa kakeneya.

<sup>12</sup> Nitikale enekome ta yopikagome okome Ali Muno agonomo i agotame olaukoa kakipa etene nimini akediki wa wene kainya pianeya kakome yakoa motaneya.

### *Pisidia Ta Keneke Piko Adioke Take Tanemo*

<sup>13</sup> Nitaneyake Poloyoka one oya-mikitameka Peppose ta tewitikoa ue dipike peapetekoa mea pote Pabilia ta keneke piko Peka take witapeneya. Eidapa Yoneyo o yene tewitikoa Yerusalemē take wa wakapea pekeneya.

<sup>14</sup> Nitaneyake o yename Peka ta tewitikoa Pisidia ta keneke piko Adioke take pote mepaneyā. Eidapa ko mea pupu toamene-pete losu yapu tua-pea pote witipitoa meaneya.

<sup>15</sup> Nitoa mekoli Mosesene agale tiginika Akolaline agale papete tōawea akane ali-kitame akene agale tiginika oi moa peya takakete losu yapu talo tane ali-kitame eya taneya. Agale wetekakete ekete oya-lawe i oboa meki ali atoa auapeatiki agale oa meadete eketepa yakamotonō oe wa akeneya.

<sup>16</sup> Nitikoli Polo kamokoa kakome yono pitikakome okome

Iserele ali-kitika Akolalike nate wene pia one kowitzai tiki pa yatene ali-kitika kiwi peya-pala i ukuno yakoe.

<sup>17</sup> Iserele yenane Akokaliyo tone kaua-mikitipa one wa takoa motaneya. Nitaneyake mone Idipi

take pote mea kakoli pewe wia kakale eida pitikali opia tagatapeneyea. Wa naniko Akolaliyo padele padele telekole toa eni ta tewitikoa aua pekeneya.

<sup>18</sup> Nipa mali padeka noi kakoa (40) ponoka toakama tone kaua-mikiti mama moa ali piamene take egetoa aua yakeneya.

<sup>19</sup> Nitimotokome Kenane ta ludu pitane yatene tatono kakoa (7) yatene wia atukoa eni yatenane ta tone kaua-mikiti kini wa yametaneya.

<sup>20</sup> Nipa mali ege kadukaka pogime kadukoa (450) mali ponoka toa edikoa pewe wia yopia kakeneya.

Nititikaneyake kini tanele takoa enoa akatekoi ali-kiti Akolaliyo moa kakama pome wipitikomepa one agale akane ago Samuele moa kakaneya.

<sup>21</sup> Nititikaneyake tone kaua-mikitamepa kini Ali Muno meatekago neme takoa moa kakakamene wa Akolali kowitzaoi tokoli Bedamine yatene ago Kisene mana Solo takoa moa kakaneya. Nitaneyake mali padeka noi kakoa (40) ponoka toa Solo einago Ali Muno mekome talo toa kakeneya.

<sup>22</sup> Akolaliyo einago Solo katekatekoa one luku Depidi kini Ali Muno moa kakaneya. Nitoapa Depidi kei pikome okome *i agopa Yesine mana Depidi nota odene wene pianeya yakagono, anu wene pikule-kama too* wa one kei pianeya.

<sup>23</sup> Wa wipitikome toto Yu yatene toa momotoa tikilepa einago Depidike tagakago Yesu moa kakaneya. Nipa kiwi yatene auapekene dikou wa papete oa pikana toa taatekoaa taneya.

<sup>24</sup> Yesu wete taatekoaa noameneyake Yone namolo takoa nokome Iserele yene peya kini

namolo poane wene wia wawa tepe kolotini pekoia piatino, ue moamene wa mo wima yakeneya.

<sup>25</sup> One eni pupu toa peya takateka tigotokale kakome okome nopa edane ago kakuno wene piki-pe. Papete oa piane toa taatekoia noatek-agopa no mena. Nopa einago menake one naniko nomotoane no namolo takoane nuku. Einago nokolopa one auapekilepa toatekuyake pa ago tekene one kawa yeneka oyake kekamele toamoko wa Yoneyo oka.

<sup>26</sup> Anu oya-mikiti Eberameke tagene yeneka Akolalike nate wene pia kowitoai tiki mone yeneka Akolaliyo ali atoa toa moateka agale oa wetekakilepa totoke oa wetekaneyea.

<sup>27</sup> Yesu taatekoia nokale Yerusalem take pitikoi yenameka kini tobou ali-kitameka einago eni nekedeko wa wene toameneya. One wene toamekete koiso akakoipa nipa oneke papete oa piane toa taatekoia taneya. Einapa kini ko mea pupu toamiki-pete-kama Akolaline bokuke oneke wia mekanie agale oi mokala tikiyake taneya. Nipa Akolaline agale papete toawea akane ali-kitame oneke papete wia mekapiane agale oi mokala tikiyake nitaneya.

<sup>28</sup> Einagopa Pailase mekata aua pekete i ago wia tukakoano ta wa akeneya. Nipa one wia tukatekoi nami kawameadekaleka pa puputua taneya.

<sup>29</sup> Nitoapa Akolaline bokuke oneke papete wia mekapiane-kama toa peya takatekoia one tigini yomo lekaneyake wia dekaneya toa moapa tukoi-kiti piadete kokapiane kotake moa pipaneya.

**30** Nitaneyake one eni tuaneya pikata Akolaliyo moa kamotokaneya.

**31** Nititakaneyake eya yene Galili ta laigoa onepala opia yawa Yerusalem take pokoina oyalawe pono yametekala taneya. Nipa ta kainya mati pataka toa tokala taneya. Nitikale enekoiya tekete one eni oya-laweme toto Iserele yatene-pala dika dika wa tqawea oma yaki.

**32-33** Einapa Yesunomo kini wene epetekateko ko totome eya wa tqawea oko. Akolaliyo kiwi yatene auapekene dikou wa tone kaua-mikiti-pala papete oa pikana toa taatekoao tokomepa kiwike tagene yene toto kako-pete Yesu tukale moa kamotokaneya. Eni toatekalekepa Akolaline bokuke taku takoa samo lo agale eya wa wia mekaneya piko.

*Nepa anu mana. Opi nopa neketai latiane meku*  
wa Akolaliyo mana-pala akene toa wia  
mekaneya piko.

**34** Akolaliyopa one tukale moa kamotokakale tigini wa lomuamatekaleke eya wa akeneya.

Auapekene dikou wane Depidi-pala *kiyo* akenele toatekoumo oane pikouna toane ne auapekene taatekoane tou wa Akolaliyo mana-pala akeneya.

**35** Enilekepa panagome Akolaline bokuke eya waka papete wia mekaneya.

*Nekele-kama takama pomotoa takoa motokago*  
*tukalepa lomumotoa neme wawamoo* wa  
wia mekapianeya.

**36** Depidiyo Iserele yene yopia mekome Akokalinele takoa peya takatekoao tua pekeneya. Nitaneyake one kaua-mikiti oloyo toai tanetake one

yename oneka oloyo tokolipa one tigini eida lo-muaneya.

**37** Depidipa nitaneyake Akolaliyo moa kamotokane agopa lomukile toameneya.

**38** Nipa anu oya-lawe kiwi eya wane wene takakene uku. Einago Yesuyo tokalekepa Akolaliyo kini poanele toma yakoike po letumekakana keetapea mitikoo wa totome kipala toawea oko.

**39** Akolaline lenek poanele toamene yene meadete Mosesene totono litia tootapeato wa kime wili toa kawa teko tokolo tetekoa poanele pa tiki. Nitikiyake Yesuke wene tugoa meki peyapa Akolaliyo poanele toamene yene tetepo takoa wene keaneya meko. Yesu tukaleke ni toko.

**40** Akolaline agale papete toawea akane ali-kitame pubu akene toa kipala takayano, wedoa meamene. Akolaliyo akene toa eya wa pubu akeneya.

**41** *Tedu mea ya takoa tiki-kiti kipala eya wane uku.*

*Anume tukule enoa ka oa tuati. Kiwi mekipetepa padameka namolo toamokoinakale toadene tekene ni uku. Enilepa i i wa panagome toawea okaleka kime yakoa moamoi wa akeneya wa Poloyo e yene-pala oa kakeneya.*

**42** Nitaneyake Polo Banabasitame eni losu yapu tewitikoa poadete kakoika e yename ekete ye pupu toamatiki-pete wakapea note enika enimo wa oa menamene wa kowitaneya.

**43** Nitoapa kini losule toa peya takatekoapadeka-kiti Yu ali-kitameka Yu yene-pala lipuane pa yatene ali-kitameka Polo Banabasita litia pekeneya. Litia nokoli e yene-pala ko oma pekete

ekete Akolaliyo kiwi pewe wima pomotono, onekele wedoa takamoa pamene wa oma pekeneya.

*Polo Banabasitame Yesunomo*

*Pa Yatene Ali Atoa-pala Oa Metanemo*

<sup>44</sup> Wa ye ko mea pupu toamatekoi-petepa eni take pitane ali atoa pa natetekoa kamotoa ete peyame Ali Munagonomo yakadete koukoa nekeneya.

<sup>45</sup> Koukoa note kakoli enekete Yu yene wene mati poologaneya kakete Polo-pala neno oa tea agale oa taneya.

<sup>46</sup> Nitikolika Polo Banabasitame piti moameneya kakete ekete Akolalinemo oa metekilepa Yu yene kipala namolo takoa ato wa totome oa metekoyake kote tokolo waki. Nipa kipa Akolaline take mea kamele toamene tetepo takakete ikili tokome kiwi tewitikoa wawa mone pa yeneke poo.

<sup>47</sup> Tone Ali Muno agome tamene wa oka toa toadete toko. Eya wa oka.

*E ku mone pa yatene-kitti pa takalogamene wane kiwi moane kakapikouna. Nipa e ku yatene ta piko peya pitiki toa pekete kiwi toane motukumo oa pupitikakamotoane tekene tokouna wa Ali Muno agome oka wa Poloyo akeneya.*

<sup>48</sup> Nimo okale yatekete e pa yatene ali atoame ke wa Ali Munono agale kei pia kakeneya. Nitaneyake Akolaliyo mea kama pomotoa takoa moopiane ali atoa peyame Yesunomo yakoa motaneyea.

**49** Ali Munono agale eni ta pikō peyake oa pupitikatapeneyā.

**50** Nitaneyake Yu yenamēpa Polo Banabasitane agale yakamatoe wa Akolalinele takama yakene ibini akene atoa-kitika eni take tobou meane ali-kitika oa kamotokama yakeneyā. Nitoapa einagota tete meetekoa kini ta tewitikoa poe wa tikatapeneyā.

**51** Nitikoli einagotame kiwika tewitikoa wako wa kini kawake kakene kege tadamotekete Aikoniamē take pote mepaneyā.

**52** Nitaneyake Yesunomo yakoa motane yenamē ke wa wedia meaneyā. Nipa Epetane Yomini kiwike awia tagatapeneyā kolotine meaneyā.

## 14

### *Aikoniamē Take Tanemo*

**1** Adioke take tokoinakale Aikoniamē takeka wa einakale taneyā. Polo Banabasita Yu yenane losu yapu pote kakete Akolaline agale wedoa oa metekoli yatekete Yu yeneka mone pa yeneka peya matiyame ee, nimini iki wa Yesuke wene tuganeyā.

**2** Nitaneyake kini agale yakamadete wakoi Yu yenamēpa i agotame ikimo yakamatoe wa mone pa yene oa kamotokakoli mone yenamēka einagota-pala kotimi yoa meaneyā.

**3** Nitikolika eida mea kakete Ali Munagonomo oa metekilepa piti moameneyā taneyā. Nipa Ali Munoyo ali atoa pewe wia talo tokome tokomo eni oa mekala tanepa ina okoinapa nimini akediki wa e yenamē wene tomotoa tokome Ali Munoyo

einagota tele lukakale padele padele telekole toma yakeneya.

<sup>4</sup> Nitaneyake eni take pitane yene padekamepa Yu yenane totono litia tato wa oa wa padekamepa i Aposelo agotane agale yakoa litiato wa puutakutukoa meaneya.

<sup>5</sup> Nitaneyake Yu yenameka mone pa yenameka kini tobou ali-kiti-pala koukoa mekete einagota tete mea kueme kqua tukatekoi oi pedoa pianeya.

<sup>6</sup> Eina koina tanemo kugu yateketepa einagota wete kamokoa Aikoniam ta tewitikoa eya ta ludu toa yakeneya. Likonia ta keneke piko Lisira Debi tatake ni eni tata liti kebono piko ta-kitikeka toa yakeneya.

<sup>7</sup> Nitoa toa yawa Yesunomo-pala oa aua yakeneya.

### *Lisira Debi Tatake Tanemo*

<sup>8</sup> Lisira takepa niname kawata lepo taneya opiane ago pade kawa kautoa pikileka toamene ago eida meaneya.

<sup>9</sup> Einagomepa Poloyo agale okale yakakoa meaneya. Nitikale Poloyo one nepikoa pikale Akolaliyo one epetekamele toko wa einagome wene piadekale enekome telo okome okome

<sup>10</sup> neke kawata kiyotokoa kamokoa ka wa akeneya. Nitoa okaka tigatapekom yawa kakeneya.

<sup>11</sup> Poloyo enile tokale enekete e yename kini Likonia take akene agaleke ekete pule alita tone yagono ali latitapea toto pakeke i note kaki wa ka oa kakeneya.

<sup>12</sup> Nitiketepa Banabasi tobou pule ali Siasi wa ibini oa wa Polo Emesi wa ibini oa taneya. Polo mo wia kakago tokale Emesi wa ibini akeneya.

<sup>13</sup> Pule ali Siasike lodo yoai tane yapupa Lisira ta eko keneya wikakaneya kakeneya. Eni yapu talo tokagomeka ete yenameka i agotake lodo yatoe wa akeneya. Nitoapa talo agome yomo tidiyo pilia moa poke apetoa pitimekawe kai-meneka moa ta keteponeke aua pekeneya.

<sup>14</sup> Kitake lodo yoadete tokoimo yatekete Polo Banabasita wene poaneyea kakete kini kakene mamina iyatapeneya. Nitoapa eida oboa kakene yene pakeke teyapea kayo oawineya pekete ekete

<sup>15</sup> ame-lawe dekolo tiki-pe. Totapa kini yagono alita, pule alita menano, lodo yoa enile paya nou toa mekete tikile tewitikoa wawa Akolalike tepe kolotini pekoa piati wa kipala oko-ye. Einago Akolali pa mea kama nokagome tibu itonota tube ue toa latia eniya-meneke yakoiya-kitika latia taneyano, oneke wene tugamene.

<sup>16</sup> Einago Akolaliyopa namolo papete ta piko peya pitane yatename kinikile etepea toma yamotoa yopia kakeneya.

<sup>17</sup> Kinikile toma yakolika wawamokome eya toa pewe wima nekeneya. Kini pagu ama aua eya mekateka ta nomotoa toa ni nee noatekoi kotuke mea kolotini kakoa taneya. Ipa Akolaliyo tokome toko wa wene tomotoa ni taneyano, oneke odene wene tuga meamene wa Aposelo agotame akeneya.

<sup>18</sup> Nimo okolika e yename kitake lodo yoo-li wa neno oa kakoli poti oa kawikoa motokoli wakeneya.

**19** Wa naniko Yu yene Adioke Aikoniame tata kawa nekete i agota wia tukatono toe wa Lisira take ali atoa awitikataapea Polo deko a moa kueme kqua tukaneya. Nitoapa tukome tukono wene pia tayo lono lia aua pote pipaney.

**20** Nitane yake one oya-lawe one pikata unukapia kakoli kamokamotokome Lisira take wakapea pekeneya. Podolikama Solo Banabasitame Lisira ta tewitikoa Debi take pote mepaney.

### *Solo Banabasita Siria Ta Keneke Piko*

#### *Adioke Take Wakapea Pekenemo*

**21** Debi take Yesunomo eni epetane ko einagotame oa kakoli ali atoa peya matiyame yakoa motaneyake kini nokoina toa wakapeata pote Lisira Aikoniame tata pima pote Pisidia ta keneke piko Adioke take tugapaney.

**22** Nitoa pimata pekete kini agale yakoa motokoina yene mama motekete ekete Akolalinele wedoa takamo a yamene. Ni tone Akolaliyo talo toko take poadetepa ke enekakale-kama mea poo wa omata pekeneya.

**23** Kini losu yapu kaka peyakeka kiwi talo toatekoi ali-kiti takoa moa kakakala taneya. Nitoa nee wawa mea Ali Muno kowitikakete ekete i yene neeke wene tugoa mekino, talo toa kamene wa kini kowitikakala taneya.

**24** Nitoapa Pisidia ta ludu pimata pote tewitikoa Pabilia take pote mepaney.

**25** Pabilia ta keneke piko Peka take Ali Munagonomo oa meemotekete Atalia take keti pote mepaney.

**26** Eni ta tewitikoa ue dipike peapetekoa mea pote Adioke take wakapea nekeneya. Nipa i agotame nekele takama poadete tikino, neme talo toa pewe wima pamene wa kowitikakoina take kini eina pupu toa peya takamotekete wakapea nekeneya.

**27** Note meketepa Yesuke wene tuga meane yene peya moa obokaketepa Akolali patu kau-takoata kama pekete tokoinakamo i i wa toawea akeneya. Ni e ku mone yatename Yesunole takamotoa Akolaliyo ka pateko yametanemoka toawea akeneya.

**28** Nititikoapa Yesuke wene tuga meane yene-pala eida mea kakeneya.

## 15

### *Aposelo Ali-Kiti Yerusalem Take*

#### *Koukoa Mekete Akenemo*

**1** Polo Banabasita Adioke take eida pa mekakoa pade ali-kiti Yudea ta kawa nekete Yesuno agale yakoa motane ali-kiti olaukakete ekete Mosesene totono litikete kini kepene teigamotonoe toe. Toamokolipa Akolaliyo kiwi toa moamoo wa olaukaneya.

**2** Nitikoli Polo Banabasitame eni yene-pala agale liitakutukakoli Adioke yene koukoa mekete eya taneya. Polo Banabasita Adioke ali pade-meneka takoa moa kakakete ekete Aposelo ali-kiti Yesuno yatene yopiki ali-kitika Yerusalem take mekika eya wa yatekapoe. Toto pa yatene ali-kitameka Moseseyo akene toa kepene teigamotoa iki-pe wa yatekapoe wa wetekaneya.

<sup>3</sup> Wetekakoli Pinisia Sameria tata ludu pima yaketepa pa yatene-kiti Akolalike wene tuganemo toawea oma pekeneya. Nitikoli yatekete eni tatake Yesuno agale yakoa motane yename ke wa wedia meaneya.

<sup>4</sup> Nitaneyake kutu pima yawa Yerusalem take pote kakoli Aposelo ali-kitameka Yesuno yatene yopikoi ali peyameka einago-mene makutukoa motaney. Nitikolipa Akolali patu kautakoa kakete tokoinakamo i i wa toawea okoli

<sup>5</sup> yatekete eya ali-kiti Parisi totono litia toake Yesuno yatene-pala lipua meane ali-kiti kamokoa kakete ekete pa yatene eya wa olau kamene. Yesunomo yakoa mootokoapa ali yatene kepene teigoa Moseseyo yametane totono litia toa tamene wa olau kamene wa akeneya.

<sup>6</sup> Nitaneyake Aposelo ali-kitika Yesuno yatene yopikoi ali-kitika kouko mekete edemo ato patu wa wene kibutukoa meaneya.

<sup>7</sup> Nitoa ete oto wa agale takoa meapa Pita kamokakome okome ame-loe agale pade ukuno, yakoe. Akolaliyo namolo namolo kiwi pakeke no takoa motikilepa pa yatene mekoika Yesunomo oane mema pomotoa toka. Nipa eni pa yename Yesunomo yakoa moa oneke wene tugamotoa tokome ni toka.

<sup>8</sup> Ali atoa peyane tepene piko wene tetoa enekago Akolaliyopa one Epetane Yomini eni pa yenekaka awipomotoa wetekaka. Nipa totoke namolo takoa awinomotoa wetekakana toa toka. Einapa mone pa yeneka oneme takoa motokome tadeko wa totome wene tomotoa tokome ni toka.

<sup>9</sup> Edikakomepa toto Yu yatene eni pa yateneta

midi pikoa toka. Nitoa eni pa yatene ali atoane te-pene poane wene takoa koikakilepa pa Yesunomo yakoa moa oneke wene tugakoike ni toka.

<sup>10</sup> Nitikano, tone kaua-mikitame toma nekenele tamene wapa edekoli iki-pe. Tone kaua-mikitameka totomeka Moseseyo akene toa kepene teigatekoा one totono litia toadete wili toa kakilepa edoa litia tootapeko patu wa wene keda taneya mekete tokoo. Eni pa yatene alime Mosesene totono litia tamene wa ikilepa Akolali toa enekete tikino,

<sup>11</sup> wameo. Tone Ali Munago Yesuyo toto Yu yene toa motikilepa eni pa yatene toa motokome toko toa toko. Nipa one weneme pewe witikome toa motoko wa totome wene toko wa Pitayo akeneya.

<sup>12</sup> E koukoा mekoi peyame agale wametekoa Banabasi Polotame okoi agale pa yakakoa mekolipa o agotame Akolali patu kautakoa kama pekete pa yatene mekoika padele padele telekole kini wene kainya pikakoile toma yakoinakamo i i wa toawea akeneya.

<sup>13</sup> Nitoa oa peya takakoli Yame kamokakome okome ame-loe agale pade ukuno, yakoe.

<sup>14</sup> Akolaliyo pa yatene-kitika mama motokome eni yene padeka-kiti one wa pegetoa takoa motokome tanemo Pitayo ina toawea okano,

<sup>15</sup> Akolaliyo edikakomepa one agale papete toawea akene ali-kitame oa pianе toa taatekoа tadeko. Eya wa wia mekaneya piko.

<sup>16</sup> *Nititikaneyake wakapeane nekene eya tou wa Akolaliyo oka. Depidine yapu kilia tadoa tumu pikake eni-mene wa moane awitikakoane wikou.*

*17 Nitikolupa ete yene e ku pa yatene peyame no  
tuku toma noi. Nipa anu wane takoane moane  
kakapikou-kitame nitoi.*

*18 Kipala i ukupa i i wane namolo namolo wene  
takapikou ago Ali Munoyo uku wa one agale akane  
ago padame wiamekakaneya wa Yameyo akeneya.*

*19 Yameyo nimo ootokoa okome ile tatoane uku.  
Akolalike tepe kolotini peko piane pa yatene ali  
atoane wene moa keda takakayano, ile tamene ele  
toameamene wa tika tika toamato.*

*20 Nitamenya eyado tewitikoa wamene wa  
eni yeneke pipia wia wetekatoane uku. Paya  
gode-kitike lodo yotane nee tawe eya wawa  
noameamene. Koua piamatiki ali atoa-pala koua  
piameamene. Kamate ponamomotoa tokome  
kabe deko tukane sipi sipi kai tu eya eniya  
melepu moa noameamene. Kamateka moa  
noameamene wa pipia wia wetekatoane uku.*

*21 Ali atoa ta pitikoi peyake namolo namolo titi-  
moa Mosesene totonopa mo wia oma nekeneya.  
Opika ko mea pupu toamiki-pete-kama losu yapu  
kako toa one totono oi moa tqawea okala tikino,  
ta piko peya pitiki pa yatename one totono wete  
yakatapekete tiki wa Yameyo akeneya.*

### *Pa Yatene-kitike Pipia Wia Wetekanemo*

*22 Yameyo nimo okale ete Aposelo ali-kitameka  
Yesuno ali atoa yopiane ali-kitameka Yerusalem  
take losu oboai tane yene peyame oa togotokakete  
ekete agalepa widikoa wia wetekato. Polo  
Banabasita-pala opia pote Adioke take pipia-pala  
aua potokamene wa tone oyagota takuta takoa  
moa wetekato wa oa tukaneya. Nitoapa Yudase*

one pade ibini Basabasi einago-pala Sailasita takoa motaney. Ibini akene agota eni takoa motaney.

<sup>23</sup> Nitoa pipia wia wetekakete eya wa akeneya.

Yesuke wene tugoa meki-kiti Adioke Siria Silisia ta-meneke mekika kini pipia wia wetekako-ye. Nipa Aposelo ali-kiti Yesuno ali atoa yopiki ali-kiti kini oya-mikiti totome wia wetekaketepa mea epetekamene wa oko-ye.

<sup>24</sup> Toto-pala opia mekoi ali padeka-kiti kini tameneke ugu note mekete kini wene potokoa bebo akataapea tadikimo totome yateko-ye. Einapa totome amene wa okoomo wamekete pa kini wene kibutua akediki.

<sup>25</sup> Nitadikili yatekete ali takuta takoa moa tone kolotini agota Banabasi Polota-pala wida wetekato wa totome oa togotokakoo-ye.

<sup>26</sup> Einagota Banabasi Polotame tone Ali Muno Yesu Keraisunole takama yakilepa tukaya wa piti moamekete atiki toa taneya.

<sup>27</sup> Einagota totome oi pedoa pikoona toa tekete eyagota Yudase Sailasita takoa moa wida wetekako-ye. Einagota wida neketepa tone pipia wia wetekakomo kini kabunume kotukoa oa meoi.

<sup>28</sup> Eyado tewitikoa wamene wa Epetane Yominiyoka totomeka kipala oadete oko-ye. Kini wene keda takakaya tokolo pademo-kitika wamoko.

<sup>29</sup> Paya gode-kitike lodo yotane nee eya wawa noameamene. Kamate moa noameamene. Kamate ponamomotoa tokome kabe dekoe tukane sipi sipi kai tu eya eniya melepu moa noameamene. Koua piamatiki ali atoa-pala

koua piameamene. Enika enile takaya kekateko a yaketepa nipa epetekoa mekete toi. Tone agale eni peya tokono, wete kamene-ye wa wia mekaneya.

<sup>30</sup> Nitoapa kini takoa motokoina alita i pipapala aua poatino poe wa mea wetekakoli Adioke take pekeneya. Nitikete Yesuke wene tugoa meane yene peya obokoa eina pipia yawa metaneya.

<sup>31</sup> Nitikoli moa oi mootokoa ekete ipa wene yapeateko agaleno, ke wa wedia kakeneya.

<sup>32</sup> Einagota Yudase Sailasitapa Akolaline agale toawea akane agota tekete Yesuno ali atoa eida mane mane oa kaketepa tele lukoa wene weye a koa taneya.

<sup>33</sup> Nitoata mea kakolipa kita takoa moa wetekakoina yene mekoita wakapea poatino, tepe kolotini kilianeya poe wa kini oya-laweme ete wa wetekakoli

<sup>34</sup> (Sailasiyo wakapeane poamou wa eida pa meaneya.)

<sup>35</sup> Polo Banabasitaka Adioke take eida mea kakete ali atoa olaukoa Ali Munagono agale-pala toawea a koa taneya. Pade ali kainya matiyameka einagotame tane toa taneya.

### *Polo Banabasita Pilitakutukakete Tanemo*

<sup>36</sup> Wa naniko Poloyo Banabasi-pala okome tone namolo pote Ali Munagono agale oa metekoona ta-kitike einaka eina ali atoa edoa meki patuno, wakapea enema pato wa akeneya.

<sup>37</sup> Nitikale Banabasiyo eya ago Yone Make-pala aua pato-kale

<sup>38</sup> Poloyo wakome okome namolona einagomepa tota-pala Akolalinele takama yawake

Pabilia take pegene kakalogoa wawa pokana wa wakeneya.

<sup>39</sup> Nitoa neno oa letetakutukaneyake Banabasiyo Make-pala aua tube ue dipike peapetekoa pome mea Saiperase take witapaneya.

<sup>40</sup> Nitaneyake Poloyo Sailasi takoa moa poademe kakale kini oya-kitame i agota pewe wia talo toa kamene wa Akolali kowitikakoli

<sup>41</sup> Sailasi-pala aua pome Siria Silisia tata ludu pima pekeneya. Nitoa eni ta-kitike Yesuno ali atoa koukoai tane toa pokomepa Akolalinele wedoa takama pomotoa mane mane oma pekeneya.

## 16

### *Polo Sailasita-pala Timosi Opia Pekenemo*

<sup>1</sup> Poloyo nitima yakome Debi take pome mepaneya. Wa naniko eni ta tewitikoa Lisira take pome mepaneya. Eidapa Yesunomo yakoa motane ago pade one ibini Timosi meaneya. One ninepa Yu atoa Yesuke wene tugoa meaneyake one etenepa Geriki yatene ago.

<sup>2</sup> Lisira Aikoniame tatake mekete Yesunomo yakoa motane ali-kitame einago Timosi kei piai taneya.

<sup>3</sup> Poloyo one pukuka Timosi-pala auane pouno wene pikome tokome Timosine kepene teigamotaneyea. Nipa eni take pitikoi Yu yene peyame Timosine etenepa mone Geriki ago wa wene tekete Timosi aue paia titi tokaya tokale nitaneyea.

<sup>4</sup> Nitimotokome eni ta ludu ali atoa pitikoika Timosi-pala pima yakome eya taneya.

Yerusalem take Aposelo ali-kitameka Yesuno ali atoa yopiane ali-kitameka pa yatene-kitame Yesunole takama pekete toatekoi oi pedoa pikoina totono dika dika wa oa mema yakeneya.

<sup>5</sup> Nitikolipa Yesuke wene tuga meane yename Yesunole wedoa takamoa pokoli ete ali atoa kainya mati Yesuno ali atoa-pala lipuai lipuai taneya.

### *Polo Teroase Take Mekome Pulete Enanemo*

<sup>6</sup> Poloyo one oya-lawemeka eni ta tewitikoa Esia ta ludu agale oma poadete tokoli Epetane Yominiyo mena wa ka ketekakale Perisia Galesia tata ludu pima yakeneya.

<sup>7</sup> Nitoa pima yawa Misia ta kebonoke tuga Bisinia ta ludu kutu poadete tokoli Yesuno Yominiyo mena wa okale

<sup>8</sup> Misia ta patukataapea pote Teroase take keti witoa pekeneya.

<sup>9</sup> Eida ta likale Polo pule pitikome enekale Masedonia take ago pade kakome kowitikome okome Masedonia take toto auapenamene wa kowitikale yakoa enaneya.

<sup>10</sup> Nitoa Polo pia kamokakome pule kekale totome yatekete ekete einapa eni take pitiki yene-palaka totome Yesunomo onomotoa tokome Ako-laliyo kayo oa akedekono, patoe wa Masedonia take poatekole nodokoa kakoo.

### *Pilipai Take Eya Atoa Lidia*

### *Yesuke Tepe Kolotini Pekoa Pianemo*

<sup>11</sup> Nitoapa ue dipike peapetekoa pote mea Teroase ta tewitikoa Samoterese take pote

witakoo. Piimotekete podolikama Niapolise take pote mepokoo.

<sup>12</sup> Eni ta tewitikoa ka ludu pote Pilipai take mepokoo. Pilipai taapa Masedonia ta pikoka Lomane yatene awia note latiane ta. Eni ibini akene takepa ta pataka pade-mene toto mea kakoo.

<sup>13</sup> Eida meketepa ko mea pupu toamatekoo-pete eni ta kago ketepono patukoa eka yotane ue matanuke pokoo. Nipa ali atoame eida kowitzoi tekete tiki wa tuku toma pokoo. Nitao enamtukete witipitoa mekete eida oboa kakoi atoa-kitipala ko oa mekoo.

<sup>14</sup> Tone ko okoomo yakakoa kaka atoa pade one ibini Lidia. Einatoapa Taiataira take kudulu ue paigene mamina latia taneya. Onepa pa yatene atoameke Akolali kowitzoi taneya. Nitane atoa Ali Munagome wene takakale mekome Poloyo okamo yakoa motoka.

<sup>15</sup> Yakoa mootokoapa one yapu pitikoi yene peya-pala ue motaney. Nitikome okome kime no i atoapa Ali Munagoke wene tugoa meko wa wene piketepa nipa anu yapu meatono noe wa toto kowitzikale nipa pato wa one yapu pote mepokoo.

### *Polo Sailasita Po Yapu Pitanemo*

<sup>16</sup> Wa padepete eina kowitzoi taneta poadete pokolopa kueme topo toa moa egetane atoa padame toto kotuka. Einatoa ipono awitaneya mekomepa naniko witatekole papete toawea oa pikala taneya. Nipa e ku ali atoa-pala toatekale toawea oa pikome kinike kue moapa one egetane ali-kihi kamo takaneya.

<sup>17</sup> Einatoamepa Polo-loe toto pokooka litia kayo oma nokome okome ako odene meko Ali Muno Akolaline pupu takama yaki ali-kiti i pinikino, enoe. Akolaliyo toto toa motokome toko agale oa mema pinikino, yakoe wa kayo oma noka.

<sup>18</sup> Ta pataka pade-mene enile toma nokale Poloyo yakama pome teko tokale ete peketapekome ipono-pala okome Yesu patu kautakoane kakene ukuno, einatoa takoa pa wa okaka eina eina takoa poka.

<sup>19</sup> Nitikale one egetane ali-kitame ekete ae i atoame naniko toatekomo opi amele toamokono, tone kamoe edoa toko patu wa wene poaneyaa kakete Polo Sailasita dekoe motaneya. Dekoe moa makesike liimoa aua pote Kanosolo yenane lene yoto kakapokoi.

<sup>20</sup> Nitoa koiso yatekakoi-kiti mekoita aua pote kakakete ekete i agotapa Yu agotano, tone i take pitiki yene eya toa kamotokaki.

<sup>21</sup> Toto i take pitiko yenepa Lomane yatenekae i agotame kini totono pianele olaukoa tikino, tone kekanele tomotoa tekete ni tiki wa ahoa okoi.

<sup>22</sup> Nitikolipa eida oboa kakoi-kitame eni yene-pala kibutua kakete winagota wiatoe wa kayo oa kakoli koiso yakakakoi yenane Polo Sailasita poyo ali-kitike metekete ekete i agotane mamina kotokoa pia layome wiamene wa moa metekoi.

<sup>23</sup> Nitikoli moa wiai toa kawa po yapu pitikapekete po yapu yopikago-pala ekete winagota wedoa nepikoa kamene wa pekeneyaa.

<sup>24</sup> Nitaneyake po yapu yopiane agome einagota moa ekolo yapu keneke pome pitikapokome kini kawata tau toologoa pekeneyaa.

**25** Nititikaneyake tube likonu Polo Sailasitame Akolali kowitoa lo oa mekoli ete po yapu pitane-kitame yakakoa mekoika

**26** momani toka matiyame eni po yapu lokokoa aua yakome kago-kiti peya odepeta wia peetapekala taneya. Po yapu pitane-kiti kini yono kawatake kakane kapa po-pala kotokoa pitaney.

**27** Nitaneyake po yapu yopiane ago pia kamokoa pokome enekale po yapu kago peya peetapeneya pikale enekome okome ekee po yapu pitane-kiti wete pitoa pootapekete tiki wa one kepete tue witimoa pinali one wa wia tukademe kakeneya.

**28** Nitikale enekome Poloyo kayo telo okome okome toto peya i kakono, pinali neke wa wia tukamea wa kayo akeneya.

**29** Nitikale yopiane agomepa tole udukoa aua noo-ye wa kayo oa moomotokome po yapu keneke teyapea pokome Polo Sailasitane kawane aua pitaney.

**30** Kolu kolu nokale aua pitoa mea kamokakome einagota akolono moa aua pokome okome kamo koniyalita Akolaliyo no toa momotoanepa edele tou-pe-kale ekete

**31** Ali Munago Yesuke wene tugamene. Nitikalepa Akolaliyo neeka neke yapu pitiki peyaka toa moo wa ootokoapa

**32** po yapu yopikago one yapu pitikoi peya Ali Munagonomo oa metaney.

**33** Oa peya tokale tube likonu po yapu yopikagome einagota moa kiwi layome witaneta kamate koa togotokaney. Nitoa eina eina einagomeka one mati atoa peyameka ue motaney.

**34** Ue mootokoapa yopikagome Polo Sailasita one yapu aua pokome kini nee takoa lawetaneya. Nitaneyake einagoka one mati atoaka Akolalike wene tugakete tekete ke wa wedia meaneya.

**35** Podolikama likonu witia koiso Kanosolo ali-kitame kini poyo ago-mene moa po yapu yopiane ago mekata wetekakete ekete winagota poe wa wetekamene wa akapoe wa wetekaneya.

**36** Nitikoli pote akapokoli po yapu yopikagome Polo opokome okome koiso Kanosolo ali-kitamepa Sailasi kita wetekakamene wa oa wetekadikino, tepe kolotini kilikoa pimotonu pamene-kale okome

**37** abelapa Sailasi totame tokoomo pitia yakamekete ali atoane lene yoto pa puputua layome wikala tokoi. Totapa Lomane yatenagotake tokoi. Nititikoa po yapu pitikakoina. Opa tota paigakoapa edoa pomotoa iki-pe. Paigakoa poamoo-li. Eina ali-kti oto nekete Sailasi tota ka ludu wetekamotoane uku wa Poloyo akeneya.

**38** Nitikale poyo ago-mene koiso Kanosolo ali-kti mekoita wakapea pekete Poloyo okanakamo tqawea opokoli ekete ekee einagotapa Lomane yatene agotake witikete tadeko wa piti moa kakeneya.

**39** Nitoa po yapu pekete einagota-pala ekete poanele tekete tadekono, ela toko wa akolono wetekapaneya. Nitikete ekete tone i ta tewitikoa pamene wa kowitikoli

**40** po yapu tewitikoa pote einakatoa Lidiane yapu pekeneya. Nitoapa kini oya-mikiti eida enekete piti moatoane toamuku wa kini wene

epetekoa mea pekeneya.

## 17

### *Polo Sailasitame Tesalonaika Take Tanemo*

<sup>1</sup> Polo Sailasitame Pilipai ta tewitikoa Abipolise Apolonia tata patukoa pote Tessalonaika take tu-gapokoi. Eni takepa Yu yenane losu yapu pade eida kakeneya.

<sup>2</sup> Eidapa Polo one tanele tokome losu yapu pokala toka. Nipa Yu yene ko mea pupu toamatekoi ta tebolo pataka toa-kama pome kakome Akolaline bokuke wia mekane agaleke eni yene-pala agale topo takoa okala toka.

<sup>3</sup> Nipa Akolaline bokuke Yesuke wia mekapiane toa pine toawea okome okome Keraisu tete moa tuake kamoai pikilepa nipa Akolaliyo wene toop-iane toa taateko tamedekale taneya. Kipala i toaweanne uku ago Yesu onepa eina papete Keraisu wa ibini oa piane ago wa Poloyo okala toka.

<sup>4</sup> Nitikale e Yu yene padeka-kitame one agale yakoa moa Polo Sailasita lono takanokoi. Akolalike nate wene pia lukoa meane pa yatene ali atoa peya matiyameka ibini akene atoa padeka-kitameka einagota-pala lipunokoi.

<sup>5</sup> Nitaneyake Yu yenane einagota-pala wene poaneyea meapa nego noma yakene ali-kiti make-sike loyo mekoika tuku toa moomotekete yapu ludu eni take yene oa kamotokama pote eya ago Yesone one yapu pekeneya. Nipa einagota moa akolono ali atoane lene yoto moa kakato wa tuku topaneyea.

<sup>6</sup> Nitoa tuapetaapea tuku toa teko tokale yapu pinago Yesone dekoa motaneyea. Keraisuno agale

yakoa motane ali padeka-kitika dekoa moa lia aua Kanosolo ali-kiti mekoita pekeneya. Nitoa kayo ekete ekete ta piko peyake ke enekawineya yaki agota opa tone take tuga note mekete tiki.

<sup>7</sup> Einagotapa Yesoneyo makutukoa motokome one yapu pikoa meko. Einagotameka kini oya-mikitameka ako tobou ago Sisane totono tetekakete ekete toto peya lukoa meateko tobou ago pade meko. Einagono ibinipa Yesu wa iki wa kayo oa kakeneya.

<sup>8</sup> Nitikoli yatekete eida oboa kakoi-kiti Kanosolo ali-kitika ekee wa tepe ate keti enoai toa kakeneya.

<sup>9</sup> Nitaneyake Kanosolo ali-kitame Yesone einago one oya-mikitika kikoa ekete ekete wa dikamoatino, opi kini oto toatiki kue meo wa okoli metekoli kini yapu ludu poe wa wetekaneya.

### *Polo Sailasita Beria Take Mekete Tanemo*

<sup>10</sup> Ta likaka Yesuke wene tuga meane ali-kitame Polo Sailasita Beria take poe wa moa wetekakoi. Nitikoli pekete eni take Yu yenane losu yapu wete eni pokoi.

<sup>11</sup> Eni take pitane Yu yenepa Tesalonaika Yu yene keneya mena. Epene wene pianeya mekete Yesunomo wete yakoa motekete ekete i ago Poloyo imo ikilepa Akolaline boku keneke piko agale ko-tuke oko patuno, tuku toa enato wa Akolaline boku ta pataka abuna lewea enoai toa kakoi.

<sup>12</sup> Nitoapa padeka-kitame nimini eni akedeko wa Yesuke wene tugakoi. Ibini akene Geriki atoa padeka-kiti Geriki ali padeka-kitika Yesuke wene tugakoi.

**13** Nitaneyake Poloyo Beria take Akolaline agale oa mekala toko wa akedekoimo yakamotekete Tesalonaika Yu yene nekete Beria take ali atoa oa kamotokakoi.

**14-15** Nitikolipa Sailasi Timosita Beria take pa kamotoa Yesuke wene tuga meane yenamepa Polo ne ita meamoano, kusa ue matanuke wete pa wa Polopa ka ludu Atena take wetekapaneya. Wetekamotekete Beria take wakapea nokoi. Nipa Poloyo Sailasi Timosita one mekuta oto nomotoane ukuno, akapoatino poe wa wetekakale nokoi.

### *Poloyo Atena Take Mekome Tanemo*

**16** Sailasi Timosita nomotoa Polo Atena take eida nepia mekome wene keda taneya meaneya. Nipa iya-kiti kowitato wa padefa padefa adeka pia latia kakane yomini-kiti eida kaatapekale enekome tepe we tokale meaneya.

**17** Tepe we tokalemekome tokome eya taneya. Yu yenane losu yapu pokome kakome Yu yene-palaka Akolalike nate wene pia lukoa meane pa yene-palaka agale topo takoa okala taneya. Makesikeka ta pataka abuna pokome ali atoa kotua enekome agale topo takoa oa kakeneya.

**18** Nitikalepa Epikuriane totono litia tane ali-kitame Sitoike totono litia tane ali-kitameka Polopala agale topo takoa okala taneya. Nitoapa padekame ekete i pamo okagome edemo okome oko patu wa oa wa padekame ekete mone godekitike oko patu wa oa taneya. Nipa Yesu tua pekeneyake Akolaliyo moa kamotokanemo yatekete tekete ni akeneya.

**19** Nitoa Polopa Ariopagase wa ibini akene Kanosolo yapu aua pekete ekete neke eina okanapa namolo yakamokoonamo okanano, pine yakadete oko.

**20** Neke kuka kake okanapa monekemo ena okanano, pine tqawea oano ta wa akeneya.

**21** (Atena ta pine yene t<sup>o</sup>a nekene yeneka loyokama mekete eya taneya. Padele padele weneleke agale topo takoa oa ni titia oko agale-kitika yakoa tokala taneya.)

**22** Polo eni Ariopagase wa ibini akene Kanosolo yapu eida pokome eni yenane lene yoto kamokoa kakome okome anu oya-lawe Atena take meki-kiti agale pade oane metekuno yakoe. Kini yapu ludu yakene enekolu e ku gode-kitike lodo yotokoile enekou.

**23** Nitikene kini yoname latia kakoa kowitane gode-kiti enema penekene eyaka enekou. I agoke lodo yotikilepa one ibinipa wene toameketeketoko wa wia mekanemo oi motokou. Eina wene toameketeketoko kowitiki godepa paya nou toa kowitzikiyake noanumepa wene tuku. Onekemoouno, yakoe.

**24** Einago Akolaliyopa itono latia eniya patu witoa kakoya peya latia taneya. Einagopa tibu itonota yopia meko Ali Munagono, alime wilakane losu yapu keneke meamele toamoko.

**25** Einagomepa ali atoa toto wene takoa poome meko padehya padehya peya kini wa latia pikaneyano, one auapeato wa tone yoname mitikoa latikoonakeya edoa meamoo.

**26** E ku yatene peyapa odenago Adameke t<sup>o</sup>wa ta piko peyake alama pomotoa oneme taneya. Eni

yatene peyapa kini titimoa alama noatekoi oi kini atua tdatekoi oika oneme pedoa pianeya. Kini tutu tutu wa ta latia pima poatekoikaka oneme oto pikapianeya.

<sup>27</sup> Nipa e ku yatename one tuku toma yakete tugawineya lau lau enoa enamumotoane tuku wa taneya. Nipa tone tone mekoya liti mekomeke taneya.

<sup>28</sup> Enikepa panagome eya wa akeneya. Akolaliyo totopa wene takoa poome mekoa tokono, one patu-kama kautakoa kama yako wa akeneya. Eni akene toa kini lo agale wene kibutua akene yenameka eya wa akeneya. Totoka Akolaline mati-kiti wa akeneya.

<sup>29</sup> Totopa Akolaline mati-kitino, golo silepa eya kamo kue pa kueka moa one adekapa i wa totome edoa latiato-pe.

<sup>30</sup> Namolopa ali atoame one adeka pia eya kuya yomini latia kowitikilepa one wene toamekete tekete ni tiki wa Akolaliyo kibu moameneya. Opa ali atoa peya kini poanele tikile tewitikoa wawe wa oa tukako.

<sup>31</sup> Nipa ali atoa peya kini toma yakoile kiyoke-kama takoa enoa akateka oi Akolaliyo wete meepianeya tokome ni oko. One takoa moa kakapiane ago one patu kautakoa kakome takoa enoa akoo. Nimini eni akedeko wa toto peyame wene tomotoapa one eni moa kakapikanakago tua pokale Akolaliyo moa kamotokaneya wa Poloyo oka.

<sup>32</sup> Tuane ago moa kamotokanemo okale yatekete padeka-kitame one yau takoa kakoi. Nitaneyake padeka-kitame ekete neke wini

okomo wa yakoono, padepete wa onamene wa okoi.

<sup>33</sup> Nitikoli Poloyo eni Kanosolo yapu tewitikoa poka.

<sup>34</sup> Pokalepa eni yene padeka-kitame einapa nimini oka wa one-pala lipua mea Yesuke wene tugakoi. Nitane yenepa panago Ariopagase Kanosolo ago Dayonisiasi ni padatoa one ibini Damarisi. Pade ali atoaka Polo lono takanekete Yesuke wene tugakoi.

## 18

### *Polo Korine Take Ponomé Mekome Tanemo*

<sup>1</sup> Nititikaneyake Poloyo Atena ta tewitikoa Korine take pome mepokome

<sup>2</sup> Yu ago pade eida kotuaneya. Einagopa Podase take opiane ago Akuwila wa ibini akene ago. Einagopa Lome take toa pome mepaneyake ako tobou ago Kelodiasiyo Yu yene peya Lome ta tewitikoa poe wa tikatapekale Akuwila one natono Perisila-pala Lome ta toa Korine take pome mepaneyea. Einago Akuwila adonane yapupa Polo ugu pome mepaneyea.

<sup>3</sup> Akuwila adoname mamina yapu latia taneya. Poloone odene pupu tokago tokome eida kita-pala mekome mamina yapu latia meaneya.

<sup>4</sup> Nitoa mekome ko mea pupu toamatekoi-pete-kama losu yapu pokome Yu yene-palaka Yu yene lono takanane Geriki yene-palaka agale topo takoa okala taneya. Nipa Yesunomo yakoa momotoa toa enekala taneya.

<sup>5</sup> Wa naniko Sailasi Timosita Masedonia ta kawa note mekoli Poloyo eni pa pupu tewitikoa wawa

Yesunomo-kama Yu yene-pala oa mekala toka. Nipa Yesu onepa eina Keraisu wa papete ibini oa piane ago taatekoia nekeneya wa oa mekala toka.

<sup>6</sup> Nitikale e Yu yene one-pala neno oa poanemo oa kakoli one tokoo kakene mamina petekakoa kakome okome Keraisunomo oane metekolu yakamadete wakoike Akolaliyo nami wia kibu moono, nepio. Enipa kini kogono. Opi titimoane Keraisunomo e ku pa yatene pitikika oma pukuno, Yu yene kiwi pa tuati wane tewitikoane wakuna wa oka.

<sup>7</sup> Nitoa e Yu yene tewitikoapa kini losu yapu kakaya liti kakene yapu pome mepoka. Nipa eya ago Tisiiasi Yasasi Akolalike lukoa mea kowitik-agono yapu eni pome mepoka.

<sup>8</sup> Wa naniko eina Yu yenane losu yapu talo tane ago Kerisipasi einago one mati atoame Poloyo okamo yakoa moa Ali Munagoke wene tugakoi. Korine take mone pa yatene ali atoa peya matiyameka Poloyo okamo yakoa mootokoa ue mokala tokoi.

<sup>9</sup> Wa padepete ta likale Ali Munoyo Polo pule metekome okome piti moamemeneya agale wedoa oa meemoa pamene. Agale teigoa wawameamene.

<sup>10</sup> Ne auapeane kouane pekene tekene ni uku. I take pitiki ali atoa kainya mati nooke lukoa mekino, ete-kitame ka ketekoa ne tete metekileka toamoi wa akeneya.

<sup>11</sup> Akolaliyo eina okana toa Polo Korine take eida mekome ali atoa olaukoa meka. Nipa tokene kalabe kakoa (18) ponoka toa Akolaline agale olaukoa meka.

<sup>12</sup> Eina-pete-mene Lomane yename eyago

Gilio neme Geriki ta talo toa meamene wa moa kakakoli talo toa mekakoa Yu yene koukoa Polo dekoaa mootokoa Galioyo koiso yopiamekata auapokoi.

<sup>13</sup> Nitikete ekete i agomepa toto Yu yene Akolalike nate wene pia kowitikete toatekole olaukakomempa tone totono piko toa toamokono, neme pitia yatekoano ta-koli

<sup>14</sup> Poloyo agale awa oademe kakaka Galioyo e Yu yene-pala okome kipala i ukumo yakoe. I agome padele poaneleka tone totono tetekaneleka tokaledo nooke lia auanoi tokapa nipa kipala poti ko ootokoane winago pitiane yatekou toka.

<sup>15</sup> Nitikou tokake kimepa pa natele deyakeka kini totono tetekanekeka i ago pa puputua lia auanikino, enika eni dikane notokanemopa yakamouno,

<sup>16</sup> kini pitia yakoatino, poe wa one koiso yapuke tikatapeka.

<sup>17</sup> Nitikale kini losu yapu talo tane ago Sosenisi dekoaa mootokoapa koiso yapu eko kamotoa layo toua wikala taneya. Nitoa kamotoa Galio paya nou toa meaneya.

### *Polo Adioke Take Wakapea Pekenemo*

<sup>18</sup> Polo Korine take eida pa mea kakeneya. Wa naniko Siria take wakapeane pukuno, poti kamene-ye wa one oya-mikiti-pala oomotokome ue dipike peapetekoa pome mea Korine ta tewitika. Nipa Perisila Akuwilata-pala opia pokome Senekeria take pome dekoaa pipokome eya toka. Ile tou wa Akolali-pala papete oa

pikana toa taatekoao tokome one tobou pine eida pitukamotoka.

<sup>19</sup> Nitapa ue dipike peapetekoa pome mea Epesase take witapaneya. Eidapa Akuwila adona tewitikatekoapa Yu yenane losu yapu pome kakome eni yene-pala agale topo takoa kaka.

<sup>20</sup> Nitikale eni yename kiwi mekota poti mea kamene wa kowitikoli waka.

<sup>21</sup> Wawa tewitikoa poade me kakome okome Akolaliyo pa wa wetekakalepa nipa nani oto none menou wa oomotokome ue dipike peapetekoa pome mea Epesase ta tewitikoa Sisaria take witapeka.

<sup>22</sup> Nitoa Sisaria take ete katepitoa ka ludu pome Yerusalem ate pome mepoka. Eida Yesuno yene-pala ko oa meemotokome Adioke take keti pome mepoka.

<sup>23</sup> Eidapa Polo mea kawa pome Galesia Perisia tata ludu pima yakomepa Yesuno ali atoa peya wene weye akama yaka.

### *Apolosi Epesase Korine Tatake Tanemo*

<sup>24</sup> Yu ago pade one ibini Apolosi Alesaderia take opianeyake toa nome Epesase take menaneya. Einagopa agale muno pewe kakoa oa kakene agome Akolaline bokuke wia mekane agale wene agopa moameneya tepene yakoa luaneya.

<sup>25</sup> Ali Munagonole takama pokome toatekale olaukane ago tokome Yesunomo i i wa kiyoke-kama wedoa olaukakala taneya. Einagomepa Yoneyo ali atoa ue motokama yakome olaukanemo yakoa motaneyake Yesuyo

Epetane Yomini ali atoake awitikanemo wete yakameneya.

<sup>26</sup> Nitane ago Yu yenane losu yapu pokome olaukakilepa piti moameneya taneya. Nitikale yatekete Akuwila Pirisilatame kini yapu aua pekete Akolalinele takakome toateka ko pine toa olaukoa kakeneya.

<sup>27</sup> Wa naniko Apolosi Geriki take poademe okale one oya-laweme auapekete eya taneya. Geriki take Yesuke wene tugoa meane yene meateka pipia wiamekakete ekete i ago Apolosi wida nokale wedoa makutukoa moamene wa wia mekakaneya. Nitoa metekoli Apolosiyo moomotokome Geriki take pome mekome eya taneya. Akolaliyo pewe wia kakale tekete Yesuke wene tugane-kiti wedoa auapekala taneya.

<sup>28</sup> Nitikome okome Yesu onepa Keraisu wa papete ibini oa piane ago wa Akolaline bokuke Keraisuke wia mekane agale pine toawea akeneya. Nipa kini lene yoto kakome Yu yene-pala agale muno pewe kakoa oa kakale ete agale topo takamele toameneya.

## 19

### *Polo Epesase Take Ponome Mekome Tanemo*

<sup>1</sup> Apolosi einago Korine take mekakoa Polo tono tono pake ka ludu pima yakome keti Epesase take ponoka. Nitoapa Yesuno agale litia tane yene eida kotukome yatekome okome

<sup>2</sup> Yesuke wene tugakolipa Epetane Yomini ki-wike awinoka-pe-kale ekete e'e mena. Eni Yomini ko yatekileka toamokoo-koli okome

<sup>3</sup> ue motikilepa tene agale litia tokoi-pe wa okale ekete Yonene agale wa okoli

<sup>4</sup> Poloyo okome Yoneyo ali atoa ue motokakilepa kini poanele tewitikoa wamotoa taneya. Nipa one liti naniko nokagoke wene tugamene wa oa taneya. Eni akenepa Yesuke okome akeneya wa Poloyo oka.

<sup>5</sup> Poloyo enimo okale yatekete eni yename Ali Munago Yesuno ibini wedekoa ue motokoi.

<sup>6</sup> Nitikoli Poloyo kini mataike yono pikale Epetane Yomini kiwike awinokale agopa tane agaleke emo kumo oa ni Akolaline agale tqawea akoa tokoi.

<sup>7</sup> Enilepa ali tuku kakoame (12) tadiya tokoi.

<sup>8</sup> Polo Yu yenane losu yapu pokome Akolalinemo i i wa piti moameneyakakome oa mekala toka. Nipa Akolaliyo ali atoa talo tokome tokomo yakoa momotoa agale muno pewe kakoa oa mekala toka. Tokene tebolo ponoka toa nitikala toka.

<sup>9</sup> Nitikale eni yene padeka-kitame Poloyo okamo kote tokale yakamadete wakete ali atoa kakakoa Yesunolepa pale tane tetepo takoa tea agale oa kakoi. Nitikoli Poloyo e yene tewitikakome one agale yakoa motokoina yene takoa moa eya ago Tiranas one sukili yapu pato wa poka. Nitoapa ta pataka abuna eida-kama one eina oya-lawe-pala agale topo takoa oa kakala toka.

<sup>10</sup> Mali takutake Poloyo nitikala taneyake Esia take pitikoi Yu ali atoa mone pa yatene ali atoa peyame Ali Munago Yesunomo yakatapekoi.

*Sipane Mana-mikitame Tanemo*

<sup>11</sup> Polo Akolali patu kautakoa kakome ele kule telekole toma yaka.

<sup>12</sup> Nitikalepa Epesase yenamepa Poloyo pikoa kakene pue nateya wane-kiti moa aua pote yene tane ali atoa tiginike letetekapokoli kini tane yene takoa pootapekala taneya. Ali atoake awitane ipono-kitika takoa pokala taneya.

<sup>13</sup> Ipono takoa wetekakala tane otoi ali padeka-kitame Ali Munago Yesuno ibini wedekoa ipono takoa wetekoa enekala taneya. Nipa ipono-pala ekete one agale toawea akama pomotoa Polo moa kakapiane ago Yesu einagono ibini wedekoa eya wa oko-ye. Winago takoa pa wa okala taneya.

<sup>14</sup> Sipa wa ibini akene Yu agono mana tatono kokoame (7) enile taneya. Sipa einagopa Akola-like lodo yotokoai tane tobou ago.

<sup>15</sup> Einagono mana-mikitame Yesuno ibini wedekoa okoli ipono padame okome Yesu wene toane Poloka wene toane tukuyake kiwi wene toamukuno, mainali-kitame iki-pe wa okale

<sup>16</sup> one awitikanakagome eina ali-kti aukamo pokome wia atukaneya. Nitikale yapu mea akolono wititapekete teyapea pitoa pekeneya. Nipa kini mamina kawameneya kamate tuawineya pekeneya.

<sup>17</sup> Eni tanemopa Epesase take meane yene Yu yeneka pa yeneka eni yene peyame yakatapeney. Yakatapekete piti motaneya mekete Ali Munago Yesuno ibini kamotokaneya.

<sup>18</sup> Nitaneyake Yesuke wene tugoa meane ali atoa peya matiyame kini poanele pa kaukoa toma yakoinakamo i i wa toawea akeneya.

**19** Otoi ali padeka-kitame kini boku-kiti oboa moa pala pitikoa wakete ali atoane lene yoto toele yotaneya. Kini boku-kiti motekete wetekane kue oi moteketepa ege egeta kadukoa (50,000) silepa kue lene wetekadekoi.

**20** Enika enile tanele-kitikepa Ali Munagonomo ta piko peyake oa pupitikataapea Setanuno peku moa kautakama pekeneyea.

### *Epesase Take Ali Atoa Oa Kamotokanemo*

**21** Nititikaneyake Poloyopa Masedonia Geriki tata ludu pima yawane Yerusalem take pone mepou wa wene pianeya mekome okome Yerusalem take pone meemotekene Loma takeka pou wa oka.

**22** Nimo ootokoa eya agota one auapea koua yakoi agota Timosi Erasasi kita namolo takoa pote mepoatino poe wa Masedonia take wetekatekoia Esia take one pa eida meaneya.

**23** Einapetepa Esia take meane yene Ali Munagonoleke poane wene pianeya mekete ali atoa oa kamotokaneyea.

**24** Eni poane wenepa Demiteriasiyo pine wia titianeya. Einagomepa silepa kueme pule atoa Atemisine losu yapu adeka pia yapu yomini deya latikala taneya. Eni de yapu-kiti kenekepa eni take yename pule atoane yomini moa kakoa kowitzoi taneya. Pule atoane losu yapu yomini latia topo teketepea Demiteriasi einagomeka one eni pupu takane ali-kitameka kamo toma pekeneyea.

**25** Einagome one pupu takane ali-kitika eni odene pupu tane ali-kitika moa obokakome

okome pule atoa Atemisikepa tone kamo toma pok.

<sup>26</sup> Nitikoyake tone ika iyapa Poloyo paya tetepo takama pokolo kime enoa yakoa tiki. Enilepa Epesase take odene toamoko. Tone Esia ta piko peyake pima yakome okome pule ali atoa eyane yomini kini yoname mitikoa latikoinakeya-kitipa Akolaline yagono mena wa oma yako. Nipa ali atoa peya matiyame one agale etepea litia tomo-toa tokome toko.

<sup>27</sup> Nitikono, ali atoame tone toko pupupa poane pupu wa wakete pule atoa Atemisika one tube losu yapuka paya tetepo takoi. Esia ta keneke pitiki yene ete ta piko peya pitiki yene toto peyame einatoanele takama pokoyake nitoi tokolo uku wa Demiteriasiyo akeneya.

<sup>28</sup> Nimo okale yatekete e yene kotimi wene luaneya kakete agale telo oa kakete ekete toto Epesase yenane pule atoa Atemisi ako atoa meko wa uu kayo okoa kakeneya.

<sup>29</sup> Nitaneyake Epesase ta piko peyake ali atoa uu kayo oma yakete ete patuka oto patuka toa kakeneya. Nitoapa Masedonia agota Gayasi Arisaka-sita Polo-pala opia yakene agota dekoa moa kini oboai taneta lia aua pekeneya.

<sup>30</sup> Nitikolipa Poloyo eni yenane lene yoto kakene agale oukene eida pou wa okale one agale yakoa motokoina yoname poamea wa agaleme lauane lauane tokoi.

<sup>31</sup> Esia take Polo-pala oya kakane tobou ali padeka-kitameka Poloke agale oa wetekakete ekete ani yene oboa kakita poamea wa okoi.

<sup>32</sup> Eida oboa kakoi yene wene bebo ootapeneya kakete padekamepa pade kayo oa padekamepa pade kayo oa taneya. Nitaneyake padeka yene peya matiyame edekale nokotu patu wa wene kibutua kakeneya.

<sup>33</sup> Nitaneyake Yu yename Alesada takoa moa eni yenane lene yoto kakakoli pade ali-kitame one-pala kayo okolipa ina poto witakanapa i tokaleke taneya wa Alesadayo oademe yoname kawikoa enekale ekete

<sup>34</sup> beita i agopa Yu ago tadeko wa peyame eya wa uu kayo oa kakeneya. Toto Epesase yenane pule atoa Atemisi einatoapa ibini akene atoa wa kayo okala taneya. Nipa lou pini takutake pa einakamo-kama kayo oa kakeneya.

<sup>35</sup> Nitaneyake Kanosolo yapu yopiane agome eni yene kawikoa motokome okome Epesase yene ame-loe kipala agale pade oane metekuno yakoe. Ibini akene pule atoa Atemisi one losu yapupa toto Epesase yename talo toa meko. A tibu pia ketipea pitane kuepa ipa pule atoane adeka tadeko wa totome enamua moa talo toko. I ukumopa ta piko peya pitiki-kitame wene taneya meki.

<sup>36</sup> I ukumopa padameka kapene agale winipa oko wa wamoino, padele tikilepa mekamotekete pitoa toameneya poti kilikoa mea toati.

<sup>37</sup> Kime i alita oto lia aua nikilepa tone losu yapu keneke pikoya-kiti kode noamoa pule atoa Atemisi taumada toamoa tokoinake tokoi.

<sup>38</sup> Eya ago Demiteriasiyoka one pupu ali-kitameka padagono koiso akouketedo tadekolipa nipa koiso oatekoi-pete Kanosolo ali-kiti oboa mekoita koiso akamotonoe toe.

**39** Padele tanemoka pitia yatekamotoapa nipa Kanosolo ali-kiti-pala ali atoa peya oboa mekoipete kini koiso aua namene.

**40** Opi ali atoa oa kamotokakilepa kime tokoi wa Lomane tobou agome toto kikoa akaya tokolo uku. Totodo kikoa okalepa tone kei pia oatekomo toamoono, wawe wa einagome eina yene moa kawikaneya.

**41** Nimo ootokoaa kakome eni yene poe wa wetekaneya.

## 20

### *Polo Masedonia Geriki Tata Ludu Yakenemo*

**1** Eni yename agale oa kawitikaneyake Poloyo Yesuno agale litia tane yene moa obokakome kini weneke tele lukoa mea opi pukuno poti meamene wa Masedonia take poka.

**2** Masedonia ta ludu pima yakome ali atoane wene epetekoa pademo pademo oma-kala pome Geriki take tugapoka.

**3** Geriki take tugapokome tokene teboloke eida mea kaka. Nitaoapa Siria take ue dipike mea poademe tokaka Yu yename one wia tukatekoi oi pedoa piadekoimo yakatekoapa Masedonia ta ludu eka patukoane pou wa poka.

**4** Pokale eya ali-mene one-pala opia pokoi. Beria take opiane ago Pirasine mana Sopata ni Tsalonnaika take opiane agota Arisakasi Sekadasita ni Debi take meane ago Gayasi ni Timosi ni Esia take opiane agota Tikikasi Teropimasita eina ali-kiti Polo-pala opia pokoi.

**5** Nipa toto naniko nomotoapa einali-kiti Polopala ka ludu opia pote Teroase take tuga nepia meaneya.

**6** Nitikakoa totome eya tokoo. Pilipai takepa yisi kugu pitikamene palawe wa ibini akene toge kiatekoi oi nokale eni toge nee noomotekete ue dipike peapetekoa pote mea Pilipai ta tewitikoo. Nitoapa ta ko kakoa (5) pataka-pete Teroase take e ali-kiti wete pote mepokoita witoa nekete ta tatono (7) kakoa-peta patamotoa eida mea kakoo.

### *Polo Teroase Take Pome Mepokome Tanemo*

**7** Toto Teroase take eida meapa ta pataka egeme palawe wane popimoa noadete oboa mekoo. Poloyo podolikama poademe tokome agale oa-kama kawa tube likonu teigakaka.

**8** Toto eida oboa mekoota ako yapukepa labo peya mati udukaloganeya noa kaka.

**9** Tuali pade one ibini Yutikasi eida widoa waneke yakakoa meka. Poloyo agale oa-kama kakakoa einago atu togoikoa mea widoa waneke pitiku pokome toa togoikamotokome itono keita pitaka. Nipa eni yapu kibutate toa walai tebolo tatima pekeneyake ako yapuke pia togoikamotokome pitaka. Nitikale o yename keti toa pekete ekete ae tuadeko wa kamotokoa motokoi.

**10** Poloka keti toa pokome einago patu aua pitakome tebea motokome okome i agopa tuameadekono, mama moameamene wa oomotokome

**11** ate wa ako yapu pome mekome palawe wane popimoa nootokoa e yene-pala agale wa topo toakala kawa ta patakakoa poka.

<sup>12</sup> Nitaneyake eina tuali tuake wa latoa kakalepa pade-kitame one yapu koua pokoi. Nitapa peyame ke wa wene weye akeneya meaneya.

### *Poloyo Teroase Ta Tewitikoa*

#### *Mailitase Take Pome Mekome Tanemo*

<sup>13</sup> Nitaneyake Poloyo one naniko Asose take ka ludu nouno, kiwi namolo takoa mepoatino poe wa toto-pala okale nipa Asose take kotua ue dipike ne enemonoo wa ue dipike peapetekoa pote mea Asose take witapokoo.

<sup>14</sup> Asose take potemekooka Polo ka ludu pima nome toto kotukale ue dipike moa aua pote Miti-line take witapokoo.

<sup>15</sup> Podolikama pupulegeme popokoa aua pokale ue dipike mea pote Kiose ta eka pimota oka patukoa pokoo. Nitao pote podolikama Samose take witapokoo. Eida piimotekete podolikama ue dipike mea pote Mailitase take witapokoo.

<sup>16</sup> Mailitase take witapikilepa Esia ta keneke pilko Epesase ta aka pimota oka keika lono kokotoa pote witapokoo. Nipa Pedikose wa ibini akene ta patakilepa wete toameneyake Poloyo Yerusalem take wete pone mepouno, Esia take oyake pone meamele toamoko wa wene pianeya tokome Mailitase take pitimoa pokoo.

### *Poloyo One Epesase Oya-mikiti Kiwi*

#### *Wa Enamou Wa Lionate Oomotokome Peken-emo*

<sup>17</sup> Polo Mailitase take pome mekomepa eya ali-kihi Epesase take Yesuke wene tuga meane yene yopiane ali-kihi noe wa agale oa wetekakale

**18** note mekoli Poloyo eya wa oka. Kini Esia take kiwi pakeke namolo laigoane toma-kama nokouna pupupa kime wene tiki.

**19** Yu yename no wiatekoi oi pedoa pikala tokoli ke enekakaleka Ali Munagoke nate wene pianeya meane komo oane meane tekene onekele takama yawane togakouna.

**20** Nipa kiwi epetekoa mekete toatekoimopa natemoka kipala kauane wamokouna. Enimopa ali atoane lene yoto kakene oane kini yapu ludu pone kakene oane tokouna.

**21** Nipa Yu yeneka mone pa yateneka kiwi peyame padele padele poanele tewitikoa wawa Akolalike tepe kolotini pekoa pia tone Ali Munago Yesuke wene tugoa meamene wane oma yakouna.

**22** Opi Epetane Yominiyo pa wa wetekakolo tekene Yerusalem take poadene tuku. Nipa eni take meki yename nopala toatikile agopa tokolo mekeneneke poadene tuku.

**23** Eni wenepa toamukuyake ali atoa tube take pitikika yaku toa Epetane Yominiyo eya wa wene takakala toko. Pade-kitame no nepa dekao moa po yapu pitikoa ke enekoi wa no wene takakala toko.

**24** Nitoi tokoloka anu kepene mama moamukuno, tuadekolupa tuou. Ali Munago Yesuyo ta wa no oyametekale-kama peya takadene uku. Nipa Akolaliyo ali atoa pewe wima pokome tokomo Yesunomo toaweane akama pone togadene uku.

**25** Kiwi pakeke Akolaliyo ali atoa talo tokome tokomo i i wane mo wima yakounano, anu lene timini kime wa pade enamoi.

**26** Kiwi panagomedo poanele toa etepea tua atu-

pekedekalepa padame no i ago neme eni yene edekale pubu wamokato-pe wa amele toamoo. Ni edoa-mo.

<sup>27</sup> Akolaliyo wene piko toane-kama wina peeta-peane okouna.

<sup>28</sup> Akolaliyo manane kamateme topo toa motane yenepa eni ali atoa sipi sipi kai tetepo takoa yopia kamene wa Epetane Yominiyo kiwi takoa moa kakakanano, talo toa yopikakete paya nou toameamene. Kiwika etepea poinalino, wedoa yamene.

<sup>29</sup> Kiwi tewitikoane pootokaneyake poane ali-kiki kiwi pakeke note menoi. Nipa lene pianeya yo tane tueme-kiti sipi sipi kai mama moameneya tania wia tadekou toa kiwi toa potokoino wene tekene uku.

<sup>30</sup> Anu oya-lawe kiwi padeka-kitameka poanele tagoa Akolalinemo moa koigoa uku pekete toi. Ali atoame kiwi litimotoa tekete toi.

<sup>31</sup> Nitikaya tokale tekene mali tebolo ponoka toane-kama kiwi peya pubu okala tokouna. Nipa ete pia oto pia ta pataka abuna komo okoane kakene pubu okounano, lene kilikoa piameneya wedoa meamene.

<sup>32</sup> Opa Akolaliyo yapu wiou toa kiwi pewe witikome peku lewetemotoane uku. One peku noa toma pote wipitiketepa a tibuke Akolaliyo one wa takoa moma pokon ali atoane pikoa katekakoya pine enoa moi.

<sup>33</sup> Kiwi pakeke yawane mekenepa panagono kue mamma eya eniya moadiya wane tepi moameneya yakouna.

<sup>34</sup> Nopala opia yakoina oya-lawe tone noateko

neeka tone kawateko maminaka enika eniyapa  
anu yoname pupu toane kue mootokoane topo  
toane mokala tokouna. Enipa kime wene tiki.

<sup>35</sup> Padele padele toma yakilepa dikoa pupu wedoa toa ponopeneya-kiti mama moa auapeatoane uku wane oyamema yakouna. Nitikouna toa litia teketepe nipa Ali Munago Yesuyo akene toa wene taneya mea tamene. Eya wa akeneya. Panagome panagonoke padeya moa pikoa mekomepa wedia meko. Wa einagome onekeya pade nami kakameneya eko ago pa metekome metekomepa etene wedoa kolotine meko wa Yesuyo akeneya wa Poloyo oka.

<sup>36</sup> Poloyo enimo ootokoapa eni yene peya-pala neuwe tukupia mekome Akolali kowitoa meka.

<sup>37</sup> Nitikale peyame komo okoa kakete Polo tebea moa nunu oa kakoi.

<sup>38</sup> Nipa one lene timini kime wa enamoi wa eina okanakamoke e yene elame tuaneya kakete tokoi. Nititikoapa one mea poateka ue dipi pikata wetekapokoi.

## 21

### *Polo Yerusalem Take Pekenemo*

<sup>1</sup> Totome eni yene poti kamene wa lionate ootokoaa ue dipike peapetekoa pote mea Kose take pitimoa pote witapokoo. Eida piimotekete podolikama Lodese take pote witapokoo. Lodese take piimotekete Patara take pote witapokoo.

<sup>2</sup> Eida ue dipi nome piai tokata peketepa Pinisia take poateka ue dipi pade enamutukete peapetekoa pote mea pokoo.

<sup>3</sup> Nitoa Saiperase ta eka pikale nami enemotekete eni taapa ewa yono lono eka pimotoa pote Siria ta keneke piko Taia take witapokoo. Nitoa witapekete ete katepitoa pokoo. Nipa eina ue dipike moa pikoina kopapu pupu ali-kitame yawa moa piatekoi ta eni witapeketepa katepitoa pokoo.

<sup>4</sup> Eida Yesuno agale litia tane yene tuku toa enamutuketepa ta pataka tatono (7) kakoake eni yene-pala mea kakoo. Nitikolopa Epetane Yominiyo wene takakale tokome eni yename Polo nepa Yerusalem poamea wa pubu okoi.

<sup>5</sup> Nitikoiyake tone poatekoo oi nokalepa eni ta tewitikoa pokolo e yename wetekapekete kini mati atoa-pala ta kago ketepono patukoa kusa ue matanuke tugapokoi. Nitikete toto peya neuwe tukua pia Akolali kowitikoo.

<sup>6</sup> Nititikoapa tebetagutukoa kawa ue dipike lewia pote kakete wete kamene-ye wa ootokoaa pogataapea mekolo kini kini yapu yapu wakapea pokoi.

<sup>7</sup> Nitikolipa Taia ta tewitikoa pote Tolemesi take witakete ete katepitoa potepa Yesunomo yakoa motane yene kotukete ke wa tebetekoo. Nitapa ta pataka odeneke eni yene-pala eida mekoo.

<sup>8</sup> Wa podolikama eni ta tewitikoa ka ludu pote Sisaria take pote mepokoo. Nipa Yesunomo oa aua yakene ago Pilipi one yapu pote mepokoo. Namolopa ponopene ali atoa auapea yopikamota tatono (7) kakoa ali-kiti takoa motikilepa einago takoa motaney.

<sup>9</sup> Einagono kono tuyonopa alike wete poamene atoa one-pala eida mea Akolaline agale tqawea

akakala taneya.

<sup>10</sup> Kini etenane yapu ta pataka pade-mene toto pa eida mekooka Akolaline agale toawea akane ago pade Yudea ta kawa noka. Einago one ibinipa Agabasi.

<sup>11</sup> Einago nome kakome Polono matiu kotokoa moa pinali one kawa yonota matiume tau toologaka. Nitikome okome Epetane Yominiyo okana toanepa Yerusalem Yu yename i matiu pinago poome lutua pa yatenane yonoke moa piatiki adeka pikene tuku-kale

<sup>12</sup> yatekete eida pitikoi yene toto peyame Polo kowitikete ekete Yerusalem poamea wa kowitikolo okome

<sup>13</sup> edekolo komo oa anu wene keda mati takoa iki-pe. Yerusalem yename no poome lutukolika oyake lutumotou. Tuadekolupa Ali Muno Yesuke oyake tuou wa okale

<sup>14</sup> totome poamea wa kowitikoa kawa teko tokale ekete nipa Ali Munagono wene pikole taatekakoano pa wa okoo.

<sup>15</sup> Wa naniko tonekeya-kiti moa nodokatekaoa Yerusalem take poo wa poadete tokolopa

<sup>16</sup> eina Sisaria yene padeka-kitame pekete pato wa eya agono yapu Yesunole koto kakome takama yakene ago Nesone one yapu toto wetekapokoi. Nipa einago Saiperase take opiane ago-pala toto meatekooya tokale ni one yapu wetekapokoi.

### *Polo Yame Mekata Ugu Pekenemo*

<sup>17</sup> Yerusalem take witakolopa tone oya-mikitame ke ke wa toto makutukoa motokoi.

<sup>18</sup> Wa podolikama Yame enepato wa Poloyo toto-pala koua pome enekale Yesuno ali atoa

yopia meane ali peya one mekata eida oboa mead-ekoi.

<sup>19</sup> Kini oboa mekoita eida pome kakome Poloyo e yene yono mootokoapa i i wa e ku pa yatene mekoika Akolali patu kautakoa kakome toma yakanakamo tqawea oka.

<sup>20</sup> Nitikale yatekete e yename Akolali kei pia kakoi. Nitapa Polo-pala ekete ame i take toto Yu yatene ali atoa ege egeta wakala kadukoa Yesuke wene tuga meketepa Mosesene totono wedoa litia tiki.

<sup>21</sup> Ete Yu ali-kitame eni yene-pala eya wa akeneya. Ne einago Poloyo e ku pa yatenane take toa pote meki Yu yene eya tamene wa olaukama yakome toko. Mosesene totono tewitikoa wawa kini ali matiyane kepene teigamoa kini kaua-mikitame tanele litia toamoa tamene wa olaukama yakome toko wa ne akoa iki.

<sup>22</sup> Opi ne noke mekomo yakoino, edato-pe.

<sup>23</sup> Ne einagome Mosesene totono litia tadeko wa eni Yu yene wene keaneya memotoa teke eya tamene. Tone oya ali-kiti tuyonome ile too wa Akolali-pala oa togotokoina toa tekete paduya-kiti keko wawa noamoa tobou pine pituameneyea meki.

<sup>24</sup> Einali-mene-pala kibutua kake Akolaline lenike poanele takoa koikatapeneyea meadete toatikile tamene. Nitoa oneke paduya lodo yoatikiya motokoa meamene. Nitikalepa einali-menamne Akolali-pala ile too wa papete oa togotokoina toa toa peya takaketepa kini tobou pine pitutapeamele too. Neme eni yene auapea enile tokale enekete peyame eya wa oi. Ne i agome

Mosesene totono litia tokono, ete yename ne akoa okoinapa kapene wakoa akediki wa oi.

<sup>25</sup> Yesuke wene tuga meki pa yatene ali atoame edikoa toatiki toa mena. Nipa eya-mene odene kekoa wawa noameamene wa totome oi pedoa pikoona toa pipia wia wetekakoo. Iponole toa toge kiane neeka kamateka noamoa ni kamate kakeneya kabe dekoa tukane kai tawe eya kia noameamene. Ni pamoko toameamene wa e ku pa yatene-kitike pipia wia wetekakoo wa Yesuno ali atoa yopiane ali-kitame Polo-pala okoi.

<sup>26</sup> Nitaneyake podolikama Poloyo einali-mene moa aua poka. Nitoapa Akolaline leneke poanele takoa koikatapeneyea meadete toatekoile einali-mene-pala odeneka toomotokome tobou losu yapu poka. Nitikome okome Akolaline leneke poanele takoa koikatapeneyea meadete toatekole ipete toa peya takadete toko. Ipete kime lodo yotokate tomotoa tone tone sipi sipi kai eya aua note menoo wa Akolalike lodo yotokoai tane ali-kiti-pala eina oi mepaneyea.

### *Polo Tobou Losu Yapuke Dekoa Motanemo*

<sup>27</sup> Ta tatono (7) kakoa patakale enile toa pea takatekoi tigotokale Polo tobou losu yapu pome kaka. Nitikale enekete Esia ta kawa nekene Yu yename eida kakoi peya oa kamotokoa Polo dekoa motokoi.

<sup>28</sup> Nitoa kayo ekete ekete Iserele yene tone amelawе toto wete auapenoе. I agomepa ta piko peyake ali atoa olaukama yakome toto Yu yene akoa agale oa tone totonoke poanemo oa tone i tobou losu yapuka paya tetepo takoa olaukama

yako. Opi i tobou losu yapu keneke pa yatene alimene moa aua nikilepa tone kekanele eni toko wa kayo oa kakoi.

<sup>29</sup> (Kime eni tokoipa Epesase take opiane ago Teropimasi Yerusalem ta ludu Polo-pala opia yakale enekoiya tekete Poloyo eni pa yatene ago kini tobou losu yapu aua nokome toko wa wene pikete ni tokoi.)

<sup>30</sup> Nitikolipa Yerusalem take mekoi peya timini nakale padeka padeka kawa teyapea nekete Polo tobou losu yapu kakata note one dekoa motokoi. Dekoa moa akolono lia pitikakoli eina eina yopikoi-kitame kago-kiti ketekala tokoi.

<sup>31</sup> Nitaneyake one wia tukadete wili toa kakolipa ako tobou meane poyo agomepa Yerusalem take meki-kiti kotimi yoa kamokolokaki wa okoimo yatekome

<sup>32</sup> eina eina oneke lokoa poyo ali-kiti yopiane ago-meneka pa poyo ali-kitika moa kepoke ketipea teyapea kikilikoa aua eni Yu yene oboa kakoita pekeneya. Nitikale enekete e yename Polo ikimu wia wakoli

<sup>33</sup> tobou ago pinele pome Polo dekoa motokome okome i agopa kapa po takuta kakoa kebetamene wa ootokoa kakome okome i agopa mani ago-pe. Edele tokale tokoiya-pe wa yateka.

<sup>34</sup> Nitikale eida oboa kakoi-kiti padame pade oa padame pade oa ate keti toa kakoli tokome pine pitia yakamele toamokale kakome okome i ago ate poyo yene tone pawe kago kawa motane yapu aua patepoe wa poka.

<sup>35</sup> Nitikale Polo a yapu ate poademe tili waneke keku keneya kakale e Yu yename apua takoa

kobeyo pote edelogakoli tokome poyo ali-kitame kini yoname leyo toa Polo yonoto yonoto toa aua pokoi.

<sup>36</sup> Nitoa aua pokoka eni yename litima note kayo ekete ekete winago wia tukakoe wa aw-itikama nokoi.

### *Polo Pinali One Wa Kei Pikome Akenemo*

<sup>37</sup> Nitaneype poyo ali-kitame Polo a yapu tua-pea aua poadete tokoika Poloyo ako tobou poyo ago yatekome okome nepala agale pade ukuno, ne oyake yateko pe-kale okome ekee Geriki agale wene toa oko.

<sup>38</sup> Nipa nepa eya ago toameadeko. Ali atoa wia tukakala tane ali ege egeta kadukoa (4,000) poi kamotokoa moa ali piamene take aua pekene Idipi ago ne toameadeko wa okale

<sup>39</sup> Poloyo okome nopa Yu yatene ago Silisia ta keneke piko Tasase take opiane ago. Nopa eni ibini akene take agono, e Yu yene-pala agale pade ouno, oyake-pe-kale okome

<sup>40</sup> eeno, amene wa okale Polo tili waneke kakome yoname e yene kawikoa kakale agale kawilogakoli Iberu agaleke eya wa oka.

## 22

### *Poloyo Yerusalem Yu Yene-pala Akenemo*

<sup>1</sup> Ame atai-loe pinali anu kei piane oatekumo ukuno, yakoe wa okale

<sup>2</sup> yatekete ekete ekee i agome tone Iberu agaleke eni oko wa agale teitoa wawa kakoli okome

<sup>3</sup> nopa Yu ago Silisia ta keneke piko Tasase take opianeyake Yerusalem take tubetoane kakene eya ago Gamelielene sukiliike pokouya.

Einago Gamelieleyo tone kaua-mikitame litia toma nekene totono litia olaukatapekale yakoane tokou. Nipa kime Akolalinele wedoa takama niki toane noanumeka wedoane takama nuku.

<sup>4</sup> Nitikenepa i weneya totono litia tiki yene tete meane wiane tukoane alika atoaka kebetoane po yapu pitikoane tokou.

<sup>5</sup> Kipala i ukumopa ako odene mekome Akolalike lodo yotokoai toko tobou agomeka ete Kanosolo ali peyameka no einagome nimini eni oko wa no kei pia amele toko. Eni tobou ali-kitame kini oya-mikiti Damasikase takemekika i pipia meamene wa pipia wia metekoli moomotekene Damasikase take pokou. Nipa weneya totono litia tiki-kiti kibu momotoane oto Yerusaleme take liane auane nou wane pokou.

<sup>6</sup> Damasikase take poadene pekene tigotokakoane witapokouta lou mataike pene kelema ponokale a tibuke pa toa kaka matiyame keti tqawineya nome no ewetemoa pikale

<sup>7</sup> itonoke auane pitakene yatekolu padame agale okome okome Solo Solo no edeyake tetemekala toko-pe wa okale

<sup>8</sup> yatekene ekene Ali Muno nepa te kake okope-kolu okome neme tetemekala tokago Nasarese Yesuyo uku wa oka.

<sup>9</sup> Nitikake nopala opia nokoi ali-kitame eni toka pa eneketekene nopala agale oa kakamo yakamokoi.

<sup>10</sup> E yename yakamokolika ekene Ali Muno anume edele tomotoa oko-pe-kolu okome Damasikase take poke mepamene. Poke mekale neke toatekale Akolaliyo kotukapikale-kama i i wa panagome nokome oono, wete kamo poano

pa wa oka.

<sup>11</sup> Eni toka pame anu leneta likaneya tokome nopala opia nokoi ali-kitame anu yono moa aua pote Damasikase take mekapokoi.

<sup>12</sup> Eni takepa Mosesene totono wedoa litia tokago Ananaiasi meaneya. Damasikase Yu yene peyame one kei piai taneya.

<sup>13</sup> Einago no mekouta nokome okome ame Solo neke leneta wa kikoa ena wa okaka eina eina leneta kikakatapeneya enekolu einago kakale enekou.

<sup>14</sup> Nitikolu okome ame tone kaua-mikitane Ako-laliyopa eya tomotoa ne moa kakapianeya. One wene pikole wene toa toa ni wene kiyo akeneyakama mekago enoa ni einagome nepala agale awa okale yakoa tomotoa tokome ne moa kakapi-aneya.

<sup>15</sup> Nitaneyano, neke leneme enoa kaleme yakoa tokanakamo ali atoa pitikoi toa pima yake i i wa akama poo.

<sup>16</sup> Edoa ita nepia meade-pe. Neke poanele koa mitikakamoton, Yesuno ibini wedekoa ue moamene. Wete kamo wa Ananaiasiyo oa poka.

<sup>17</sup> Nitaneyake Yerusalem wakapeane none mekou. Nonemekene tobou losu yapu pone kowitikoane kakene pulete keneya enekolu

<sup>18</sup> Ali Muno no kakouta nokome okome anukumo neme oa metekolo i take meki-kitame yakamadete wakino, i ta wete tewitikoa pa-kale ekene

<sup>19</sup> Ali Muno papete losu yapu kaka toane pikilepa neeke wene tuga mekoi-kiti po wapime wiane po yapu pitikoane toadene tokouno, i

take meki-kitame anu eni toma yakounakamo yatekete tokoi.

<sup>20</sup> Neke agale akama pokago Sitipane ete Yu yename wia tukakoina-pete noka e yene-pala opiane kakene oyakeno toe wane eya tokou. E Yu yename einago wia tukadete kini tokoo mamina kotokoa pitikakoita eni mamina nepikoane kakou wane Ali Muno-pala okou.

<sup>21</sup> Nimo okolu okome e ku pa yatene ta tetemada mekika ne pa wane ne wetekouno, wete pa wa Ali Munoyo nopala oka wa Poloyo oka.

### *Onepa Lomane Yatene Ago*

#### *Wa Polo Pinali One Wa Kei Pianemo*

<sup>22</sup> Poloyo agale okoa kakale e Yu yename yakakoa meaneyake one wipitikome okale yatekete agale telo oa kamotokakete ekete i agopa katekhoa wato. Wete wia tukato wa kä oa kakoi.

<sup>23</sup> Nitikete kini tokoo kakene mamina kotokoa kogoa itono kugue-pala moa ate tadekoa tokoi.

<sup>24</sup> Nitikakoa ako tobou poyo agome okome Yu yename i ago-pala wene pokete uu kayo oa kakino, one tanemo tete nakome omotono, tone a yapu aua pote layo toua wipoe wa oa poka.

<sup>25</sup> Nitikale e poyo ali-kitame aida aua pekete wiadete kebetelogakili Poloyo kiwi yopikago one lutukooya liti kakale eya wa yateka. Lomane yatene agopa one tanemo-kiti koiso yopikagome wete pitia yakameneyake oyake layo toua wiamele toko-pe wa okale

<sup>26</sup> yakamotokome einagome ako tobou poyo ago mekata wete pokome okome mone i agopa

Lomane yatene ago tadekono, edoa layo toua wimotoa-pe wa okale

<sup>27</sup> tobou ago Polo kakata nokome yatekome okome nepa Lomane yatene ago-pe-kale okome eeno, nopa Lomane ago kaku-kale okome

<sup>28</sup> ae nopa pa yatene ago opianeyake tubetoane kakene Lomane yatene ago latiadene kue peya mati metekou wa okale Poloyo okome Lomane agome no opianeya wa oka.

<sup>29</sup> Nimo okalepa one pitia yakatekoi ali-kiti ete witimoa kakoi. Ako tobou poyo agoka i agopa Lomane yatene agoke kapa po kakakou wa pitime tuaneyaka kaka.

### *Polo Kanosolo Yenane Lene Yoto Kakenemo*

<sup>30</sup> Podolikama ako poyo tobou agome eya toka. I agome edele taneyake Yu yename akoa agale ikiti patuno, pine toane pitiane yakou wa Polo kakane kapa po kotokaka. Nitoapa Akolalike lodo yotokoai tane tobou ali-kiti ete Kanosolo ali peya koukoa noe wa agale oa wetekakale koukoa note mekoli Polo moa aua pome kini lene yoto kakapoka.

## 23

<sup>1</sup> Poloyo e Kanosolo ali-kiti nepikoa pikome okome anu oya-mikiti tubetelaukene Akolalike leneke tepeme epetanele ta wa okale-kama toma nokou. Opi-kitika pa edikoane toma yaku wa oka.

<sup>2</sup> Nimo okalepa ako odene mekome Akolalike lodo yotokoai tane tobou ago Ananaiasiyo Polo kakaya liti kakoi ali-mene-pala okome winago kabunu kugutukoa wia wa okale

<sup>3</sup> Poloyo okome yapu ekolopa kego nakeneya kamotoake akolono kegelepa koniyo takoa peno yotokou toa wini toko. Mosesene totono litia neme no pitia yakamedeko. Nitameneya eni totono tetekake eke no i ago wio wapa wini meke okono, pale wini tokona wa Poloyo okale

<sup>4</sup> one kakaya liti kakoi ali-kitame Polo-pala ekete ako odene mekome Akolalike lodo yotokoai toko tobou ago-pala wini oa potokako-koli okome

<sup>5</sup> ae anukameyo einagopa ako tobou ago mekono wene toamekene okou. Neke ako tobou ago-pala poanemo wameamene wa Akolaline bokuke wia mekaneyake tokou. Ela toko wa Poloyo oka.

<sup>6</sup> Nimo ootokoa enekale e Yu yene padekapa Sadusi yene wa padekapa Parisi yene kakedekoli enekome kayo okome okome anu oya-lawe noka Parisi ago. Agetaika Parisi ago. Tua pekene ali atoa kamoaa pomotoane nepikoane mekene wediane mekuleke pade-kitame no koiso akaki wa okale

<sup>7</sup> yatekete eina eina Parisi ali-kiti Sadusi ali-kiti ete oto agale oa pilia puutakutukoa kakoi.

<sup>8</sup> (Einapa Sadusi totono litia tiki Yu yenamepa tua pokoi ali atoa wa kamoaa poamoi wa olaukoa ni edelo ali-kitika ali atoane yominika meamiki wa olaukakiya. Nitikiyake Parisi yenamepa tua pokoi ali atoa kamoaa poi wa olaukoa ni edelo ali-kitika ali atoane yominika meki wa olaukakiya.)

<sup>9</sup> Poloyo oka agaleke e yename agale telo oa kamotokakoi. Nitoapa Yu yename totono pine toa olaukane ali padeka-kitipa Parisi yene tekete kamokoa kakete agale telo ekete ekete i agome

poanele padeleka toameadeko. Edelo agomeka yomini padameka onepala ko akeneya patu wa okoi.

<sup>10</sup> Nitikoli peyame uu wa ete oto wa pili pili toa kakoli enekome ako tobou poyo agomepa e yename Polo kawa yono tekea tadekakaya tokale one poyo ali-kiti keti wetekakome okome kei ago odoa moa tone poyo yapu oto aua noatino poe wa keti wetekaka.

<sup>11</sup> Podolikama ta likaka Ali Muno one pono Polo yamenokome okome anukumopa Yerusalem wini akama pokana toa Lomane takeka akama poano, piti moameneya wedia meamene wa oka.

### *Polo Wia Tukatekoi Oi Pedoa Pianemo*

<sup>12</sup> Podolikama ta patakaka Yu ali pade-kitame Polo wia tukatekoi oi pedoa pianeya. Nipa one wete wia tukameneyake ue neeka wawa noamato wa taneya.

<sup>13</sup> Eni oi pedoa pikilepa padeka noi kakoa (40) alime taneya.

<sup>14</sup> Nitimotekete Akolalike lodo yotokoai tane tobou ago-kitika Yu yene yopiane ali-kitika oboa mekoita pekete ekete Polo wia tukateko oi pedoa pia noko. One wete wia tukameneyake ue neeka wawa noamato wa oi pedoa pikooyano,

<sup>15</sup> eya tamene. Ete Kanosolo ali peya kime tobou poyo agoke agale wia wetekakete ekete winago Polo one tanemo pine toa pitia yakoono, Kanosolo yapu oto keti aua namene wa agale oa wetekamene. Polo einago oto noameneka kutu dekakoa poi pia wipoono, einago oto nomotono, agale oa wetekakamene wa onaneya.

<sup>16</sup> Polo wiatekoi oi piadekoimo Polono awene matiyame yatekome poyo ali-kitane yapu pome awene pubu opaneya.

<sup>17</sup> Nitikale yatekome Poloyo poyo ali-kiti yopikago pade nepala agale pade ouno, wete no wa kayo oa motokome okome i matiyamepa neke ako tobou ago-pala agale pade oademe tokono, one mekota aua pa-kale

<sup>18</sup> tobou ago mekata aua pokome okome po yapu pitikago Poloyo no kayo oa motokome okome i tualime tobou ago nepala pademo oono, ne mekota aua pa wa okolo auane nuku wa akeneuya.

<sup>19</sup> Nitikale tobou poyo agome matiyane yono moa paka witimoa aua pome yatekome okome nopala edemo oade noka-pe-kale okome

<sup>20</sup> Yu yename kini oi pedoa piane toa eya wa oa toi. Winago Poloyo tanemo pine toa pitia yakoono, podolio winagopa oto keti Kanosolo ali-kiti koukoa mekoota aua namene wa ne oa yotokoa agale oa wetekoino,

<sup>21</sup> kini okoimo yakameamene. Padeka noi kakoa (40) ali-kitame one wiadete poi pia mekete tiki. Nipa agetai tia one wete wia tukameneyake nee ueka wawa noamato wa oi pedoa piane toa poi pia mekete tiki. Ipete auane nou wa neme oi metadekamo yakoukete nepia mekete tiki wa matiyame akeneya.

<sup>22</sup> Nimo okale tobou agome okome wini oka-galepa eko ali-kiti enekepa tobou ago-pala imo wane okou wa wamoano pa wa wetekaneya.

*Polo Sisaria Take Moa Wetekanemo*

<sup>23</sup> Nititikoa tobou agome oneke lokoa tobou meane poyo ali takuta wete noe wa kayo oa motokome okome ka ludu kawame poatiki poyo ali kadapime kadukoa (200) takoa moa ni osi kai patu mea poatiki poyo ali ege odepeta kadukoa wa kapidi kakoa (75) takoa moa ni lama tigine poatiki poyo ali kadapime kadukoa (200) takoa moa tamene. Ta likaka 9 kilokoke eni poyo ali-kiti-pala Sisaria take aua poatino, wete takoa mopamene.

<sup>24</sup> Polo mea poateko osi kai-meneka takoa moamene. Nitoapa onepala padele takaya tokale osi kai patu mekhoa wedoa yopikoa-kama aua pamene. Nipa ta yopikago Pilikisimekota aua pamene wa akeneya.

<sup>25</sup> Nititikoapa Sisaria ta yopikago Pilikiske pipia wia wetekakome okome

<sup>26</sup> nopa Kelodiasi Lisisiyo i pipia wianemekaku. Kamo koniyali Pilikisi neeke agale deya wiane wetekakene eya wane ukuno, yakamene.

<sup>27</sup> Ne mekota moane wetekaku agopa Yu yenane dekhoa moa wia tukadete tokoiyake toane mopokou. Nipa one Lomane yatene ago tadekale yakamotekene anu poyo ali-kiti-pala auane pone toane mopokou.

<sup>28</sup> Nitoanepa i agopa koiso edeyake akoa iki-pe wane pitiane yakadenepa Yu yenane Kanosolo ali-kiti oboa mekoita auane pokou.

<sup>29</sup> Nitoane pitiane yatekolupa one po yapu pitikakene one wiane tukakene toatekoule piameadeka. Yu yene pa kini totono i agome tetekakala toko wa ni koiso akoa akedekoi.

<sup>30</sup> Wa naniko Yu yenane einago poi pia mea wioukete oi pedoa pianemo yatekenepa eina eina

ne mekota i ago moane wetekou wane neeke wetekaku. One koiso akaki yeneka ne mekota koiso akapoatino poe wane neeke wetekakuna. Anu agale eni peya. Wete meamene-ye wa ako tobou poyo agome ta yopia meane agoke eni pipia wia wetekaneya.

<sup>31</sup> Tamene wa akenele litia teketepe likonu poyo ali-kitame Polo-pala aua pote Adipaterise take dekoa pipokoi.

<sup>32</sup> Piimotekete podolikama osi kai patu mea nokoina poyo ali-kitame Polo-pala Sisaria take aua pote-kama kamotoapa kawame nokoina poyo ali-kiti Yerusalem take kini poyo yapuke waka-pea pokoi.

<sup>33</sup> Nitikoli o yename Polo-pala aua pote Sisaria take witakoi. Nitoapa ta yopiane ago Pilikisimekata pekete pipia metekete einago Polo ina wa metekoi.

<sup>34</sup> Nitikoli ta yopiane agome pipia moa oi mootokoa Polo ne mani take ago-pe wa yatekale okome Silisia ago kaku-kale okome

<sup>35</sup> ne koiso akatekoi yene oto nokolipa neme tanemo pitiane yakou wa ootokoa kakome one poyo ali-kiti-pala okome i agopa Erodeyo Yu yene talo tokome meko yapu aua pote mekoa yopikoa kamene wa meteka.

## 24

### *Yu Yename Polo Koiso Akakete Akenemo*

<sup>1</sup> Ta ko kakoa (5) patakalepa ako odene mekome Akolalike lodo yotokoai tane tobou ago Ananiasi Kanosolo ali padeka-kiti-pala koua Sisaria take keti nekeneya. Lomane totono wene toa koiso

akene ago Tetalasi einagoka eni yene-pala opia nekeneya. Enika eni yenepa ta yopikago Pilikisi mekata note Polo koiso akananeya.

<sup>2</sup> Nitaneyake koiso yopikagome Polo ne noo wa kayo oa motokale Tetalasi kamokakome agale titikome okome kamo koniyali Pilikisi nemepa tone ta talo toa epetekakolo tokome toto peya kotona kilikoa meko. Ele kule poaneleka neme oa pilia motokakana tokome toto peya mea epetekako.

<sup>3</sup> Ta pataka abuna eka kuka meko toa totome nepala ke-kama oko.

<sup>4</sup> Agaledo ludukiya okolupa ne koome tukayano, pa tigini ouno, toto ela moa yakamene.

<sup>5</sup> Winago Polo enekakole-kama tokagopa Yu yene pitiki toa pima yakome oa kamotokama yako. Nasarini totono litia tiki yene kini tobou ago pade wini kako.

<sup>6</sup> Winagome tobou losu yapuka toa potokoa eneka. Nitikalepa tone totono litikete pitia yakoa koiso akato wa totome dekoa motokolo

<sup>7</sup> aka tobou poyo ago Lisiasi one poyo yene-pala teyapea nome einago telo odoa moa poka.

<sup>8</sup> Nititikoapa winago Polono koiso akakokiti toto nemekota koiso aua poatino poe wa wetekakale nokoo. Winagome toma yakole totome ni koiso akakopa inapa nimini akedeki wa wene toadepa one tanemo neke pitia yakamene wa Tetalasiyo oka.

<sup>9</sup> Nitikale e Yu yene peyameka Polo koiso akakete ekete eno, Tetalasiyo nimini oko wa oa kakoi.

*Polo Pinali One Wa Kei Pikome Akenemo*

<sup>10</sup> Nitikolipa Polo pinali one wa kei pimotoa tokome tobou ago Pilikisi kabe togoikakale Polo kamokakome okome nemepa toto Yu yenane ta kotona yopikoa kakanano, pinali anu wa kei pikilepa atiki tootapeane tuku.

<sup>11</sup> Yerusalem take Akolalinele takoane kowitzoane toadene i ta tewitikoane pone mekilepa ludu pitikoane meamokou. Ta tuku (12) kakoa wete patameneyake oto wa nokou. Einapa nimini akedekolu neme oyake pitia yakou.

<sup>12</sup> Aida Yerusalem take pone mekenepa tobou losu yapu keneke ete Yu ali-kiti-pala mokota wamoane kini sinokoke losu yapu-kiti kenekeka kini yapu luduka ali atoa oane kamotokamoane tokou. Enile toma yakuule i Yu yename enekoiya mena.

<sup>13</sup> Nopa neme poanele dikoa tokale enekou wa padameka neke leneka kakete oyake toawea wamoi.

<sup>14</sup> Eya wane toaweanie ukuno, yakamene. Yu yene tone kaua-mikitane Akolali onekele takama nekenepa weneya totono litiane tuku. Eni weneya totonopa i yenamepa kapene totono wa iki. Mosesene totonoka Akolaline agale toawea akane ali-kitame wia mekane agaleka eni agale peya noanumeka yakoane motokouyake iki.

<sup>15</sup> I yename Akolaliyo taatekoia toatekole nepia meki toane noanuka kolotine mekene nepiane meku. Nipa epetanele toma yawa tuane yeneke poanele toma yawa tuane yeneke Akolaliyo moa kamotokamotoane nepiane meku.

<sup>16</sup> Nitikenepa Akolaline lenekaka ali atoane

lenekeka kiyo akenele-kama tou wane toane enekala tuku.

<sup>17</sup> Mali pade-mene ta tetemada pima yawane Yerusalem take wakapeane nokou. Nipa no yatene ponopene ali atoa kue eya tatikoane Akolalike padeya lodo yoane toadene nokou.

<sup>18</sup> Eida tobou losu yapu keneke Akolaline lenoke poanele koikatapenye kakene enile toane kakouka Yu yename no enamutukoi. No eida kakouka ali peya mati kawamo uu wa oa kawamo tokoi.

<sup>19</sup> Einata einapete Esia ta kawa nekene Yu yeneka kakoi. Eni yename padeya namike no koiso akatekoimo piadekalepa ne mekota koiso akanoi tokano, noameadiki.

<sup>20</sup> Eni yenepa oto noameadikino, i note kaki Yu yenamepa no Yerusalem take Kanosolo ali-kitane lene yoto kakolu pitia yakoai tokoino, no poanele tadekolupa eni poanele tokoumo neme yakakakolo tqawea omotoane uku.

<sup>21</sup> Yu yename anu koiso akakilepa eya tokouleke tiki. Kanosolo ali-kitane lenoke kakene kayo ekene ekene Akolaliyo tua pekene ali atoa moa kamotokoo wane okounakamoke anu koiso akaki wane kayo okou.

<sup>22</sup> Polono koiso yatekakago Pilikisiyo eina weneya totono wene tane ago tokome poti yakakoa meka. Nitoapa Poloyo enimo okamo yatekome okome koiso opipa eida nami kakalogoa watoe. Tobou poyo ago Lisiasi oto nokalepa neke tanemo pitiane yakatapeou wa oka.

**23** Nitoapa one poyo ali-kiti yopikago Polo yame-tekome okome i ago Polo po yapu wa pitikapekepa mama moa nepikoa kamene. Nipa padeya-  
kiti toamokalepa one oya-mikitame motokoa aua nomotamene wa oa poka.

**24** Ta pade-mene patatekaneyake Pilikisi one natono Derusila-pala eida nekeneya. Einatoapa Yu atoa. Pilikisi eni nokomepa Polo oto nomo-tamene wa kayo okale nokome ali atoa Kerais  
Yesuke wene tugakete toatekoimo toawea okale yakakoa meka.

**25** Nipa ali atoa wene kiyo akeneya mekete toatekoimo ni ua moa yawatekoimo ni Akolaliyo ali atoa takoa enoa akatekamo Poloyo i i wa toawea okale yakakoa mekome Pilikisi tepe lago-tokale piti tokale mekome okome wa padepete padele-kiti toamekene yakameledo toka-petepa namene-ye wane kayoouno, opi pa wa wetekaka.

**26** Pilikisi einagome Polo kayo oa moa yakoa mekilepa Poloyo one yapu poukome kue memo-toa ni taneya. Eni wene pianeya mekomepa ipete kue meteko patu wa lugutukoa kayo oa moapa one-pala ko lede okala taneya.

**27** Mali takutake Pilikisiyo edikakala taneya. Ni-taneyake one luku eya ago Posiasi Pesasi Yudea ta yopiademe nokale Pilikisiyo Yu yenane wene epetekadene tuku wa Polo po yapu eida pa memotoa wawa poka.

## 25

*Poloyopa Ako Tobou Ago Sisayo One Koiso  
Yatekamotoa Akenemo*

**1** Pesasi einago Yudea take nome mekomepa ta tebolo takoa patakale Sisaria ta tewitikoa Yerusalemme take ate pome mepaneyea.

**2-3** Nitikalepa Akolalike lodo yotokoai tane tobou ali-kitika ete tobou ali-kitika Pesasimekata nekete ekete Polono koiso akoono, oto Yerusalemme take nomotono, agale oa wetekoano ta wa akeneya. Nipa Polo nokata poi pia mea wiadete ni akeneya.

**4** Nitikoli Pesasiyo agale topo takakome okome Polo einago Sisaria take pa eida mea kamotou. Sisaria take keti poateku tigotokono,

**5** einagome poanele tadekalepa one koiso akadete kini tobou ali padeka-kti nopala opia keti nomotamene wa Pesasiyo akeneya.

**6** Ta pataka ketepo (8) kakoa patu noi (10) kakoa patu Pesasi eni Yu yene-pala Yerusalemme eida mea kawa Sisaria take keti wa wakapea pome mepaneyea. Nitoapa podolikama koiso yopikago meateka walaike pome mekome kunago Polo oto au noe wa okale

**7** Polo nome kakale Yerusalemme kawa nokoi Yu yenane one kakata unukoa kakete ekete i agome dika dika toamene poanele toka wa okala tokolika kini eni akoa okoimopa niminimo wameadekoi.

**8** Nitikoiyake Polo pinali one wa kei pikome okome toto Yu yatenane totonoka tone tobou losu yapu totonoka tetekamoane ako tobou ago Sisane totono tetekamoane tokou wa oka.

**9-10** Nitikale Pesasiyo e Yu yenane wene epetekademe tokome Polo-pala okome i yenane nepala akoa ikimopa Yerusalemme take pekene pitiane yakouno, patoa-pe wa okale okome e'e,

mena. Tobou ago Sisayo anu koiso Lome take pitia yatekamotoane uku. Noanu koisopa Lome take eida akamediki. Yu yene toane potokakileka toamokou. Enipa neme wene toko.

<sup>11</sup> Lomane yatenane totono tetekakouleke no wia tukameledo tokalepa nipa no wia tukamotoane keku. Yu yenane nopala akoa ikimopa ni-minimo wameadekolipa nipa i Yu yenane yonoke teyo no moa meoo tokolo-pe. Ako tobou ago Sisayo anu tokoumo Lome take eta pitia yatekamotoane ukuno, koiso opi ita wamato wa Poloyo oka.

<sup>12</sup> Nitikale Pesasi one koiso auapekoi ali-kitipala oboa mekome dikou wa oa togotokakome Polo-pala okome tobou ago Sisayo neke tokoumo pitia yatekamotoane uku wa wini okono, tobou ago Sisamekota moane wetekou wa oka.

### *Polo Tobou Ago Ageripane Leneke*

#### *Kakome Akenemo*

<sup>13</sup> Ta pade-mene patatekaneyake tobou ago Ageripa natono Benaisi-pala Sisaria take ugu nome menaneya. Nipa Pesasine yono moa agale akademe nekeneya.

<sup>14</sup> Ageripa adona ta pade-mene pataka toa eida meetekaneyake Pesasiyo tobou ago-pala Polo ko oa kakome okome Pilikisiyo i Yudea ta yopia mea tewitikakomepa padago po yapu pa mea kamotoa wawa poka.

<sup>15</sup> Noanupa ate Yerusalem pokolupa Akolalike lodo yotokoai tane tobou ali-kitika ete Kanosolo ali-kitika no mekouta nekete einagono koiso akakete ekete Polo winago pitia yakateko a kibu motokamene wa akanokoi.

**16** Nitikoli ekene toto Lomane yatenane totonopa dikakoya. Koiso yakoa meketepa odene lono yakamoko. Nipa pade-kitamedo panagono koiso akakilipa einago nokome pinali one kei pia enemotoa toko. Nipa one koiso akaki yenane yonoke toto Lomane yatename pa moa pikoya mena wane okou.

**17** Eina Yu yene nopala opia oto Sisaria take nokoli podolikama koiso yopiane meatekou walaike ponemekene einago Polo oto motokapoe wane poyo ali-mene moane wetekakou.

**18** Nitikolu einago nome kakale one akoa agale okoi-kitame kamologoa i i wa one akoa oa kakoi. Nipa einagome padele padele poanele tanemo toawea oino wene piane yatekolu pamo-kama akakala tokoli yatekou.

**19** Nipa kini losu totonoke einago-pala agale toonali yoa ni panago one ibini Yesu tuake wa kamoa pekeneya wa Polo einagome akenemoke wene pokete akoa okoli yatekou.

**20** Nitoane yakakoane mekenepa edoane pine toane pitiane yakou wane wene pikene i ago Polo-pala eya wane okou. Yerusalem pekene ne wa pitiane yakouno, patoa-pe wane okolu okome

**21** e'e, mena. Ako tobou ago Sisayo anu koiso yatekamotoane ukuno, ita po yapu pa piane meou wa oka. Nitikalepa i ago Sisa mekota moane wetekouno, po yapu wa pitikoa poti nepikoa kamene wane anu poyo ali-kiti metekou wa Pesasiyo akeneya.

**22** Nitikale Ageripayo Pesasi-pala okome einagome agale okale onemeka yakou-kale okome nipa podolio yakamene wa Pesasiyo

akeneya.

<sup>23</sup> Podolikama Ageripa-pala Benaisita ali atoa koukoai taneta note menokoi. Poyo ali-kitane ako tobou ali-kitika eni take ibini akene ali-kitika kaloa tukoa eida kibutua nokoi. Nitikolipa Pesasiyo Polo oto aua noe wa agale oa wetekakale nokale

<sup>24</sup> Pesasiyo okome tobou ago Ageripa ame-loe nepalaka ita oboa kaki-kiti kipalaka agale oane meteku. Tone lenke kakagoke ukuno, yakoe. I Sisaria takeka Yerusalem takeka Yu yene peya nooke-kama nekete kayo telo ekete ekete i poane agopa toto mekota meamele toamokono, neme wia tukakamene wa tikakoa kakala tokoi.

<sup>25</sup> Nitikoiyake one tanemo pitiane yakatapekolu one wiane tukatekoule oneme pade toameadeka. Nika tone ako tobou ago Sisayo one koiso yatekamotoane uku wa i agome oka tokolo Sisa mekota moane wetekakuno wene pikene uku.

<sup>26</sup> Siske pipia wiane wetekatekuyake i agome tanemo i wane wiane wetekatekumo pade pi-amoko. Tobou ago Ageripa nepa wene tane agono, nemedo opi pitia yakoa wane i ago neke lenke moane kakakuno, neme pitia yakatekaoa okamo yatekene i agome tanemo i wane wene tekene pipia oyake wiane wetekou.

<sup>27</sup> Nipa po yapu pitikago Siske moane wetekakilepa one koiso akoa ikimo i wane wiane wetekamekenepa nipa pale tekene tou. Nitamedekuno, neme pitia yatekamene wa Pesasiyo Ageripa-pala oka.

*Ageripane Leneke Kakome Polo Pinali*

*One Wa Kei Pikome Akenemo*

<sup>1</sup> Nitikale Pesasiyo Polo-pala okome pinali neke wa kei pia agale oano ta wa okale Poloyo agale oademe yono kamotokakome pinali one wa kei pikome okome

<sup>2</sup> aka tobou ago Ageripa i Yu yename no koiso akao ikili pinali anu wa kei piane ikilepa ne kakakoane ukuno, ke wane wediane kakene uku.

<sup>3</sup> Nipa no Yu yatenamepa kini kaua-mikitame tanele po pitia toma pikileka emo kumo pili pili toa ikimoka neme wene tootapekolo tekene ni ukuno, i ukumo poti yakakoa meamene.

<sup>4</sup> No yatene pakeke mekene tokoumo tualike laigoane Yerusalem take pone mekene tokoumo Yu yene peyame wene tiki.

<sup>5</sup> Nipa Parisi yenname tone losu totono-kama litia tikilepa ete Yu yene peya moa patukakete tiki toane litiane tokou. Nitima nokoule Yu yenname koto enoa wene taneya mekino, no auapeadetepa einapa nimini oko wa no kei piatikiyano, omotonota.

<sup>6</sup> Opi anu koiso akao ikilepa eyake tiki. Akolaliyo toto Yu yenane kaua-mikitii auapeatekamo papete oa piane toa taatekakolo kolotine nepianemekulu tokome koiso akao iki.

<sup>7</sup> Enile taatekakolo toto Yu yatene tuku (12) kakoa yateneka kolotine nepia meki. Nitoa nepia mekete onekele ete pia oto pia wedoa takama piki. Ali Muno Ageripa, Akolaliyo oa piane toa taatekakolo nepiane mekuleke Yu yenname anu koiso akao iki.

<sup>8</sup> Akolaliyo one eina oa pikana toa taatekoia tokomepa tua pekene yene moa kamotokamele toamoko wa wene pikipa edekolo wene piki-pe.

<sup>9</sup> Papetepa padele padele toane Nasarese Yesuno ibini paya tetepo takou wane wene piane mekou.

<sup>10</sup> Yerusalem take nitoane mekene Yesuno agale litia tane yene peya mati po yapu moane pitikakala tokou. Nipa Akolalike lodo yotokoai tane tobou ali-kiti patu kautakoane kakene tokou. Nitoanepa eina ali atoa wia tukatekoi oi pedoa pikolika oyakeno, toe wane okala tokou.

<sup>11</sup> Losu yapu kakoka ali atoa kibu moane ni Yesuke poanemo omotoane toane enekala tokou. Nitoanepa Yesuno ali atoa-pala kotimi yotokou matiyame mone ta-kitike toa pekene ali atoaka tuku toane moane tete mekala tokou wa Poloyo oka.

### *Polo One Tepe Kolotini Yesuke Pekoa*

#### *Pianelege Akenemo (Aposelo 9:1-19, 22:6-16)*

<sup>12</sup> Damasikase takeka enakale tou wane pokou. Nipa enile toatekou pipia Akolalike lodo yotokoai tane tobou ali-kitame wia metekoli moane pokou.

<sup>13</sup> Poadene pekene enekolu lou mataike keleponokaka a tibu laigoa pa tokat matiyame pitoa no payapono pia unukakale enekou. Kamo koni tobou ago Ageripa, eina papā lou pa tokat toa moa patukaka. Nitika pa'me nopala opia pokoi ali-kiti toto payapono pia unukakale

<sup>14</sup> toto peya itono aua pitakolo panagome Iberu agaleke nopala okome okome Solo Solo

no edeyake tetemekala tokope. Pinagome layo toua witikolo pitimekawe kaime ete pedekaku pokome toa tete motoko toa pinali neke wa tete motokakala tokokale yatekene ekene

<sup>15</sup> Ali Munago nepa te kake oko-pe-kolu okome neme tetemekala tokago Nasarese Yesuyo ukuno,

<sup>16</sup> opa wete kamokoa ka. Ne pono yametekilepa anukule takama poatekago moane kakadene tekene tuku. Nitikuno, ne pono yametekumoka ne naniko yameatekoule-kitika i i wa ali atoa pitikika toawea akama pamene.

<sup>17</sup> Iserele yatene pitikikaka e ku pa yatene pitikikaka anukumo akama pa wane wetekakenepa ne auapeane yopiane-kala kawou. Nipa eni yename ne-pala padele tokolipa toane mokala tou.

<sup>18</sup> Eni ali atoa yomiyomu keneke mekete tikino, pa tokota meati wa kini lene kikakoa yamema pamene. Eni ali atoa Setanuke lukoa mekete tikino, Akolalike lukoa meponomotamene. Nitikalepa Akolaliyo eya too. Eni yene no Yesuke wene tugakolipa kini poanele toma yakoike po letu mekakanapa keetapea poanele wia mitikoo. Nitoapa one wa takoa motane yene odeneya moa obokakomepa onekeya-kiti kini wa yameoo wa Ali Munoyo nopala oka wa Poloyo oka.

<sup>19</sup> Nitikome okome tobou ago Ageripa eina pulete enekounakale tagamoane onekemo akama yakou.

<sup>20</sup> Onekemo akama yakilepa Damasikase ta laigoane tokou. Nititikoane Yerusalem takeka Yudea ta luduka pa yatene-kiti pitikikaka pima yakene ekene kini namolo poane wene wia wawa

Akolalike tepe kolotini pekoia piamene. Tepe kolotini nimini pekoia pianeya meadiki wa ete-kitame wene tomotono, epetanele toma pamene wane oma pokou.

<sup>21</sup> Nitikolu tokome Yu yename tobou losu yapu pone kakouta no enamutukete wia tukadete wili toa kakoi.

<sup>22</sup> Nitaneyake Akolaliyo no auapekala tokano, opika einaka einamo ita kakene ikilepa ibini akene yene-pala ibini wamene yene-palaka uku. Nipa Moseseyoka Akolaline agale toawea akane ali-kitameka papete oa piane toane ikilepa pademoka anu weneme titiane wamekene eya wane uku.

<sup>23</sup> Keraisu taatekoa nokome tete moa mea tuamedeka. Nome tukomeke ali atoa naniko kamoia pomotoa one namolo takoa kamoia pamedeka. Kamoia pokomepa Akolaliyo Yu yeneka e ku pa yateneka toa moa pa takatekamo i i wa toawea amedeka wa Poloyo Ageripa-pala oka.

<sup>24</sup> Polo pinali one wa kei pikome nimo oa kakaka Pesasiyo teigakome okome i ago Polo leau oa kake wini okono, pademo pademota yakoa luaneya teke pinali neke wa wene bebo akatapeadeko wa telo okome okale okome

<sup>25</sup> kamo koniyali Pesasi, leau ekene wamukuno, poti uutukoane kakene ipa niminimo uku.

<sup>26</sup> Ako tobou ago Ageripayo anu ina ukumopa yatekala tokome tokano, one mekakoane ikilepa atiki toane kakene uku. Ina ukule-kitipa paigakoa taneya menano, ee nimini wa oneme wene toko.

<sup>27</sup> Tobou ago Ageripa ne eya wane yatekene uku. Akolaline agale toawea akane ali-kitame papete

wia mekapiane agalepa enipa nimini akediki wa neme wene toko-pe. Ee nimini wa neme wene toko wa Poloyo oka.

<sup>28</sup> Poloyo nimo okale Ageripayo okome wini agale tigini ikilepa noanume Keraisunole takamotoa oko-pe-kale okome

<sup>29</sup> agale tigini ekeneka ludu pitikoane ekeneka Akolaliyo eya tomotoane kini kowitikakene uku. Tobou ago neka anu agale opi yakoa mekitika kiwi peya no keneya ago latimotono ta wane kowitikakene uku. Noanu yono kapa po kakaneya kaku toa dikaneya kamotoane wamuku wa Poloyo oka.

<sup>30</sup> Nitikale tobou ago Ageripa natono Benaisita Yudea ta talo tane ago Pesasi toa kipala opia mekoi peya kamotokoa pokoi.

<sup>31</sup> Nitoa akolono pote ootakutukakete ekete i ago wia tukatekoleka po yapu pitikatekoleka pade piameadeko wa oma pokoi.

<sup>32</sup> Nitikoli Ageripayo Pesasi-pala okome ae i agomepa Sisayo one koiso yatekamotoane uku wa wamoo tokapa padele poanele toameadekono, poano pa wa neme one po kotokoa wetekatekale pioo toka wa oka.

## 27

### *Polo Lome Take Ue Dipike Mea Pekenemo*

<sup>1</sup> I yene totopa ue dipike Itali take ipete mekaoa wetekato wa oi pedoa piane ta patakale Poloka ete po yapu pitane yene padeka-kitika tobou poyo ago Duliasine yonoke moa pianeya. Duliasi einagopa ako odene meane tobou ago Sisane poyo yatene ago.

<sup>2</sup> Nitaneyake Esia ta matanu ludu ue dipi noai tane ta-kitike kutu pima poademe Aderamitiame ta pia nekene ue dipike toto peapetekoa mea pokoo. Eya ago Masedonia keneke piane Tesaloniaika take opiane ago Arisakasi toto-pala opia mea poka.

<sup>3</sup> Nitoa ue dipike mea pote podolikama Saidone take witakoo. Eidapa Duliasiyo Polo mama motokome okome neke oya-lawe mekita eta kokoa mepoano pa. Neke noateko nee eya metekete toino, pa wa okale katepitoa pome mepoka.

<sup>4</sup> Wa naniko eni ta tewitikoa pokolo pupulegeme oto-kama popokakoa kaka. Nitaneyake Saiperase tame pupulege pedekale popokamoka lono ete keneya pimotoa kokotoa ponokoo.

<sup>5</sup> Kokotoma ponetepa Silisia Pabilia tata matanu ete pimotoa kusa ue muke penekete Lisia keneke piane Maira take witaponokoo.

<sup>6</sup> Eni takepa tobou poyo agome toto mea poateko ue dipi pade tuku toa kakeneya. Nitapa Itali take kutu poademe Alesaderia pia nekene ue dipi enetekoapa pato wa toto moa mekaka.

<sup>7</sup> Nitikale mea pokolo ta pataka pade-mene pupulegeme oto-kama popokakoa kaka. Nitikale Naidasi ta patukoa kutu poadete wili tokoa kawa teko tokale paka lono Keriti take pokoo. Nitapa Keriti tame pupulege pedeka lono kokotoa Salomone ta patukoa ponokoo.

<sup>8</sup> Keriti matanu eko keneya pimotoa potii wa kutu kokotoa ponete kusa ue koianeka tugaponokoo. Nipa Lasia ta liti pupulege popokamoko lono ue dipi pinoai taneta

tugaponokoo.

<sup>9</sup> Ta kainya mati patakamotoa eida mea kakoo. Mea kakooka Yu yene kini losule tekete nee tekei wawa noamatekoi oipa wete penaneyake pupulege tadalita uu wa noka tokene taateko a nome kaka. Nitaneyake Poloyo eya wa pubu oka.

<sup>10</sup> Ame-loe opido mea pokolopa ue dipi wia kqua kopapu atua ali-kiti tua too wa pubu oka.

<sup>11</sup> Nitikaleka tobou poyo agome Poloyo okamo yakamokome eya agota ue dipi yopikago ue dipi pinagota kini agale yakoa toka.

<sup>12</sup> Eida ue dipi pinoai tane takepa pupulege tadalita taateko a noka tokene-mene poti kilikoa piamele toamokale tekete ue dipike mekoi-kiti peya matiyame Pinikisi ta kutu pipote enato wa oi pedoa pikoi. Keriti ta keneke latiane Pinikisi taapa pupulege wedoa popokoa kawamene ta tokome ni tokoi.

### *Pupulege Tadalita Uu Wa Noka Matiyame*

<sup>13</sup> Wa nani keneya pupulege poti kawia popokakale eneketepa kini oi pedoa pikoona toa Pinikisi take oyake mea tugapoo wa wene pikete eni ta tewitikoa pokoi. Nitoa Keriti ta matanu eko keneya pimotoa kokotoa ponokoi.

<sup>14</sup> Eni ta pene tewitikoa pokooka pupulege mati Keriti lono titimoa popokawineya noka.

<sup>15</sup> Nitoa ue dipi dekoa popokakale pupulege pine wia noka lono poadete wili toa kawa teko tokale wakolo pupulegeme dekoa aua poka.

<sup>16</sup> Nitikale paka kateko a mea penekete tube kusa ue muke piane ta Kooda wa ibini akene ta patukoa ponokoo. Eni de taame pupulege

pedekale peneketepa po kakamoa lia aua nekene ue dipi deya oto tube ue dipike liimoa kakadete wili tokoa kakoo.

<sup>17</sup> Ate liimoa kakatekoapa tube ue dipi pilage wia pedoa pitakaya tokale pupu yename ue dipi kouna lono poome lutua tagatapekoi. Nititikoapa pupulegeme ue dipi Libia ta matanu liti ue kekulu kibi tono keneya kakeneta popokoa aua pokome wia mitikoa kaugaya tokale eya tokoi. Ue dipi pigike lekane yomoke tukane mamina petene keawea moa pikoi. Nitikoli pupulegeme ue dipi pa popokoa aua poka.

<sup>18</sup> Podolikama pupulege uu wa popokoa kawa aua pokale pupu yenamepa ue dipi yaapemotoa kopapu moa kusa uele pitikakala tokoi.

<sup>19</sup> Wa podolikama ue dipi wa yaapemotoa ue dipi pupu toatekoiya wane-kiti po eya moa kusa uele pitikakala tokoi.

<sup>20</sup> Nitoapa ta pataka pade-mene lou tagoi wedome agopa takatapeneyaa pa mea ponokoo. Nipa pupulege tadalita pa uu wa okoa kaka matiyame toto peya tua atuamedeko wa wene pia mekoo.

<sup>21</sup> Pupu ali-kiti nee wawa noameneyaa pa pupu tokoa kakoi pake Polo kini lene yoto pome kakome okome ame-lawe Keriti ta opi tewitikoa poameo wane okounakale yakoa tikinakeya. Yakoa toi tokapa nipa i ke enekakoa kawa kinikiya tadoa atua padele toamoo toka.

<sup>22</sup> Opi wene yaapeaneyaa meamene. I ue dipi uele atuatekoyake odene agoka tua atukile toamoono, piti moameo.

<sup>23</sup> Akolaliyo nopa one wa takoa motoka tokolo onekele takama puku agome uku. Ete piapa

oneme wetekane edelo ago no kakouta nokome okome

<sup>24</sup> oya Polo piti moamea. Nepa ako tobou ago Sisane lenke poke kamedeko. Nitamedekono, Akolaliyo ne pewe witikome wini yene peyapa nekeya-kiti wa neke yonoke pikano, odene agoka tua atukile toamoo wa edelo agome onokano,

<sup>25</sup> wene yapeaneya meati. Akolaliyo eni akedekopa taateko a too wane oneke wene tugakene uku.

<sup>26</sup> Kusa ue muke piane ta deya eni matanuke i ue dipi pewikoa pitikatekoyake uku wa Poloyo oka.

<sup>27</sup> Atoa leme (14) kakoa ta pataka-pete pupulege pa popokakoa kakomepa ue dipi Ederia wa ibini akene kusa ue lono ete otota pa popokoa aukoa kaka. Nitikale tube likonu pupu yename pade ta nami kunuka piko patu wa eya tokoi.

<sup>28</sup> Ue kekulu piane itono pikome tokole enadete po namike kue ua tukateko a eina adeka pikutu toa enema pokoi. Itono kebonoke tugakaya wa tokoi. Nitoa titikete po uele pitikoa limo limo toa motekete yonota lido akoa kotu pia enekolipa kapidi (20) kakoa adekake itono tadeka. Kuku keneya pekete wa pitikoa limoa enekoli wagene melepu (15) kakoa adekake itono tadeka.

<sup>29</sup> Ue tigotoma pekedekale eneketepa ue kekulu tube kue pikata pewikoa pitikakaya tokale eya tokoi. Ue dipi pa lauaneya pimotoa tekete mabo kakeneya wane tuyono tene lono po kakoa uele pitikakoi. Pitikateko a wete pata pata wa kowitzoa kakoi.

<sup>30</sup> Nitoapa pupu yene tube ue dipi toa poadete eya tokoi. De ue dipi ue talike moa tukaketikakoi.

Nipa mabo kakeneya pade-mene ue dipi timini lonoka uele pitikadete keneya lede eni yotokoa tokoi.

<sup>31</sup> Nitikoli enekome Poloyo poyo tobou ago kakata pokome okome wini pupu ali-kiti tube ue dipi keneke toto-pala odeneka meamokolipa Akolaliyo kiwi toa moamoo-kale

<sup>32</sup> poyo ali-kitame de ue dipike kakoa tukane po-mene wakamu toa de ue dipi paka pomotoa wakoi.

<sup>33</sup> Ta pene patama nokaka Poloyo e yene kowitzikome okome ta pataka atoa leme (14) kakoa-peta ke enekakale mea nee noameneyano, nee pade opi moa noe.

<sup>34</sup> Kipala padeleka toamoono, ue dipi katepitoa poadetepa nee noatino noe wa ootokoapa

<sup>35</sup> e yene kakakoa palawe wane moa Akolalipala ke wa oa popimotokome naka.

<sup>36</sup> Nitikale enekete peyame ke wa wedia mea moa nakoi.

<sup>37</sup> Eni tube ue dipike toto meko yene ege kadukaka oi moapa koome kadukoa wa lene timini togoikoa kolo (276) kakoa meadekoo.

<sup>38</sup> Nee adekoa nootokoapa pupu ali-kitame ue dipi wa yaapetekakoi. Nipa ue dipi keneke lobutua pikoina witi kū moa kusa uele pitikakoi.

### *Ue Dipi Kusa Ue Matanuke Wia Mataloganemo*

<sup>39</sup> Ta patakale enekoli e taapa maida ta patu wa padeka lono kusa ue koianeka kibi piitapekale enekete ue dipi kuka tugakoa pia enato wa eya tokoi.

<sup>40</sup> Ue dipi lauaneya pimotoa uele pitikakoinakeya-mene po wakamu toa wakoi.

Nititikoapa ue dipi kiyotokoa pomotoa tene  
lono poome kebetoa kakane yomo peteneta po  
keetapekoi. Timini lonoka mamina petene pigike  
lekane yomoke ate moa tukakoi. Pupulegeme ue  
dipi matanuke popokoa aua pomotoa tekete ni  
tokoi.

<sup>41</sup> Nitikoli pupulegeme ue dipi popokoa aua  
pokome ue kekulu kibi tono keneya kakeneta  
wia matalogaka. Tene anakoa kamotoa wago  
ue kibike wia mataloganeya kaka. Nitikale  
tene lonopa ueme lokokoa kawa pedoa  
tadekakolokaney.

<sup>42</sup> Nitaneyake poyo ali-kitamepa po yapu  
pitikatekoi yene yonoto pia paka petoa pokayano,  
wia tukato wa wene pikolipa

<sup>43</sup> kiwi yopikagome Polo toane mouno wene  
pikome tokome wia tukameo wa oka. Nitikome  
okome uele yonoto pia wene tiki-kiti kiwi namolo  
takoa uele pitoa matanuke yonoto pia poe.

<sup>44</sup> Ete-kiti kipa yomo pilage-kitika ueme  
wia pedekolokane yomo-kitika tebetaneya pia  
pamene wa oka. One eni okana toa petoa  
peketepa padeka ue nakameneya peya matanuke  
witoa pokoi.

## 28

### *Molita Take Mekete Tanemo*

<sup>1</sup> Toto matanuke eni petoa pote kaketepa eni  
taapa Molita ta tadeko wa wene tokoo.

<sup>2</sup> Eni take meane yename toto mama moa we-  
doa auapekala tokoi. Nipa ta nokome niti-pala  
tokale tokome toe moa yotokakete kiwi peya noe  
wa makutukoa motokoi.

<sup>3</sup> Nitikakoa Poloyo toe adali wekotoa moa toele pitikakale toe potome kiimotokale tokome ali wia tukako kaya yomo adali pake meaneya witimotoke nokome Polono yono waneke tanianeya tuka.

<sup>4</sup> One yono waneke tanianeya tukale enekete eni take yename ekete ekee i agopa ali wia tukane ago tadeko. Ue nakameneya petoa nokanake kayame tania tukamedekale tuono, enato wa enekakoi.

<sup>5</sup> Enekakoli Poloyo kaya toe pake tadekatekoakakale one-pala padeleka toamoka.

<sup>6</sup> Nitikale one tigini yoa lobutuko patu, one kakota aua pitakome tuko patu wa nepikoa kakoiyake padeleka toamokale enekete kini wene wia wakete ekete i ago tuamokono, pulali tadeko wa okoi.

<sup>7</sup> Eniya liti eya ago Pabiliasi one itono-mene pianeya. Einagopa Molita ta talo toa meane ago. Einagome toto makutukoa motokome ta pataka teboloke one yapu moa mekooa nee epetaneyatakoā lawetekala toka.

<sup>8</sup> Einagono etene tepe moa poto yene taneyapianeya. One yene taneyapikata Polo pokome Akolali kowitikoa yono pia epetekaka.

<sup>9</sup> Nitaneyake eni kusa ue muke piane ta deyakepa yene pitane ali atoa Polo mekata note-kala kakoli epetekakala toka.

<sup>10</sup> Nitaneyake eni yename ke wa toto peya pewewia kakoi. Wa naniko ue dipi padeke mea poadete mekooka tone mea pekete noatekoya eya ue dipike moa pikoai tokoi.

*Molita Ta Tewitikoa Lome Take Pekenemo*

<sup>11</sup> Molita ta tokene teboleke mea kawa pade ue dipike lewia pote mea pokoo. Eni ue dipipa Alesaderia ta pia Molita take nekeneya. Nipa pupulege tadalita taatekoा noka tokene-meneke pa eida pianeya. Eni ue dipipa pinagome pulali Susine manata yomini kayo ekete Kasito Polokosita wa ibini akeneya.

<sup>12</sup> Ue dipike peapetekoा mea pote Sairakuse take witapekete ta pataka teboleke eida mekoo.

<sup>13</sup> Eida mea tewitikoa pote Risiame take witapokoo. Podolikama pupulege toto nokoo lono titia popokaka. Nitoa popokoa kawa aua pokale ta pataka takutake Puteoli take witapokoo.

<sup>14</sup> Eidapa Yesunomo yakoa motane yene kotukolo ekete ta pataka tatono (7) kakoa-peta kipala opia meato wa makutukoa motokoi. Nitikoli eida mea kawa tewitikoa Lome take pokoo.

<sup>15</sup> Nitoa ka ludu poadete pokolopa Lome take mea Yesunomo yakoa motane yename toto noatekomo yakamotekete kotua nokoi. Padeka-kitame Apiase Makesike kotua note wa padeka-kitame eni ta patukoa Pasidia Yapu Tebolo wa ibini akene take kotua note tokoi. Nitikoli enekete Poloyo Akolali-pala ke wa oa wene weye akeneya kutu poademe poka.

<sup>16</sup> Toto Lome take pote kakolo Lome ta yopia meane yename Polo po yapu pitikamekete yapu pade keneke one yopiateka poyo ago-pala meamele toko wa moa mekakoi.

### *Polo Lome Take Mekome Tanemo*

<sup>17</sup> Ta tebolo takoa patakale Poloyo Lome take meane Yu yenane tobou ali-kiti kiwi noe wa agale oa wetekakale obomoa nokoli okome anukameyо

toto Yu yatene-pala padeleka toamoane tone kaua-mikitane totonoka tetekamoane tokoluka Yerusalem Yu yename no dekoa Lomane yenane yonoke moa pikoi.

<sup>18</sup> Nitikoli no pitia yakatekoa no i ago wia tukatekole piameadekono, neke yapu pa wa wetekadete tokoli

<sup>19</sup> Yu yename mena-kama okoi. Nitikoli ekene kini koiso tokamotonu, ako tobou ago Sisayo anu koiso pitia yatekamotoane uku wane okou. Nipa Yu yatene koiso akoane ouno wene piamekenene okou.

<sup>20</sup> Ina ukulekepa anu oya-lawe kipala agale oadene tekene oboa noe wane agale oane wetekakouna. Ete Iserele yename Akolaliyo taatekoia tokale nepia mekete wedia meki toane noanumeka nepianemekuleke kapa poo kakoa kebetaneya kaku wa Poloyo oka.

<sup>21</sup> Nimo okale ekete Yudea Yu yenameka nekemo pade oto wia wetekamoia toto mekota nekene Yu yenameka enika enimo wamoia ne ahoa akene agale pademoka wamoia tokoi.

<sup>22</sup> Enilepa toamokoiyake ta piko peya pitiki-kitame eni weneya totono litia tiki yene ahoa ikino, pinali neke wa kei piatekomo yakoono,

<sup>23</sup> ipete wa oto nekete yakoo wa oi mea pokoi. Eni oi nokale eina ali peya mati Polo mekata obo-moa nokoli Poloyo Akolaliyo ali atoa talo tokome tokomo i i wa tqawea oka. Nipa Moseseyoka Akolaline agale tqawea akane ali-kitameka Yesuke papete oa piane toa pine toa olaukakome okome Yesu onepa eina Keraisu wa papete ibini oa piane ago wa onekemo olaukaoa meka. Nipa Yesuke

wene tugamotoa toa enekome likonu witia titimoa olaukoa mea ta likaka.

<sup>24</sup> Nitikale padeka-kitame winipa nimini oko wa one okamo yakoa moa wa padeka-kitame yakoa moamadete wakoi.

<sup>25</sup> Nitoa odene wene piameneya tewitikoa pokoika Poloyo agale pade oa metekome okome ae Epetane Yominiyopa tone kaua-mikiti-pala oatekamo Akolaline agale toawea akane ago Aisaia wene takakome eya wa akeneyea.

<sup>26</sup> *Iyatene kini kaleme yakoa meake yakoa moamoa leneme enoa meake enoa moamoa toi.*

<sup>27</sup> *I yatene kolotini lupi taneyamekete kaleme wedoa yakamele toamokolo mea lene-pala laka-putukoa yawa tiki. Enipa leneme enoa moa kaleme yakoa moa teketeipa Akolaline pekuno, noa tato wa nookedo tepe kolotini pekoapikolipa latekou wa Aisaiayo toaweaakaneyano, enipa nimini akedeko.*

<sup>28</sup> Kipala i ukumo yakoe. Akolaliyo ali atoa toa motokome tokomo e ku pa yatene pitiki toa oa pupitikaneya. Nitaneyake eni pa yenamne one eni tokomo yakoa moi wa Poloyo oka.

<sup>29</sup> (Nimo okale yakamotekete e Yu yene one mekata tewitikoa pote agale tetoa oma pokoi.)

<sup>30</sup> Polo mali takutake Lome take mekilepa one pitika yapu pinago kue mea topo tootokoa meka. One eni yapu nokoi peya Poloyo ke wa makutukoa mokala toka.

<sup>31</sup> Nitoapa Akolaliyo ali atoa talo tokome tokomo Ali Muno Yesu Keraisunomoka i i wa atiki toa mea olaukakala toka. Nitikalepa enika enimo olaukamea wa padameka wamokoi.

**Weneya Totono Keraisu Yesunomo  
The New Testament in the Witu Language (also known  
as the Wiru Language) of Papua New Guinea  
Nupela Testamen long tokples Witu long Niugini**

copyright © 1990, 1992 Wycliffe Bible Translators, Inc.

Language: Witu (Wiru)

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2012-11-26

---

PDF generated using Haiola and XeLaTeX on 18 Apr 2025 from source files  
dated 31 Aug 2023

160088da-6131-52e6-9b0f-c3dc6e8c6abb